

НОСИР ХИСРАВ

САФАРНОМА

**«ШАРҚ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ – 2003**

Масъул мұхаррир:
тарих фанлари номзоди ОМОНУЛЛА БҮРИЕВ

Форсийдан Ғулом Карим таржимаси

Хисрав Носир

Сафарнома/Тарж. Ф. Карим — Т.: «Шарқ», 2003.— 112 б.

Атөкли форс-тожик шоири Носир Хисравдан (1004–1088) авлодларга мерос бўлиб қолган кўплаб қимматли назмий ва насрый асарлар орасида «Сафарнома» асари алоҳида ажralиб туради. Шоир ушбу насрый китобида ўзининг гарбий ўлкаларга килган ва етти йил (1045–1052) давом этган ажойиб ва гаройиб саёҳати хотираларини тасвиirlаган. Носир Хисрав ўзи саёҳат килиб ўтган Эрон, Арманистон, Озарбайжон, Сурия, Миср, Арабистон, Ирок диёrlаридаги Табриз, Қоҳира, Куддус, Макка, Лахсо, Яман, Басра, Исфаҳон ва бошқа бир қатор шаҳар ва вилоятларнинг ўша даврдаги манзараҳарини жонли ва қизиқарли тарзда китобхон кўз ўнгидаги гавдалантиради. Ўзи мулоқот килган оддий ва машхур одамлар, турли ҳалқлар ва қабилаларнинг урф-одатлари ва турмуши ҳакида маълумот беради. Қарийб минг йил илгари улуғ аждодимиз томонидан яратилган ушбу нодир асар ўзбек тилида илк бор китоб ҳолида нашр этилди.

ББК 84 Ўз.

© «Шарқ» нашриёт-матбая акциядорлик компанияси
Бош таҳрирнияти, 2003 йил.

Ҳаким Носир Хисрав ва унинг ижодий мероси

Шарқ адабиёти ҳамда фалсафа ва жўғрофиё фанлари тараққиётiga муносиб ҳисса қўшган Абумуъиниддин Носир Хисрав ал-Қубодиёний 1004 йилда ҳозирги Тожикистоннинг жанубида, Амударё ирмоғи бўлган Кофарниҳон дарёси бўйидаги Қубодиён шаҳрида туғилди. Бошлиғич билимларни ўз шаҳрида эгаллаган Носир сўнгроқ Балх ва Марв каби йирик шаҳарларда таҳсил олади. Зеҳнили ва тиришқоқ Носир Хисрав ўз замонасидаги барча илмлардан ба қадри имкон хабардор бўлишга интилганини асарларида таъкидлаб ўтган:

*Сар андар жустани дониш ныҳодам,
Накардам рўзгори хеш бебар.
Намонд ҳечгона донишки ман зи он
Накардам истифода бешу камтар.*

*(Билим қидиришга урдим бошимни,
Бекор ўтказмадим умримни бир дам.
Бўлади кўпми оз фойдаланмаган,
Умримда бирор илм қолмади десам).*

Ш. Шомуҳамедов таржимаси

Истеъдодли шоир сифатида танилиш билан бирга фалсафа, риёзиёт, фикҳ ва жўғрофиё илмларини ҳам чукур ўрганиб, ўз даврининг юксак маълумотли кишиси бўлган Носир Хисрав олдин ғазнавийлар, сўнгра салжуқийлар салтанатидаги баъзи ҳокимларнинг девонларида турли вазифаларни бажаради. Давлат хизматида ўтган йиллар унинг ҳаётий тажрибасини анча оширади. Носир бир тарафдан юкори табақалар ҳаёти, уларнинг мамлакат ва халқни бошқариш сиёсатидан воқиф бўлса, иккинчи томондан, оддий меҳнаткаш халқ турмуши, хунарманд, деҳқон ва бошқа кафб эгаларининг жамиятдаги ўрнига оид бевосита кузатиш ва тажрибалари унинг асарларида акс этган. Атоқли шарқшунос олим Е. Э. Бертельс ҳақли равиша таъкидлаб ўтганидек, биз ўша даврдаги оддий

халқ турмуши ҳақида Носир Хисрав асарларидан унга замондош бўлган айрим тарихчилар китобларидан ҳам кўра кўпроқ маълумотлар оламиз. Носир Хисрав ҳар хил касб эгалари ичида дехқон меҳнатини айниқса кўкка кўтариб шарафлайди:

*Косибдан ҳам жаҳонда дехқон ортиқ,
Ҳама жондорга этмиш ризқ тортиқ.
Жаҳон хуррамлигин боиси дехқон,
Унинг бирла экинзор боргу бўстон.
Бу шидин яхши оламда не бордир,
Бул иш Одам Атодан ёдгордир.
Гар у дехқонлигин қиласа ҳар ишта,
Анга тенг келмагай ҳатто фаришта.
Жафокаш, паҳлавон меҳнат чекадир,
Тўкиб тер, барчанинг ризқин экадир.
Улус ризқи калидиdir қўлида,
Кўнгилни ёритар нури йўлида.
Бу оламда адолатнинг қулиди,
У оламда беҳишт богин гулиди.*

Ш. Шомуҳамедов таржимаси

1045 йилда Носир Хисрав давлат хизматидан бўшаб, сафарга отланади. Унинг бу сафари етти йилга чўзилиб, 1052 йилгача давом этади. У Эрон, Арманистон, Озарбайжон, Сурия, Миср, Арабистон, Ироқ диёрларидағи Табриз, Қохира, Куддус, Макка, Мадина, Лахсо, Яман, Басра, Исфаҳон ва бошқа бир қатор шаҳар ва вилоятларда бўлади. Мисрда икки йилдан ортиқ муқим яшайди. Сафар давомида Носир Хисрав ўз замонасининг кўплаб машҳур кишилари – шоирлар, олимлар, хокимлар билан учрашади. Табиийки, бу узок сафар мешакатлардан холи бўлмасдан, унга хатарли денгиз саёҳати, саҳроларни кесиб ўтиш, пулсизлик каби синовларга бардош беришга тўғри келади. Алломанинг сафар хотиралари унинг ажойиб «Сафарнома» асарида акс этган.

Ўша даврларда ислом динидаги икки асосий мазҳаб бўлган суннийлик ва шиалик ҳам ўз навбатида бир неча оқим ва фирқалардан иборат эди. Носир Хисрав шиа мазҳабидаги исмоилия оқимининг фаол тарафдори бўлди. У Мисрда бўлганида бу ерда давлат мафкураси даражасига кўтарилган исмоилия фоялари баъзи жиҳатлари билан уни ўзига ром қиласди. Баъзи тадқиқотчилар Носир Хисрав бундан олдин Ҳиндистонда бўлганида Мўлтон

шахрида исмоилийлар жамоалари билан илк бор яқинлашгани, унинг гарбий ўлкаларга сафар қилишдан кўзлаган асосий мақсадларидан бири ҳам айни шу исмоилия таълимоти билан чукурроқ танишиш бўлганлиги ҳақида фикрлар билдиришган.

Исмоилийлар ғояларини қабул қилиб, ҳатто, уларнинг бош раҳнамосидан махсус топшириқ олиб, бу оқимнинг йирик даъватчилардан бирига айланиши Носир Хисравнинг бундан кейинги ҳаёти ва ижодига катта таъсир кўрсатди. Исмоилия оқимининг келиб чиқиши ва Носир Хисравнинг исмоилийлар тарафдори сифатидаги фаолияти рус олими А. Е. Бертельснинг шу масалага бағишланган йирик тадқиқотида муфассал тарзда ёритилган.¹

Носир Хисравнинг сафардан ватанига қайтиб келиши биланок, исмоилия таълимотини тарғиб қилиб бошлаган даъватчилик фаолияти сунний мазҳабидаги ҳукмдорларга ёқмади, албатта. Шу сабабли шоир қувғин ва таъқибларга учраб, бир қанча муддат Мозандарондек хилват ўлкада яшириниб юради. Аммо ватанидан жудоликка тоқат қилолмай, таҳминан 1060 йилда Бадахшонга келади ва Помир тоғлари орасидаги Юмғон қишлоғидан паноҳ топади. Бу ерда у асосан ижодий иш билан машғул бўлади. Исмоилияга бўлган эътиқодидан воз кечмай, Миср ҳукмдорлари билан мактублар ёзишиб туради. Носир Хисравнинг шеърий асарларида замонадан, ўз ахволидан шикоят садолари кучлидир. Унинг даъватлари натижасида Бадахшонда исмоилийлар жамоаси вужудга келади ва улар асрлар давомида ўз эътиқодларига содик бўлиб қоладилар.

Носир Хисравнинг Юмғонда яшаган йиллари бир тарафдан маданий марказлардан узоқда, ёлғизлик ва қийинчиликларда кечтан бўлса-да, иккинчи тарафдан ижодий жиҳатдан жуда сермаҳсул бўлди. Шу пайтгача йиккан ҳаётий тажрибалари, улкан истеъоди, комусий билимларига таяниб, у турли мавзуларда бир неча дурдана асарлар яратишга муваффақ бўлди. Бу асарлардаги ўтқир фалсафий фикрлар, чукур донишмандлик, мураббиёна ўйтлар туфайли Шарқ ўлкаларида адаб номига эҳтиром юзасидан «Ҳаким» сўзи кўшиб айтиладиган бўлди.

Носир Хисрав 1088 йилда Юмғон қишлоғида вафот этди. Унинг мақбараси ҳозирги шимолий Афғонистонда-

¹А. Е. Бертельс. Насир-и Хисрав и исмаилизм, Москва, 1959.

ги Кўкча дарёсининг ўнг кирғоғида, тоғ тепасида жойлашган Ҳазрат Сайид қишлоғи яқинидадир. Улуғ шоир ва олим мақбараси асрлар давомида зиёратгоҳ жой бўлиб, маҳаллий аҳоли томонидан «Мозори Шоҳ Носир» деб аталади.

Носир Хисрав ўз асарларини форс-тоҷик ва араб тилларида ёзган. У бу тилларни мукаммал эгаллаган бўлиб, баъзи ўтмиш шоирларниң девонларида маъноси кийин сўзлар учраса, замондошлари ёрдам сўраб унга мурожаат килишгани маълумдир. Носир Хисрав мероси назмий ва насрый асарлардан иборатдир. Назмий асарлари форсий девон ҳамда шу тилда битилган «Рўшноинома» ва «Саодатнома» достонларидан иборат. Носир Хисрав араб тилидаги шеърларидан ҳам девон тузган бўлсада, бу девоннинг кейинги тақдирни хозиргача номаълумдир.

Носир Хисравнинг форсий девони Эронда бир неча бор нашр этилган. Девоннинг салмоқли кисмини халққа зулм қилувчи амалдорларни қораловчи сатирик йўналишдаги ҳамда илмларни эгаллаш ва комил инсон бўлишга чақирувчи панд-насиҳат мазмунидаги шеърлар ташкил қилади. Ўтмиш шоирлардан Носир Хисрав Рудакийни кўпроқ тилга олиб, унинг хотирасига эҳтиром кўргузган.

«Рўшноинома» фалсафий достондир. Шоир ўзининг фалсафий қарашлари баён этилган йирик насрый асарларидаги баъзи масалаларни «Рўшноинома»да шеърий шаклда муҳтасар тарзда баён этган. Асарда, жумладан, «Инсон фитрати», «Инсон шарафи», «Комил инсон сифати», «Мақтоворли ва ярамас хулқлар», «Жоҳиллар ва риёкорлар мазаммати», «Ақл таърифида», «Фалак ва юлдузларнинг яратилиши», «Тўрт унсур сифати», «Зоҳирий ва ботиний сезгилар» ва ҳоказо фасллар мавжуддир. «Ўзликни билиш ҳақида» фаслида мутафаккир шоир шундай хитоб қилади:

*Шиносои вужуди хештан шав,
Пас онгаҳ сарафрози анжуман шав.*

*(Ўз вужудингни билиб олгин,
Шундан сўнг мажлислар тўрида ўтиргин).*

Шоирнинг бирон-бир китоби йўқки, унда жоҳиллик қораланиб, илму маърифат шарафланмаган бўлсин:

*Наёбад марди жоҳил дар жаҳон ком,
Надорад бўи лаззат меваи хом.*

*(Жоҳил одам жаҳонда ўз орзуларига эришолмайди,
Хом меванинг ҳиди ва мазаси бўлмайди).*

Носир Хисравнинг назмий асарлари ичida «Саодатнома» достони алоҳида ажралиб туради.¹ Мумтоз форс-тожик шеъриятига бағишилаб турли ўлкаларда тузилган хрестоматияларнинг деярли барчасига бу асардан парчалар киритилган. Чунки, бу достоннинг тили содда ва равон, Носир Хисравнинг бошқа асарларига нисбатан тушунишга анча осондир. «Саодатнома»да «Яхшилик ҳақида», «Жоҳил ва ножинслар ҳақида», «Дўстлик ва вафо ҳақида», «Доноларга ёндошмоқ ҳақида», «Ҳаё, ақл ва иймон ҳақида», «Эҳсон ҳақида» ва ҳоказо фасллар бордир. Фасллар сарлавҳаларидан ҳам қўриниб турганидек, асар асосан донишманд шоирнинг ибратли ўгитларидан иборат. Достоннинг қатор байтлари афоризм даражасига кўтарилиган: «Сени одам туққан, одам бўл сен ҳам, Деву жин бўлмагил, одам бўл, одам», «Кимки шогирдликка чин дилидан шод, бир куни ўзи ҳам бўлғувси устоз», «Кишини ранжитмоқ осон ниҳоят, Кўнглини овламоқ мушкулдир ғоят», «Ҳамиша кишига яхшилик кўзла, фақат яхшилиқдан омонлик изла» ва ҳоказо.

Шу нарса дикқатга сазоворки, Носир Хисравнинг «Рўшноинома», «Саодатнома», Юсуф Хос Ҳожибининг «Кутадгу билик», Унсурулмаолий Кайковуснинг «Кобуснома» асарлари бир тарихий даврда ёзилган. Шу сабабли, мазкур муаллифларнинг тарбиявий мақсаддаги панднасиҳатлари ва илму хунар ўрганишга чақирган тарғиботларида ўхшаш жиҳатлар ва ҳамоҳанг фикрлар кўп учрайди.

Носир Хисравнинг насрый асарлари миқдор жиҳатидан унинг шеърий меросидан кам эмас. «Зод ул-мусофирийн» («Мусофиirlарнинг йўл озуқалари») китоби тақрибан 1061 йилда Юмғонда ёзилган. Йигирма етти бобдан иборат бу асардан муаллифнинг фалсафий қарашлари ўрин олган. Бобларнинг номлари «Ҳозирона ва ғойи-

¹Баъзи хорижлик тадқиқчилар «Саодатнома», «Шариф» тахаллусли бошқа шоир асаридир, деган фикрни билдиришган. Бу ҳақда қаранг: Носири Хисрав. Гулчине аз ашъор (сўзбоши Камол Айнийники), Душанба, 1957, 27 – 28-бетлар.

бона илмлар», Зохирий ва ботиний сезгилар», «Жисм ва унинг қисмлари», «Харакат ва унинг турлари», «Рух ҳақида», «Макон ва замон», «Яратувчининг исботи ҳақида», «Худо оламни яратганидан олдин нега яратмаганлиги ҳақида», «Рухнинг жисмга пайваст қилинишининг сабаби ҳақида», «Одамнинг қаердан келиб, қаерга кетиши ҳақида», «Таносух¹ таълимотига раддия» ва хоказолардир. Бу асаридан Носир Хисравнинг қадимги юонон файласуфлари Сукрот, Арасту, Афлотун, Фалес асарларининг кучли билимдони бўлганлиги кўринади. Шу билан бирга, у Куръон ва бошқа мўътабар китобларга таяниб, мураккаб фалсафий масалалар хусусида ислом дини доирасида хulosалар чиқаришга интилган. Носир Хисрав фалсафасида Форобий ва Ибн Сино каби Шарқ файласуфларининг кучли таъсири сезилиб туради.

Илму фаннинг ўз замонасидаги энг буюк тарғиботчиларидан бири бўлган Носир Хисрав ушбу китобида ҳам илм ўз соҳиби бўлмиш инсонни ҳайвондан фарқловчи асосий сифатлардан бири эканлигини айтиб, Оллоҳнинг Ўзи инсонни билим олишга ундайди, деган фикрни олға суради: «Донишманд одам деб аклий лаззатга интиладиган кишига айтилади. Юқори оламдаги мутлақ лаззат (лаззати куллий)га эришмоқ воситаси ҳам шу оламдадир. Одам илмларни ўрганишдан лаззат олади ва ҳайвонлар бундан маҳрумдирлар. Илмдаги ҳар бир дараҷага эришиш, бошқа даражага тарафга йўл очади ва шу тариқа илмнинг чегараси йўқдир. Одамни бу дунёга келтирмоқдан мақсад шуки, у бу лаззатга эришсин ва ўқиб ўрганишдан ҳеч тиним билмасин... Оллоҳнинг одамга фармони шудир: «То ҳаёт экансан, ўқи!»²

«Жомеъ ул-ҳикматайн» («Ҳикматлар йиғиндиси») китоби 1070 йилда ёзил тутагилган. Бу китоб ҳам асосан «Зод ул-мусофирийн»да қўйилган масалаларга бағишиланган бўлса-да, аммо унда баён услугиб ўзгачадир.

Носир Хисрав бу китобини файласуф олим ва исмолия мазҳабидаги киши ўртасида бўлиб ўтган савол-жавоб ва суҳбатлар тарзида ёзган. «Жомеъ ул-ҳикматайн»да ҳам муаллиф илмнинг аҳамияти ҳақидаги фикрларини

¹Таносух таълимоти деб рухнинг бир вужуддан бошқа вужудга кўчиб ўтиши ҳақидаги қарашларга айтилган.

²Носир Хисрав. Зод ул-мусофирийн. Нашрга тайёрловчи Муҳаммад Базлур-Рахмон. Берлин, 251-бет.

ривожлантириб, оламнинг яратилишидан мақсад унда оқил ва комил инсонлар яшашидир, деган хulosага келиб, жумладан, шундай дейди: «Оlam бир дараҳт кабидир ва оқил одамлар ушбу дараҳтнинг меваларирид. Дараҳтнинг уругини эккан ва парвариш қилаётган Зотнинг мақсади шунчаки дараҳт ўстириш бўлмай, балки унда мевалар етиширишдири».

Носир Хисравнинг ушбу асрлари ўрта асрлар Шарқидаги фалсафий фикрлар ривожини ўрганиш учун катта аҳамиятга эгадир. Олимнинг фалсафий қарашлари Г. Ашурорвнинг маҳсус тадқиқотида¹ таҳлил этилган бўлсада, аммо буғунги кунда унинг айrim қисмлари, айниқса, коммунистик мағкура асосида чиқазилган зўрма-зўраки хulosалар анча эскириб қолди. Носир Хисрав асрлари Шарқ фалсафаси ва педагогикаси тарихи бўйича жиддий ва салмоқли илмий тадқиқотларга мавзу бўла олади.

«Важҳи дин» («Дин чехраси») асари, асосан, илоҳиёт масалаларига бағишиланган. Бу китобида Носир Хисрав шариатни исмоилия мазҳаби таълимотига кўра талқин қиласди. Олим исломдан бошқа динлар таълимотига ҳам қизиқиш билан қараган. «Важҳи дин» асарининг бир ўрнида у шундай дейди: «Хинд донишмандларида бир китоб бўлиб, улар буни Худонинг сўзлари дейишиади. Мен уларнинг донишмандларидан бу сўзларнинг кўпларини эшитдим».

«Важҳи дин» Помир тоғларида асрлар давомида Носир Хисрав хотирасини авлиё даражасида эъзозлаб келган исмоилийлар жамоаси орасида мўътабар китоб бўлган. Асарнинг кўлёзма нусхалари кўплаб кўчирилган ва ундан диний маросимларни ўтказишида амалий кўлланма сифатида фойдаланилган.

Носир Хисравнинг насрый асрлари орасида «Сафарнома» номли нодир китоби алоҳида ажralиб туради. Асарнинг ёзилган йили маълум эмас, аммо ундан сафар давомидаёқ, муаллиф кундалик тутиб, йўл таассуротларини ёзиб боргани маълум бўлади. «Сафарнома» Носир Хисрав фарбий ўлкаларга саёҳат қилган етти йиллик (1045 – 1052) даврда кўрган-кечиргандарни баёнини ўз ичига олади. Асар бизгача жуда кам кўлёзма нусхаларда сақланиб қолган. Улардан энг қадимийси милодий 1691 йилда, яъни муаллиф вафотидан 600 йилдан кўпроқ вақт

¹Ашурор Г. Философские взгляды Носира Хисрава. Душанба, 1965.

ўтгач кўчирилган. Асардаги айрим чалкашликлар ва бошқа далилларга таяниб, кўплаб тадқиқотчилар яқдиллик билан Носир Хисрав «Сафарнома»си бизгача тўла ҳолида етиб келмаганини таъкидлашади. Чунки, бошқа бир қанча манбалардаги Носир Хисрав «Сафарнома»сидан олинди, деб келтирилган айрим парчалар асарнинг мавжуд кўлёзма нусхаларида учрамайди. Бу парчалардан бири Носир Хисравнинг Мисрда фотимиийлар сулоласига мансуб ҳукмдор Мустансирнинг қабулида бўлиши ва унинг хизматига кириши баёнидир. Маълумки, фотимиийлар сулоласи шиа мазҳаби, аниқроғи, унинг исмоилия тармоғи тарафдори эдилар. Шундан келиб чиқиб, тадқиқотчилар Носир Хисрав «Сафарномаси» муаллиф вафотидан сўнг сунний мазҳабидаги номаълум киши томонидан таҳрир қилиниб анча қисқартирилган, ундан шиалар ва исмоилийлар ҳакидаги ўринлар олиб ташланган, деб тахмин қилишади.

Шунингдек, XIV аср биринчи ярмида Амир Темурнинг невараси Бойсунқур Мирзо ибн Шоҳруҳ томонидан Абулқосим Фирдавсийнинг «Шоҳнома» асари танқидий матнiga ёзилган дебочада, жумладан, ушбу маълумотлар бор: «Ҳаким Носир Хисрав «Сафарнома»да шундай келтирган: «Тўрт юз ўттиз саккизинчи ҳижрий санада Тус йўлида янги қурилган улкан работни кўрдим. «Бу работни ким қурди?», деб сўраганимда дейишиди: «Бу работ Султон Маҳмуд Фирдавсийга инъом қилиб юборган маблағ ҳисобидан бунёд этилди». Бунинг қай тарзда юз берганини сўраганимда, шундай жавоб беришибди: «Фирдавсий вафот этган эди ва унинг меросхўри инъомни қабул килмади. Султонга арз қилганларида, у шу ерда бир иморат қуришга фармон берди ва ушбу работ ўшадир».

Мазкур парча ҳам «Сафарнома»нинг мавжуд кўлёзма нусхаларида йўқдир. Аммо бундай маълумотлар «Сафарнома»нинг тўлиқ нусхалари муаллиф вафотидан кейинги асрларда ҳам маълум бўлганини тасдиқлайди. Келажакда тўлиқ «Сафарнома» топилиб қолиши эҳтимоли ҳам инкор этилмайди, албатта.

«Сафарнома»да муаллифнинг таржимаи ҳолига оид кўпгина маълумотлар мавжуд. Гарчанд асар гарбий ўлкаларга қилинган саёҳат хотираларидан иборат бўлса-да, ундан Носир Хисравнинг олдин Хиндистон мамлакати ва турклар диёрида ҳам бўлганлиги англашилади. Но-

сир Хисрав ўз асарида Мовароуннахр ва Хурросондан анча олисдаги Миср ва Ҳижоз ўлкалари тавсифига кенг ўрин ажратади. У айниқса, зиёратгоҳ жойлар, табаррук қадамжолар ҳақида маълумотлар келтиришга катта эътибор берган. Носир Хисрав ўз йўлномасидаги маълумотлар имкон қадар аниқ бўлишига ҳаракат қилиб, ҳатто баъзи ўзи бўлган шаҳарларнинг эни ва бўйини қадамлаб ўлчаб чиққан. «Сафарнома»ни мутолаа қилган китобхон кўз ўнгидаги ўшадаги ўнлаб шаҳар ва қишлоқларнинг жонли манзараси намоён бўлади. Носир Хисрав ўзи мулоқот қилган оддий ва машҳур одамлар, турли ҳалқлар ва қабилаларнинг урф-одатлари ва турмуш тарзлари ҳақида маълумот беради. Муаллифнинг баён услуби жимжимадор иборалардан холи содда, равон ва мазмундордир. «Сафарнома» кўп жихатлари билан бизга ўзбек насрининг мумтоз намуналаридан бўлган «Бобурнома» асарини эслатади.

«Сафарнома» охирида Носир Хисрав, агар унга Машриқ тарафга ҳам сафар қилмоқ насиб этса, яна бир «Сафарнома» ёзажагини айтади. Туркистон ва Ҳиндистонда олдин бўлганини назарга олсан, энди у Хитойга сафар қилишни режалаштирган бўлса керак. Аммо, афуски, бу режа амалга ошмай қолган.

1994 йилда Техронда Носир Хисрав асарлари кўлёзмалари, нашрлари, таржималари ва улар юзасидан турли мамлакатларда олиб борилган тадқикотлар библиографияси китоб ҳолида нашр этилди.¹ Унда алломанинг «Ихтиёр ал-имом ва-л-ихтиёр ал-иймон», «Бўстон улукўл», «Хон ул-ихвон», «Далил ул-мутаҳайирин», «Рисола дар жавоби 99 саволи фалсафи», «Китоб андар радди мазҳаби Муҳаммад Закариё», «Кушойиш ва рахойиш», «Лисон ул-олам» ва бошқа баъзи асарлари ҳақида ҳам маълумотлар бор. Бу ўринда шуни таъкидлаб ўтиш зарурки, Носир Хисравнинг ўз китоблари билан бирга, унга нисбат берилган асарлар ҳам кўпdir. Унинг асарлари юзасидан турли мамлакатларда ўнлаб китоб ва юзлаб мақолалар чоп этилган. «Сафарнома» асари инглиз, француз, рус, урду, араб, турк, олмон тилларига таржима қилиниб, баъзи мамлакатларда бир неча бор нашр этилган.

¹ Кетобшеноси-иё Ҳаким Носир Хисрав Кубодиёний. Ба кўшише Али Мир Ансори. Техрон, 1372.

Мовароуннаҳр ва унга ёндош ҳудудларда Носир Хисравнинг шеърий ва насрый асарлари асрлар давомида қўллэзма нусхаларда ўқиб келинган. Уни нафакат катта шоир, балки йирик файласуф олим сифатида ҳам эътироф этишган. Үмар Хайём рубонйларида Носир Хисрав фалсафий фикрларининг кучли таъсирини сезиш мумкин. Ҳазрат Абдураҳмон Жомий «Баҳористон» китобида Носир Хисрав қатор мамлакатларга сафар қилиб, «Сафарнома» китоби ёзганини айтиб, «У шеър санъатида моҳир, ҳикмат илмида комил эди», дейди.¹

Бойсунқур Мирзо ва Абдураҳмон Жомийларга «Сафарнома»нинг яхши таниш бўлгани, бу асар темурийлар даврида маълум ва машҳур бўлганидан далолат беради.

Ўзбекистон зиёлилари орасида Носир Хисрав ижоди, хусусан, «Сафарнома» асарига қизикиш ўтган асрнинг 20-йилларидан бошлангани ҳакида фактлар мавжуддир. Абу Райҳон Беруний номидаги Шарқшунослик институти қутубхонасида «Сафарнома»нинг «Рўшиноннома» ва «Саодатнома» билан биргаликда 1922 йилда Берлинда эронлик олим Маҳмуд Фанизода томонидан амалга оширилган нашридан икки нусха бордир. Улардан бирига уч жойда (муқаддиманинг 1, 3 ва 25 сахифаларида) сиёҳли қалам билан араб ёзувида «Чўлононники, 104, 1927, Маскӯф» деб ёзилган. Чўлпоншунос олимларнинг тадқиқотларига биноан, Абдулҳамид Сулаймон ўғли Чўлпон Москвага 1925 йил ёзида борган ва 1927 йил баҳори охирларида юртига қайтган.² Чўлпон форс мумтоз шоирлари асарларини севиб ўқигани, ҳатто, Ўзбекистон Ёзувчилар уюшмасида 1937 йил 6 апрелда бўлиб ўтган йифгинда шоир «халқ душмани» сифатидә муҳокама қилинганда, бу нарса унга қўйилган катта айблардан бири бўлганлиги ҳакида маълумотлар бор.³ Шулардан келиб чиқиб, Чўлпон Носир Хисрав китобини Москвадаги бирон нодир китоблар дўконидан сотиб олган, сиёҳли қаламдаги ёзув буюк адабнинг ўз дастхатидир, деб ўйлаймиз. 104 рақами эса Чўлпон Москвада қўлга ки-

¹Абдураҳмон Жомий. Баҳористон. Ш. Шомуҳамедов таржимаси. Тошкент, 1997, 76-бет.

²Д. Куронов. Чўлпон ҳаёти ва ижодий мероси. Тошкент, 1997, 22 – 23-бетлар.

³О. Шарафиддинов. «Кулган бошқалардир, йиғлаган менман...» (Чўлпоннинг «Яна олдим созимни» китобига сўзбоши). Тошкент, 1991, 16 – 17-бетлар.

ритган китоблар ададини билдиrsa керак. Ушбу ноёб китоб Чўлпоннинг шахсий кутубхонасидан давлат қутубхонасига қандай ўтиб қолгани ҳақида эса ҳар хил тахминлар қилиш мумкин, холос.

Устоз шарқшунос олим Шоислом Шомухамедовнинг форс-тожик адабиётига бағишлиланган айрим тадқиқотларида Носир Хисрав ҳаёти ва ижоди ҳақида ҳам маълумотлар берилган. 1960 йилда Тошкентда «Тафаккур мевалари» номли тўплам нашр этилди. Унда бошқа бир неча Шарқ мумтоз шоирлари қаторида Носир Хисрав шеърларидан намуналар М. Муинзода таржимасида келтирилган.¹ Табиийки, ўша даврда чон этилган мақолаларда Носир Хисравни «дахрий шоир» қилиб кўрсатишга интилиш кучлидир.²

Асосан форс-тожик шоирлари ижодидан гулдаста сифатида тартиб берилган «Инжулар уммони» тўпламида «Саодатнома» асаридан айрим фасллар Ш. Шомухамедов таржимасида нашр этилган.³ Ҳамидулла Ҳасановнинг «Ўрта Осиёлик географ ва сайёҳлар» китобидаги Носир Хисрав ҳақида мақолада (Тошкент, 1964, 135—145-бетлар) асосан, «Сафарнома» асари таҳлил этилган. Мақолага Носир Хисравнинг саёҳатлари харитаси илова қилинган. Ҳамиджон Ҳомидийнинг «Кўхна Шарқ дарғалари» китобидан ўрин олган Носир Хисрав ҳақида «Фидоий эътиқод» мақоласида (Тошкент, 1999, 90—94-бетлар) «Сафарнома»дан кичик бир парча таржимаси келтирилган.

Носир Хисрав «Сафарнома»сидаги бевосита ҳаж зиёратига тааллукли лавҳалар Омонулла Бўриев томонидан таржима қилиниб, муфассал изоҳлар билан алохида китобча ҳолида нашр этилган.⁴

«Сафарнома»нинг эътиборингизга ҳавола қилинаётган ўзбекча таржимасига асарнинг Камол Айний ва Са-

¹ Тафаккур мевалари. Тўпловчилар М. Муинзода, А. Азизов. Сўзбони муаллифи Ш. Шомухамедов. Тошкент, 1960, 17—22-бетлар.

² М. Болтаевнинг «Маънавият юлдузлари» тўпламидан ўрин олган «Носир Хисрав» мақоласида (Тошкент, 2001, 112—118-бетлар) аллома меросига янгича қарашлар асосида баҳо берилган.

³ Инжулар уммони. Тўпловчи Ш. Шомухамедов. Тошкент, 1988, 150—158-бетлар.

⁴ Ҳаж сафари дафтаридан (Носир Хисравнинг «Сафарнома»сидан). Форс тилидан О. Бўриев таржимаси. Масъул мухаррир: Абдулазиз Мансур, Тошкент, 2000.

лоҳат Айний томонидан 1970 йилда Душанбада амалга оширилган нашри асос қилиб олинди. Шуни айтиб ўтиш лозимки, тажримада айрим қисқартиришларга йўл қўйилди. Носир Хисрав Байтулмақдис (Қуддус)даги масжидлар ва бошқа баъзи иншоотларнинг ниҳоятда батафсил, узундан узок тавсифини келтирган. Ўзбекча таржимада ушбу фасллар ва бошқа айрим кичик парчалар тушириб қолдирилди. Бу ва йўл қўйилган бошқа нуқсонлар учун хурматли китобхонлардан узр сўраймиз.

Келгусида Носир Хисрав «Сафарнома»сининг муфассал изоҳлар билан таъминланган тўлиқ таржимаси ва адибнинг бошқа асарларидан ҳам намуналар ўрин олган китобни нашрга тайёрлаш ниятимиз бор.

Таржима матнига изоҳлар тузишда улкан шарқшунос олим Е. Э. Бертельс ўзи амалга оширган русча таржимага илова қилган изоҳлардан кенг фойдаландик.¹

«Сафарнома» асарини ўзбек тилига таржима қилишни менга илк бор маслаҳат берган ёзувчи Нодир Норматовга ўз миннатдорчилигимни билдираман.

Фулом Карим,
Абу Райҳон Беруний номидаги
Шарқшунослик институти илмий ходими.

¹*Nasir-i Husraw.* Сафар-намэ. Книга путешествия. Перевод и вступительная статья Е. Э. Бертельса. Москва-Ленинград, 1933.

САФАРНОМА

Бисмиллахир роҳманир роҳийм

Оллоҳ охиратини обод қилгур Абумуъиниддин Но-
сир Хисрав ал-Кубодиёний ал-Марвазий шундай дейдӣ:

Мен бир дабирпеша¹ одам бўлиб, сultonнинг маъму-
рий ва молий ишларни бошқарувчилари жумласидан эдим.
Мен девон ишларига машғул бўлиб, бир қанча муддат
мобайнида ўз ишимда бир қадар тажриба орттиридим ва
хизматдошларим орасида анча танилиб қолдим. Тўрт юз
ўттиз еттинчи йилнинг рабиъ ул-охир ойида (милодий
1045 йил, октябрь-ноябрь) Абу Сулаймон Чағрибек До-
вуд ибни Мекоил ибни Салжук² Хурросон амири бўлгани-
да мен девон ишлари юзасидан Марвни³ тарк этдим ва
Марварруд⁴ вилоятининг Панҷдех мавзеига келдим. Ўша
куни Раъс⁵ ва Муштарий⁶ юлдузларининг қирони⁷ эди.

Айтишларича, бу кун бандасининг хар не ҳожати
бўлса, Оллоҳ таоло уни рано қиласур. Мен бир чеккага
ўтиб, икки ракат намоз ўқидим ва Оллоҳ таолодан ўзим-
га бойлик сўрадим.

Дўстларим ва ҳамроҳларим олдига қайтганимда, улар-
дан бири форсий шеър ўқиётган эди. Менинг хотирамга
ҳам бир шеър келиб, уни эшитгим келди. Қофозга ёзиб,
«Бу шеърни ҳам ўқигин», деб энди узатмоқчи эдимки, у
айни шу шеърни ўқий бошлади. Мен бу ҳолни хайрли
фол билдим ва ичимда: «Парвардигор менинг арзимни
ижобат қилди», дедим.

У ердан мен Жузжононга⁸ жўнаб кетдим. Бу ерда
бир ой турдим ва узлуксиз шаробхўрлик қилдим. Пай-
ғамбар саллаллоҳи алайҳи васаллам айтганлар: «Сиз-
нинг зиёнингизга бўлса ҳам ҳақиқатни гапиринг».⁹

Бир куни кечаси туш кўрдим ва тушимда бирор мен-
га деди:

— Одамни ақлу ҳушидан жудо қилувчи шаробни яна
қанча ичасан? Ҳушёр бўлганинг маъқул эди.

Мен жавоб бердим:

- Донишмандлар дунё андуҳларини камайтирадиган бошқа нарса ўйлаб топишгани йўқ.
- Бехудлик ва ҳушизлик ҳолатида хузур-ҳаловат топиб бўлмайди. Одамларга бехушлик сари йўл кўрсатадиган киши донишманд эмасдур. Аксинча ақлу ҳушни зиёда қиласиган нарса талабида бўлмоқ лозимдир, — деди у.
- Мен ул нарсани қандай топай? — деб сўрадим.
- Излаган топар, — деди у ва қибла тарафга ишора қилиб, бошқа ҳеч нарса демади.

Ўйқудан уйғонгач, мен барчасини эсладим. Кўрган тушим менга қаттиқ таъсир қилди ва ўзимга дедим: «Тунги уйқудан-ку уйғондим, қирқ йиллик уйқудан ҳам уйғономиг лозим». Ўзимнинг барча афъол ва аъмолимни ўзгартирмасам, таскин тополмаслигимни англадим. Тўрт юз ўттиз еттинчи йил жумодилохир ойининг олтинчисида пайшанба куни, порсларнинг¹⁰ Яздижардий йил ҳисоби¹¹ бўйича тўрт юз ўн тўртингчи ой даймоҳнинг ўртасида (1045 йил 20 декабрь) мен фусл қилиб пёкланиб, жоме масжидига бориб намоз ўқидим ва Оллоҳ таборак ва таолодан фақат вожиб ишларга машғул бўлишим, Ҳаққ субҳонаҳу таоло амр қилганидек, ман қилинган ва ношойиста ишларни тарқ этишимда мадад беришини сўраб илтижо қилдим.

У ердан мен Шибурғонга¹² жўнаб кетдим. Кечаси Борёб қишлоғида тунадим ва ундан Санглон ва Толикон¹³ йўли билан Марваррудга келдим. Сўнгра Марвга бордим ва зиммамдаги вазифадан озод этишларини сўраб дедим: «Фақир қиблага сафар этмоққа азимат қилдим».

Ҳисобот бериб, вазифамни топширдим ва бор мол-мулкимдан баъзи энг зарур нарсаларни олиб, қолганидан воз кечдим. Шаъбон ойининг йигирма учинчисида (1046 йил 6 март) Нишопур¹⁴ сари йўлга тушдим. Марвдан Сарахсга¹⁵ бордим ва улар оралифи ўттиз фарсангдир.¹⁶ У ердан Нишопургача яна қирқ фарсангдир. Шаввол ойининг ўн биринчисида шанба куни (22 апрель) Нишопурга етиб келдим. Шу ой охирида чоршанба куни (29 шаввол — 10 май) кусуф ҳодисаси¹⁷ рўй берди. Замон ҳукмдори Чафрибекнинг акаси Тўғрулбек Мухаммад¹⁸ эди. У сарроҷлар¹⁹ раастаси ёнида мадраса курмокқа амр қилган бўлиб, шу кунларда ушбу мадрасани кураётган эдилар. Тўғрулбекнинг ўзи эса Исфаҳонни²⁰ забт этмоқ мақсадида илк бор сафарга жўнаган эди. Зулқаъда ойининг иккинчисида (12 май) мен султон му-

лозимларидан бўлмиш Хожа Муваффак²¹ ҳамроҳлигига Нишонурдан чиқдим. Карвон йўли билан Қумисга²² етиб келдим ва шайх Боязид Бистомий²³ қаддасаллоҳи руха-хунинг²⁴ қабрини зиёрат қилдим.

Зулқаъда ойининг саккизинчисида жума куни Дом-ғонга²⁵ келдим. Тўрт юз ўттиз еттинчи йил зулхижжа ойининг биринчисида (9 июнь) Обхўри ва Чошхорон орқали Симонгага²⁶ келдим. У ерда бир муддат истиқо-мат қилдим ва илм аҳлини изладим. Менга устод Али Нисоий деган одамни кўрсатиши ва хузурига бордим. У ҳали ёш бўлиб, форс тилининг Дайлам²⁷ вилояти аҳоли-сига хос лаҷжасида гапиради. У сочини ўстирган бўлиб, бир гуруҳ шогирдлари унинг олдида жам бўлишган эди ва баъзилари Иқлидус²⁸ китобини ўқир, бошқалари тиб ва хисоб фанларига машғул эдилар. Суҳбат асносида Али Нисоий «Мен Оллоҳ раҳмат қилгур устоз Абу Али ибн Сино хузурида шундоқ ўқиган эдим» ёки «Ундан шуни эшитган эдим», деб қўярди. Назаримда, ўзининг Ибн Синога шогирд бўлганини менга билдириб қўйишни foят истаётган эди. У билан мунозарага киришганимда шундай деди:

— Ҳисоб илмини мукаммал билмайман, балки энди ўрганмоқчиман.

Уникидан кетарканман, ажабланиб, ўзимга дедим: «Агар ўзи билмаса, бошқаларга қандоқ ўргатаркин?»

Балхдан²⁹ Райгача³⁰ бўлган масофа менинг ҳисобимда уч юз эллик фарсанг чиқди. Айтишларича, Райдан Со-вагача³¹ ўттиз фарсанг, Совадан Ҳамадонгача³² ҳам ўттиз фарсанг, Райдан Исфаҳонгача эллик, Омулгача³³ ўттиз фарсанг экан. Рай ва Омул оралиғида Дамованд тоғи бўлиб, гумбазга ўхшаб кетади, уни шунингдек Лавасон ҳам деб атайдилар. Тоғ тепасида бир кудук бўлиб, ундан навшодир олишаркан. Баъзиларнинг гапига қара-ганда, олтингугурт ҳам олишаркан. Одамлар мол тери-сидан тикилган мешларга навшодир тўлатиб, пастга караб думалатиб юборишаркан, чунки уни йўлдан кўтариб тушиб бўлмайди.

Тўрт юз ўттиз саккизинчи йил муҳаррам ойининг бе-шинчисида (1046 йил, 13 июл) мен Қазвин³⁴ сари юриб, Кўха қишлоғига етиб келдим. У ерда қаҳатчилик бўлиб, бир ман³⁵ арпа нонини икки дирҳамдан³⁶ сотишарди. Кўҳа-дан чиқиб тўққизинчи муҳаррамда Қазвинга етиб келдим. Бу ерда боғ-роғлар кўп бўлиб, на девор ва на тиканли тўсиқлар билан ўраб олинмаган; киришга моне-

лик қиласиган ҳеч нарса йўқ эди. Мустахкам кунгурадор қалъаси ва яхши бозорлари бўлган Қазвинга менга кўркам шаҳар бўлиб кўринди. Фақат бу ерда сув кам бўлиб, ер ости коризларидан оқарди. Шаҳар ҳокими бир алавий³⁷ бўлиб, шаҳардаги ҳунармандлар ичида этик-дўзлар айниқса кўп эди.

Ўн иккинчи муҳаррамда Қазвинга чиқиб, Бел ва Кубон орқали Харзавил қишлоғига келдим. Бизда, яъни, мен, укам ҳамда бизнинг хизматкоримиз бўлган ҳинду болада йўл учун олингандан озуқа камайиб қолган эди. Укам баққолдан бирон нарса сотиб олиш учун қишлоқ ичкарисига кирди. Бирори дебди:

— Сенга нима керак? Мен баққолман.

— Сенда нимаики топилса, ҳаммаси бизга керак, чунки биз сафар қилаётган мусофиirlармиз, — деб жавоб бериди укам.

— Менда ҳеч нарса йўқ, — дебди у.

Шундан кейин қаердаки бирон одам шунга ўхшаш гапни қилса, «Харзавил баққоли экан», деб қўярдим.

У ердан чиқиб, тик тушган қия йўлдан юра бошлидик, уч фарсанг йўл босиб, Торум вилоятига³⁸ қарашли Барзулхайр қишлоғига келдик. Бу қишлоқ иссиқ минтакада жойлашган, анорзор ва анжирзорлар ғоят кўп бўлиб, аксар ёввойи ҳолда ўсади.

Ундан чиқиб, Шоҳруд дарёсигача келдик. Дарё соҳилидаги Ҳандон деган қишлоқда Дайлам маликлари авлодидан бўлган амир хазинаси учун биздан бож олишди. Дарё бу қишлоқдан ўтгач, Сафидруд номли бошка бир дарёга бориб қуйилади. Икки дарё туташгач, Гилон³⁹ тоғининг машриқ тарафидаги водийга тушади ва Гилон вилоятидан ўтиб, Обискун денгизига⁴⁰ қуйилади. Айтишларича, Обискун денгизига бир минг тўрт юзта катта-кичик дарё сувини қуярмиш. Денгиз бир минг икки юз фарсангга чўзилган бўлиб, ўртасида ахоли яшайдиган ороллар бор экан. Мен бу хил хикояларни кўп одамлардан эшийтдим. Энди бу гапларни қўйиб, ўз ишимга ўтаман.

Ҳандондан Шамиронгача уч фарсанг бўлиб, бу оралиқ тошлок биёбондан иборат. Шамирон Торум вилояти шаҳарлариандир. Шаҳар чеккарогидаги метин қоя устига баланд қалъа курилган бўлиб, уч катор девор билан ўраб олинганди. Қалъа ўртасига ер ости коризи ўтказилган, у дарёгача боради ва қалъани сув билан таъминлайди. Бу қалъада вилоят улуғларининг ўғиллари бўлган

мингга яқин киши яшайди ва улар бирон кимса бадкирдорлик ёки исёнкорлик қиласынни назорат қилишади. Дайlam вилоятида амирнинг қалъалари кўп бўлиб, аҳоли эмин-осуда ҳаёт кечиради; бирон одам бошқа бирорнинг мулкига дахл қилолмайди. Вилоят ахли жума намозига боришганда ковушларини масжид ташқарисида ечиб кўйишади ва ҳалигача бирон одамнинг ковуши йўқолмаган. Амир битикларида унвонини кўйидагича ёздиради: «Марзбонул-Дайlam Хайли Желон Абусолих мавло амир ал-мўъминин». Ўзининг исми Жестон Иброҳим экан.

Шамиронда бир яхши одам билан танишдим, асли дарбандлик бўлиб, исми Абулфазл Халифа ибни Али ал-файласуф экан. У олиҳиммат одам бўлиб, бизга анча эътибор ва лутфлар килди. У билан баҳслашиб туаридик, шу тарика дўстлашиб ҳам қолдик. Мендан қаёққа кетаётганимни сўради:

— Қибла сафарини ният қилганман, — деб жавоб бердим унга.

— Сейдан илтимосим шуки, қайтаётганингда бу шаҳарга яна бир кириб ўтгин, токи сен билан қайта кўришишга муюссар бўлай, — деди у.

Мухаррам ойининг йигирма олтисида (1046 йил 3 август) Шамирондан чиқдим ва сафар ойининг ўн тўртинчи куни Саробга⁴¹ келдим. Икки кундан сўнг Саробни тарқ этдим ва Сайдобод орқали йўл босиб, сафар ойининг йигирмасида Табризга⁴² етиб келдим. Бу шаҳар Озарбайжон пойтахти бўлиб, обод ва гавжум экан; эни ва бўйини одимлаб ўлчаб чиқдим: ҳар тарафи бир минг тўрт юз одим экан.

Озарбайжон вилояти подшосини хутбада кўйидагича зикр этишади: «ал-амирул ажал, сайфуддавлат ва шарофулмиллат Абумансур Вахсадон ибни Муҳаммад мавло амир ал-мўъминин».

Менга ҳикоя қилишларича, тўрт юз ўттиз тўртинчи йил рабиъ ул-аввал ойининг ўн еттинчисида пайшанба куни (1042 йил, 5 декабр) хуфтон намозидан кейин тунда бу шаҳарда зилзила бўлиби. Шаҳарнинг бир қисми вайрон бўлиби, баъзи маҳаллаларга эса заар етмабди. Айтишларича, ўшанда қирқ минг одам ҳалок бўлган экан.

Табризда мен Катрон⁴³ исмли шоир билан учрашдим. Дуруст шеърлар ёзаркан-у, форс тилини мукаммал билмас экан. Мунжиқ⁴⁴ ва Дақиқий⁴⁵ каби шоирларнинг де-

вонларини олиб келиб, менга ўқиб бериб, кийин жойларини тушунтириб беришмни илтимос қилди. Мен кийин байтларнинг маъносини айтиб бердим ва менинг барча шарҳларимни ёзиб олди. Сўнгра у менга ўз шеърларидан ўқиб берди.

Ун тўртинчи рабиъулаввалда биз Табриздан чиқдик ва амир Вахсадон лашкаридан бўлган сарбозлар ҳамроҳлигига Маранд йўли орқали Хўйга келдик, ундан бир элчи билан биргаликда Баркарига бордик. Хўйдан Баркаригача ўттиз фарсангдир. Сўнгра биз Ван⁴⁶ ва Вустонга бордик. Бу шаҳар бозорида чўчқа гўштини худди қўй гўшидек сотишарди. Аёллар ва эркаклар дўконлар олдида ўтириб, хеч тортинаасдан шаробхўрлик қилишарди. У ердан чиқиб, ўн саккизинчи жумодилаввалда Ихлотга етиб кёлдим. Бу шаҳар мусулмон ва арманилар чегарасида жойлашган бўлиб, ундан Баркаригача ўн тўккиз фарсангдир. Бу жой амирининг исми Насруддавла бўлиб, унинг ёши юздан ҳам ошиб кетган эди. Ўфиллари кўп экан, ҳар бирига бир вилоятни идора этмоқ учун топширибди. Ихлот шаҳрида уч хил: араб, форс ва армани тилларида сўзлашадилар. Менимча, шаҳарнинг Ихлот деб номланиши ҳам шу сабабли бўлса керак.⁴⁷ Савдо-сотиқда мис тангалар муомалада экан. Унинг бир ратли⁴⁸ уч юз дирҳамга тенгдир.

Йигирманчи жумодилаввалда биз у ердан чиқдик ва йўлдаги бир работда тўхтадик. Қор бўралаб ёғар ва қаттиқ совуқ эди. Шаҳар олдидаги даштда қорли ва бўронли кунларда йўловчилар йўналишни йўқотиб қўймасликлари учун йўл бўйлаб қозиклар қокиб қўйилган эди. Сўнгра Битлисга келдик. Бу шаҳар тор водийда жойлашган. Биз бу ерда асал сотиб олдик, бизга сотишган нархига қараганда юз ман асал бир динор тураркан. Шу шаҳарлик бир одам ҳақида менга ҳикоя килдилар: у бир йилда уч юз-тўрт юз меш асал тўпларкан. У ердан чиқаётib бир қасрни кўрдик, «Қиф унзур», яъни, «Тўхта ва томоша қил» деб аталаркан. У ердан ўтиб, бир масжид олдига етиб келдик. Айтишларича, бу масжидни Увайс Қараний⁴⁹ қурдирган экан. Шу жойда тоғ тепасида юрган бир тўп одамларни кўрдик: улар сарв дараҳтига ўхшаш бир хил дараҳтларни чопиштаган эди.

- Буларни нима қиласизлар? — деб сўрадим.
- Бу дараҳт танасининг бир учини ўтда ёқса, нариги учидан қатрон оқади. Биз ҳаммасини кудуққа оқизиб

тўплаймиз, сўнгра идишларга солиб, шу атрофларга элтамиз, — дейишди улар.

Ихлотдан бошлаб мен зикр қилган барча жойлар Миёфориқинг⁵⁰ вилоятига қарашлидир. У ердан Арзанг келдик: кўркам ва обод, оқар сувлари, боғ-роғлари, яхши бозорлари бор шаҳар экан. Порсларнинг озармоҳида (ноябр-декабр) бу ерда икки юз ман узумни бир динордан сотишади. Бу узум «рази армонуш» деб аталаркан. У ердан биз Миёфориқинга бордик. Ихлотдан Миёфориқингача йигирма саккиз фарсанг, Балхдан эса, биз юрган йўл бўйлаб, беш юз эллик икки фарсангдир. Биз Миёфориқинга тўрт юз ўттиз саккизинчи йил жумодилаввал ойининг йигирма олтисида жума куни (1046 йил, 23 ноябр) кириб келдик. Бу пайтда дараҳтлар барги ҳануз яшил эди. Атрофи оқ тошлардан тикланган баланд девор билан ўраб олинган, ҳар бир тошнинг оғирлиги беш юз ман атрофида эди. Ҳар эллик газ⁵¹ жойда худди шундай оқ тошлардан азим буржлар бино қилинган эди. Девор бошдан охиригача кунгурадор бўлиб, гўё уста ўз ишини ҳозиргина тугатгандек таассурот қолдиради. Шаҳарнинг фарб томонида улкан тош куббали катта дарвоза бўлиб, тавақалари ёғоч ишлатмасдан, яхлит темирдан қилиб ясалган. Шу жойда жоме масжиди ҳам бор, агар унинг таърифини муфассал баён этсак, хикоямиз жуда чўзилиб кетади. Аммо китоб муаллифи ҳар бир кўрган нарсаси ҳақида маълумот беришига интилгани сабабли, баъзи нарсаларни айтиб ўтмоқни лозим деб билади:

Масjidga taқab қурилган taҳoratxona қирқ bўlmadан iborat. Usti oqic bir ariq ўtkazilgan bўlib, barcha bўlmalarni oқar sув bilan tаъminlайди, usti ёniq ikkinchi ariқdan esa, ifloslanган sув oқib chиkiб ketadi.

Шаҳристон ташқарисидаги работда⁵² карвонсаройлар, бозорлар ва ҳаммомлар бор. У ерда бошқа бир жоме масжиди бўлиб, жума кунлари унда ҳам намоз ўқишиди. Шаҳарнинг шимол томонида Мухаддаса номли яна бир ҳисор бор. Буям шаҳар бўлиб, бозорлари, жоме масжиди ва гўзал қилиб солинган ҳаммомлари бор.

Вилоят султонини хутбада шундай зикр килишади: «Ал амирул-аъзам, иззул-ислом, Саъдулдин, насруддавлат ва шарафулмиллат Абунаср Аҳмад». У юз ёшга кирган ва ҳали ҳам ҳаёт экан. Бу амир Миёфориқиндан тўрт фарсанг нарида бир шаҳар бино қилган бўлиб, уни «Насрия» деб номлаган.

Миёфориқиндан Омадгача тўққиз фарсангдир. Қадимги тақвим бўйича даймохнинг олтинчи куни Омад шахрига етиб келдик. Шахар яхлит қоя устида бунёд этилган бўлиб, бўйи икки минг қадам ва эни ҳам шунчалик. Атрофига қора тошдан девор тикланган. Деворга қўйилган тошларнинг оғирлиги юз мандан минг мангача бўлиб, уларнинг аксари бир-бирига шу қадар жисп қилиб бириктирилганки, ораларига лой сувашга ҳам ҳожат қолмаган. Деворнинг баландлиги йигирма, эни ўн аршдир. Ҳар юз газ масофада бурж қурилган бўлиб, унинг ярим доираси саксон газдир. Девор кунгурулари ҳам қора тошдан қилинган. Шахар ичкарисида девор тепасига чиқиши учун тошдан зинаноялар қурилган. Ҳар бурж тепасида маҳсус жанггоҳ бор. Шахристоннинг тўрт дарвозаси бўлиб, барчаси темирдан. Ёғоч ишлатилмаган. Ҳар дарвоза оламнинг бир тарафига карата қурилган. Шарқий дарвоза Бобуддажла (Дажла дарвоза), гарбийси Бобуррум (Рум^{52a} дарвоза), шимолий дарвоза Бобуларман (Арман дарвоза) ва жанубдаги Бобуттал (Тал⁵³ дарвоза) деб аталади. Бу деворнинг ташки томонида худди шунақа тошдан ўн газ баландликда бошқа яна бир девор қурилган. Девор ёнпа кунгурадор бўлиб, кунгурулар оралиғи шунчалик кенгки, бошдан-оёқ қуролланган жангчи бемалол сифади ва бунда туриб жант қилмоқ ўнгайдир. Ташки деворга ҳам темир дарвозалар ўрнатилган, аммо улар ички дарвозалар рўпарасида эмас. Ташки ҳисор дарвозасидан киргач, то ички ҳисор дарвозасига етгунча деворлар оралиғи бўйлаб бирмунча юриши керак. Деворлар оралиғи ўн беш газдир.

Шахар ўртасида метин қоятош остида булоқ бор. Бешта тегирмонни айлантиришга етадиган суви бафоят яхши бўлиб, қаёқдан оқиб келишини ҳеч ким билмайди. Шахарда ушбу булоқ суви билан суғориладиган дарахтзор ва боғ-роғлар кўпдир. Шахар ҳокими биз зикр қилиб ўтганимиз ўша Насруддавлатнинг ўғлидир. Мен оламнинг турли иқлимларида жойлашган араб, ажам⁵⁴, хинд ва турк мамлакатларидағи кўпдан-кўп шаҳару қалъаларни кўрдим, аммо ер юзида Омадга ўхшаган жойни учратмадим ва бирон кишининг: «Шунга ўхшаш бошқа бир шаҳарни кўрганман», деганини ҳам эшитмадим. Жоме масжиди ҳам қора тошдан бўлиб, бундан ҳам кўра соз ва мустаҳкам қилиб қуриш беимкондир. Масжид ичида икки юздан зиёд сутун ҳар бири яхлит тош бўлагидан қилин-

ган ва тепаларида тош қуббалар бор. Ундан тепада яна бошка калтароқ устунлар тикланган. Катта қуббалар устида яна бир қатор кичикроқ қуббалар бор. Масжид-нинг гумбаз шаклидаги томи ёғоч ва тош бўлакларига ўймакорлик қилиб нақш солиб, бўяб безатилган.

Масжид ҳовлисида каттакон тош бўлиб, унинг ўртасида айланга тошховуз қилинган. Чуқурлиги одам бўйи ва айланаси икки газдир. Ҳовуз ўртасидаги жез қувурдан тоза сув фавворадек отилиб туради, аммо сув кела-диган ва оқиб кетадиган жойни кўриб бўлмайди. Кенг таҳоратхоналар ҳам бўлиб, шундай соз қурилганки, бундан ҳам яхшироқ қилиб қурмоқ амри маҳолдир. Албатта, Омадда барча иморатлар қора тошдан, Миёфориқинда эса оқ тошдан бино этилганини хисобга олмасак-кина.

Масжид яқинида катта калисо⁵⁵ бўлиб, у ҳам тошдан фоят маҳобатли қилиб солинган. Калисо заминига нақшли мармар парчалари ётқизилган. Ушбу калисода, тарсолар⁵⁶ ибодат қиласидаги меҳробда панжарали темир эшикни кўрдим, олдин бунга ўхашини ҳеч кўрмаган эдим. Омаддан Ҳарронгача икки йўл бўлиб, биттасида одам яшайдиган манзил мутлақо учрамайди ва у қирқ фарсангдир. Бошқасида қишлоқ ва манзилгоҳлар кўп бўлиб, аҳолиси аксар насронийлардир. Ва бу йўл олтмиш фарсангдир.

Биз карвон билан атрофи обод йўлдан юрдик. Йўл теп-текис, аммо шу қадар тошлок эдики, от ва туялар туёғи ҳар қадамда тошга тегарди. Тўрт юз ўттиз саккизинчи йил жумодилоҳир ойининг йигирма бешинчисида, жума куни (1046 йил, 28 декабрь) Ҳарронга етиб келдик. Эски тақвим бўйича, бу кун озармоҳнинг иккинчи куни эди. Бу ернинг об-ҳавоси бу пайтда худди Наврӯз пайтидаги Хурросон об-ҳавосидек эди.

У ердан жўнаб, Курул деган шаҳарга келдик. Бир олиҳиммат зот бизни уйида меҳмон қилди. Унинг уйига кириб ўтирганимизда бир бадавий араб ҳам кирди ва менинг яқинимга ўтирди. Олтмиш ўшларда эди. «Менга Қуръон оятларидан ўргат», деди менга қараб. «Кул аъзу биробин-нос...» деб ўргата бошладим ва у тақрорлади. Ушбу суранинг сўнгги ояти «минал-жиннати ван-нас»ни айтиб бўлганимда, у: «аро-айтан-нос» ҳам дейишим ке-ракми?» деб сўради. «Бу сурада мен айтганларимдан бошка оят йўқ», дедим. Сўнгра у «наққо латал-ҳатоб»

қайси сурадан?» деб сўради. Ҳолбуки, Масад сурасида «наққо латал-ҳатоб» эмас, балки «ҳамма лат ал-ҳатоб» дейилганини у билмас эди. Ўша кечаси Нас сурасини ҳарчанд тақрорлаганимга қарамай, бу олтмиш ёшли араб ёдлай олмади.

Шом вилояти таърифи

Тўрт юз ўттиз саккизинчи йил ражаб ойининг иккинчисида, шанба куни (1047 йил, 2 январь) биз Суружга келдик, шундан икки кун кейин Фурот дарёсидан кечиб ўтиб, Мунжибга бордик. Мунжиб Шом⁵⁷ шаҳарларининг биринчисидир. Эски тақвим бўйича, баҳманмоҳнинг биринчи куни бўлиб, об-ҳаво ниҳоятда яхши эди. Шаҳар ташқарисида бирон-бир иморат йўқ. У ердан биз Ҳалабга⁵⁸ кетдик. Миёфорикиндан Ҳалабгача юз фарсангdir. Ҳалабнинг ажойиб шаҳарлигига тан бердим. Баҳайбат девори бўлиб, баландлиги, назаримда, йигирма беш арш келади. Қоя устида тикланган қалъаси ҳам бор. Ҳалабни Балхга қиёсласа бўлади: ҳамма жойи обод ва иморатлар жуда зич жойлашган. Бу шаҳарда божгоҳ бўлиб, Шом, Рум, Диёрбакр,⁵⁹ Миср ва Ироқдан келтирилган моллардан бож олинади. Бу ўлкаларнинг ҳаммасидан бу ерга тожир ва савдогарлар келишади. Тўрт дарвозаси бор: Бобуляҳуд (яҳудий дарвоза), Бобуллоҳ (Оллоҳ дарвозаси), Бобулжинон (Боғлар дарвозаси), Боби Антокия (Антокия дарвозаси).

У ердан жанубга қараб юрилса, йигирма фарсангдан сўнг Ҳамо⁶⁰ шаҳрига борилади, ундан нарида эса Ҳумс⁶¹ жойлашган. Ҳалабдан Дамашққача⁶² эллик, Антокиягача эса ўн икки фарсангdir ва Тароблисгача⁶³ ҳам шунчалик. Айтишларича, Қустантаниягача⁶⁴ икки юз фарсанг экан.

Ўн биринчи ражабда биз Ҳалабдан чиқдик, уч фарсанг масофада Жундиқунсирин деган қишлоқ бор экан. Бошқа куни олти фарсанг йўл юриб, Сурмия шаҳрига келдик. Бу шаҳар атрофида девор йўқ. Яна олти фарсанг юриб, тош девор билан ўраб олинган Muарратун-нуъмон деган шаҳарга етдик. Шаҳар ободон ва дарвозаси тепасида бир тош лавҳа бўлиб, унга арабчадан бошқа бир ёзувда нимадир битилган эди. Бир кишидан бу хақда сўраганимда: «Чаёнларга қарши тилсимдир бу ёзув. Шу сабабли бу ерда ҳеч чаён бўлмайди. Агар ташқари-

. дан олиб келиб қўйиб юборишиша ҳам, тезда шаҳардан қочиб чиқиб кетади», деб жавоб берди у.

Шаҳар бозорлари молга лиқ тўла эди. Жоме масжиди шаҳар ўртасидаги бир баландликда жойлашган бўлиб, унга қайси бир тарафдан кирмоқчи бўлмасинлар, ўн бир поғонали зинапоядан тепага кўтарилишарди. Асосий экинлари буғдой бўлиб, мўл ҳосил олишади. Анжир, зайдун, пистаю бодом ва узумзорлар жуда кўп. Шаҳарда ёмғир ва қудук сувини истеъмол қилишади. Бу ерда Абул Аъло Маарий⁶⁵ исмли кўр одам бўлиб, у шаҳар ҳокими эди. У бехисоб бойликлар эгаси экан, жуда кўп кул ва хизматкорлари бор эмиш. Шаҳар ахли ўзларини унинг қули деб санашаркан. Аммо ўзи зоҳидона ҳаёт кечирап, оддий ва арzon лиbosлар кийиб, уйидан чиқмай хонанишинлик қиласи экан. Тирикчилик учун ҳар куни ўзига ярим ман арпа нони беришларини тайинлаган ва шундан бошқа ҳеч нарса емас экан. Эшитишмча, саройининг эшиги доимо очиқ бўлиб, шаҳарни идора этиш ишлари билан унинг ноиб ва мулоғимлари шуғулланишаркан, энг мураккаб масалалар юзасидангина ҳокимнинг ўзига мурожаат этишаркан. Ҳоким бойлигини ҳеч кимдан дариг тутмас, ўзи эса кундузи рўза тутиб, тунда ибодатдан бўшамас, фоний дунё юмушларига машғул бўлмас экан. Шеър ва адаб соҳасида Абул Аъло шу қадар юксак даражага эришган эдики, Шом, Мағриб ва Ироқ адиллари ушбу асрда ҳеч ким унинг билан тенглаша олмаслигини таъкидлашарди. «Ал-фусулу ва ал-ғоёт» номли китоб битган бўлиб, унда сирли иборалар, фасих ва ажиб алфозли масалалар келтирилганким, ҳар ким ҳам уларнинг маънисини идрок этавермайди. Уни ҳатто бир гал: «Бу китобни Куръонга муқобил сифатида битгансан», деб айблашган экан. Шаҳар ва унинг атрофларидан доимо икки юздан ортиқ одам хузурида жам бўлиб, адаб ва шеър хусусида ундан дарс олишади ва эшитишмча, Абул Аъло ўзи юз минг байтдан кўпроқ шеър битган экан. Бир киши ундан сўрабди:

— Худойи таборак ва таоло хисобсиз олий неъматларини сенга ато этмиш. Нега ундан бошқаларга бергансани, ўзинг истифода этмайсан?

— Истеъмол қила олганим қадар неъматларгина меникидир, — деб жавоб берибида у.

Мен бу шаҳарда бўлган пайтимда Абул Аъло ҳали ҳаёт эди.

Тўрт юз ўттиз саккизинчи йил ражаб ойининг бешинчисида (15 январь) биз у ердан чиқиб, Қўймотга, сўнгра Ҳамо шаҳрига келдик. Ҳамо Осий дарёси қирғоғида жойлашган обод ва кўркам бир шаҳардир. Дарёнинг «Осий» деб аталишига сабаб шулки, У Рум тарафга қараб оқади, яъни, Ислом мамлакатидан коғирлар ўлкаси томон кетиб, «осий» бўлади. Дарё ёқасига кўпдан-кўп чиғирлар ўрнатилган. Бу ердан сўнг йўл иккига айрилади: бири денгиз соҳилига ва Шомнинг гарбига, иккинчisi жанубга — Дамашққа кетади. Биз денгиз тарафга кетдик. Йўлда тоғ тепасида бир булоқ кўрдик. Айтишларича, ҳар йили шаъбон ойининг ярми ўтгач, булоқдан сув оқа бошларкан, уч кундан сўнг булоқ яна қуриб, то келаси йилгача бошқа бир қатра ҳам сув келмас экан. Ҳар йили жуда кўп одам бу ерга зиёратга келишади ва Ҳақ субҳонаху таолога яқинлик исташади. Булоқ яқинида зиёратчилар учун иморат ва ҳовузлар қилинган.

У ердан ўтиб, даштга келдик. Наргислар қийғос гуллаган бўлиб, гулининг кўплигидан бутун дашт оппоқ бўлиб кўринади. Биз йўлда давом этиб, Ирқа номли шаҳарга келдик, сўнгра икки фарсанг юриб денгиз соҳилига, соҳил бўйлаб жануб томонга беш фарсанг юриб, Тароблис шаҳрига етиб келдик. Ҳалабдан Тароблисгacha биз юрган йўл бўйлаб қирқ фарсанг масоғадир.

Биз бу ерга шаъбон ойининг бешинчисида, шанба куни қириб келдик. Шаҳар атрофида экинзор ва боғу бўстонлар жуда кўп. Шакарқамиш мўл бўлиб, норинж, турунж, лиму, хурмо каби мевалар ҳам бисёр эди. Айни шу кунларда шакарқамиш ширасини йигишириб олишаётган экан.

Тароблис шаҳрининг уч томони денгиз суви билан ўралган, чунончи денгиз мавжга кирганда, тўлқинлар шаҳар деворидан ошиб ўтади. Куруқликка қараган томонида Темир дарвозали мустаҳкам қалъа қурилган ва унинг олдида чуқур хандақ бор. Шарқ томонда кунгурадор тош девор тикланган. Девор устига тошотар манжаниқлар ўрнатилган. Аҳоли румликларнинг кемаларда шаҳарга хужум қилишидан хавфсирайди. Шаҳар майдони эни ва бўйига минг аршдир. Тўрт-беш, ҳатто олти табақали бинолар бор. Кўчалар ва бозорлар шунчалик кўркам ва озодаки, уларнинг ҳар бирини безатиғлик бир сарой деб ўйлаш мумкин. Эронда кўрганим барча турли емиш ва мевалар бу ерда ҳам бўлиб, фарқи шунда эдикӣ, бу ерда юз баробар кўп эди.

Шаҳар ўртасида улкан, улуғвор, мустаҳкам ва гўзал қилиб солинган жоме масжиди бор. Масжид ҳовлисида-ги гумбаз тагига мармар ҳовуз қилинганд бўлиб, унга бешта кувурдан сув оқиб туради, аҳоли истеъмол учун олганидан ортгани ер тагидан денгизга оқиб кетади. Айтишларича, шаҳарнинг йигирма минг аҳолиси бор экан. Атрофда ҳам қишлоқ ва манзилгоҳлар жуда кўп. Бу ерда қофоз тайёрлашади. Самарқанд қофозига ўхшаш, ҳатто ундан яхшироқдир. Бу шаҳар Миср султонига қарашлидир. Бунинг сабабини шундай изоҳлайдилар: бир замонлар Рум коғирлари лашкари бу шаҳарга ҳужум қилганида Миср мусулмонлари уларга қарши жанг қилиб, тор-мор келтиришган ва шаҳар Миср султонига тобеликни ихтиёр қилган. Миср султони шаҳардан хирож олади ва бу ерда султон саркардалари бошчилигидаги бир қисм лашкар шаҳарни душмандан қўриқлаш учун туради. Бу шаҳарда божгоҳ бўлиб, Рум, Фарангистон,⁶⁶ Андалус⁶⁷ ва Мағрибдан келадиган кемалар султон хазинаси учун ушр тўлайди. Бу пул қўшин таъминоти учун сарфланади. Султоннинг кемалари бўлиб, уларда Рум, Суқлия⁶⁸ ва Мағрибга бориб тижорат қилишади. Шаҳар аҳолиси аксаран шиадир ва бу ўлканинг барча шаҳарларидаги гўзал масжидларни шиалар бунёд этишган.

Бундан ташқари, улар ҳар жойларда работга ўхшаган уйлар куришган, аммо бу уйларда ҳеч ким яшамайди ва уларни «машҳад»⁶⁹ деб аташади. Тароблис шаҳри ташқарисида икки-учта машҳаддан бошқа уй йўқ.

Бу шаҳардан чикиб, яна денгиз соҳили бўйлаб жануб тарафга юрдик. Бир фарсанг масофада Каламун номли бир ҳисорни кўрдим, ичиди булоқ бор эди. Ундан чикиб, Таробарзан шаҳрига етдик ва Тароблисдан бу ергача беш фарсангдир. У ердан Жубал шаҳрига бордик. Шаҳар учбурчак шаклида бўлиб, бир бурчаги денгизга тиркалган, тевараги баланд ва мустаҳкам девор билан ўраб олинган. Атрофда хурмо ва бошқа жануб дарахтлари жуда кўп. Кўлида икки дона янги узилган қизил ва оқ атиргулни ушлаб турган бир болани кўрдим, ҳолбуки бу пайт эски тақвим бўйича исфандармуз (феврал) ойи эди.

У ердан Байрут⁷⁰ шаҳрига бордик. Тошдан тикланган бир тоқини кўрдим, баландлиги чамамда эллик газ бўлиб, остидан йўл ўтарди. Тоқининг ён томонлари ҳар бирининг оғирлиги минг мандан зиёдроқ оқ тош бўлакларидан қурилган. Унинг устига йигирма газ баландликда

Фишт терилган ва энг тепада мармар сутунлар ўрнатилган бўлиб, ҳар бирининг баландлиги саккиз газ ва йўғонлиги шунчаликки, икки кишининг кучогига зўрға сиғади. Сутунлар лой ва ганч ишлатилмасдан, фақат тошларни бириктириб қурилган қуббаларни кўтариб туради. Қуббаларга ишлатилган тошларнинг ўлчами чамамда бўйига саккиз ва энига тўрт арш бўлиб, оғирлиги етти минг ман атрофида эди. Ҳар бир тош бўлаги ўймакорлик ва наққошлиқ ила шу қадар безатилганки, бунга ўхшави ёғоч иморатларда ҳам кам кўрилади. Яқин атрофларда шу токидан бошқа бирон бино сақланиб қолмаган эди. «Бу қандай жой?» деб одамлардан сўраганимда, менга: «Эшитишимизча, бу тоқи Фиръян бофининг дарвозаси бўлган ва жуда қадимийдир», деб жавоб беришди.

Бу жойдаги чўл юзаси мармар билан безатилган айланда, тўрт қиррали, олти қиррали ва саккиз қиррали сутунлар ва сутун парчалари билан қопланган. Тоши шу қадар қаттиқки, темир унга кор қилмайди. Аммо яқин атрофда тош олиб келиш мумкин бўлган тоғлар йўқ. Яна бир хил тош сунъий равишда тайёрланганга ўхшайди, унга ҳам бошқа тошлар каби темир кор қилмасди. Шом мамлакатида мен беш юз мингдан ортиқ сутун ва сутун парчаларини кўрдимки, бирон тирик жон булар ўзи нима ва қаердан келтирилганини менга айтиб беролмади.

Ундан сўнг биз денгиз ёқасидаги Сайдо⁷¹ шахрига бордик. Экинзорларида шакарқамиш кўп экан. Шахар баланд ва мустаҳкам тош девор билан ўраб олинган ва уч дарвозаси бор. Жоме масжиди жуда гўзал ва бенуқсон килиб қурилган. Масжид ичкарисига мунаққаш бўйралар солинган. Бозор ҳам шу қадар озода ва ораста эдики, буни кўриб, мен: «Ё сultonнинг келиши кутилмоқда, ё бошқа бирон хушхабар муносабати билан шахарни безатишган», деган хаёлга бордим. Анигини билиш учун савол берганимда: «Шахарда бу ҳол одат тулага кирган», дейиши. Богу бўстонлари шу қадар кўркам эдики, буларни бирон подшоҳ қунт ва ҳавас билан бунёд эттирган ва ичида кўшклар қурдирган, деб ўйламоқ мумкин эди. Аксар дараҳтлар шифил мева қилган эди.

У ердан чиқиб, беш фарсанг юриб, Сур⁷² шахрига келдик. Бу шахар денгиз соҳилидаги бир коя устида бунёд этилган эди. Шахристоннинг қуруқликка қараган томони юз газдан ортиқ бўлмай, бошқа жойларини ден-

гиз суви ўраб олган эди. Қалъа девори йўнилган тошлардан қурилган ва сув кирмаслиги учун ёриқларга қирсувалибди. Шаҳар майдони чамамда эни ва бўйига минг қадамдан эди. Беш ва олти қаватли бинолар, фавворалар жуда кўп. Бозорлари яхши ва турли-туман неъматлар ила обод. Шомнинг соҳилбўйи шаҳарлари ичida Сур шаҳри бойлиги ва хилма-хил молларнинг сероблиги билан машҳурдир. Аҳолиси аксар шиалардир. Сунна мазҳабидаги бир қози бўлиб, уни Абу Уқайл ўғли деб аташар, хушрўй ва бой одам эди. Шаҳар дарвозаси яқинида бир машҳад қуришган, бу ерда бўйра ва гиламлар, олтин ва кумушдан ясалган қандил ва шамдонлар кўп эди. Шаҳар баландликда жойлашган бўлиб, сув тоғдан келарди. Шаҳар ташкарисида осма қувур қурилган ва сув шу қувурдан ичкарига оқиб киради. Тоғнинг шаҳарга қараган томонида бир дара бўлиб, ундан ўтиб машриқ сари қараб юрилса, ўн саккиз фарсангдан сўнг Дамашқ шаҳри келади.

У ердан чикиб етии фарсанг юргач, Акка шаҳристонига етиб келдик. Битикларда уни «Мадинатул Акка» деб ёзадилар. Шаҳар баландликда бино қилинган бўлиб, бир қисми қиялиқда, қолган қисми текис ерда жойлашган. Бутун соҳил бўйлаб баландликлар бўлмаган жойда шаҳар бино қилишмайди, чунки денгиз сувининг тошишидан ва қирғоққа келиб уриладиган тўлқинлардан хавфсирашади. Шаҳар ўртасида жойлашган жоме масжиди бошқа бинолардан баландроқ бўлиб, сутунлари мармардандир. Ташқарида, қиблага нисбатан ўнг томонда пайтамбар Солих алайхиссаломнинг қабри бор. Масжид ховлисининг бир қисмига тош ётқизилган, бошқа жойига кўкат экилган. Айтишларича, Одам алайхиссалом шу жойга экин эккан экан. Шаҳарнинг майдонини ўлчаб чиқдим: узунлиги икки минг ва эни беш юз арш экан. Шаҳар девори жуда мустаҳкам бўлиб, фарб ва жануб томонда денгизга тақалиб турибди. Бандаргоҳ ҳам жануб томонда жойлашган. Соҳилбўйи шаҳарларининг кўпларида бандаргоҳ бор ва булар кемаларни қўриклиш учун қурилган. Бандаргоҳни отхонага ўхшатса бўлади: орқа девори шаҳристонга тирадиб, икки ён девори денгизга ичкарилаб кирган. Эллик газ масофадаги кириш жойида девор йўқ, аммо ён деворлардан бир-бирига қараб занжирлар тортилган. Биронта кемани бандаргоҳга киритмоқчи бўлсалар, занжирларни бўшатадилар ва улар сувга

чўккач, кема сузиб ўтади. Сўнгра яна занжирларни та-ранг қилиб тортишади ва бегоналар кемаларни ўғирлаб кетолмайди.

Шаркий дарвозанинг сўл томонида бир булоқ бор. Ундан сув олиб чиқиши учун зинадан йигирма олти погона пастига тушиш керак. Булоқни Айнулбақар деб аташади. Айтишларича, уни биринчи бор Одам алайҳиссалом топиб, сигирини шу ерда сугорган экан. Шу сабабли ҳам уни Айнулбақар (Сигирбулок) деб аташади.

Агар Акка шахристонидан машриқ сари юрилса, тоғ тепасида анбиёлар машҳадлари бор. Бу жой Рамлага кетадиган йўл чеккасидадир. Менда ушбу табаррук мозорларни зиёрат қилиш истаги туғилди. Аккаликлар мени огоҳлантиришид: «Бу йўл бўйида бир тўп муфсид одамлар уя қуришган, агар бирон мусофири кўришса, унга хужум қилиб, бор-бўдини тортиб олишади».

Мен нарсаларимни Акка масжида қолдириб, шаркий дарвоза орқали шаҳардан чиқдим. Тўрт юз ўттиз саккизинчи йил шаъбон ойининг йигирма учинчисида, шанба куни (1047 йил, феврал) шаҳарга асос соглан киши — Акка қабрини зиёрат қилдим: у улуғ ва солиҳ одам бўлган. Йўл биладиган ҳамроҳим бўлмаганидан нима қилишга ҳайрон бўлиб турганимда, Оллоҳ таолонинг инояти билан худди шу куни озарбайжонлик бир форс билан учрашдим. У олдин ҳам табаррук мозорларни зиёрат қилган бўлиб, энди иккинчи марта айни шу ниятда йўлга чиқкан экан. Мен икки ракат намоз ўқидим ва эзгу ниятимни амалга оширишимга мусоада этгани учун Худойи таборак ва таолога шукроналар айтиб, саждалар қилдим. Барват номли қишлоққа келиб, Уяш ва Шамъун қабрларини зиёрат қилдим. У ердан Домун номли кичкина бир форга бориб, яна бир қабрни зиёрат қилдим, айтишларича, бу Зулкифл алайҳиссалом қабри экан. Сўнгра Аъбилин қишлоғига бориб, Худ алайҳиссалом қабрини зиёрат қилдим. Унинг сағанаси ёнида хартут дарахти ўсади. Шу якинда жойлашган Узайр алайҳиссалом қабрини ҳам зиёрат қилдим. Сўнгра жануб томонга йўл олиб, Хозира қишлоғига етиб келдим. Қишлоқнинг гарб томонида бир дара бўлиб, унда қоя остидан чиқадиган тоза сувли булоқ бор. Булоқ рўбарўсидаги қоя устида масжид бино қилинган бўлиб, унинг девор ва томи тошдан қурилган икки хонаси бор. Эшиги шу қадар кичикки, одам зўрга сифади. Бу ерда икки қабр ёнма-ён

жойлашган: бири Шуайб алайҳиссаломники ва иккинчи-си унинг Мусо алайҳиссаломга хотин бўлган қизиники-дир. Қишлоқ ахли масжид ва мозорни авайлаб ва озода сақлаб, шам ёқиб туришади ва ҳоказо.

У ердан мен Арбил қишлоғига бордим. Қишлоқнинг кибла тарафида тоғ бўлиб, унда мозор бор ва бу мозор-даги тўрт қабр Ёқуб алайҳиссалом фарзандлари ва Юсуф алайҳиссалом акалариникидир. Ундан нари юриб, бир тепаликни кўрдим, пастида бир фор бўлиб, унда Мусо алайҳиссалом онасининг қабри жойлашган. Бу мозорни зиёрат қилгач, яна нари юриб, бир дарага келдим, унинг охирида кичикроқ бир кўл кўринди. Бу кўл бўйида Табария шаҳри жойлашган. Кўлнинг узунилиги тахминан олти фарсанг, эни уч фарсанг, суви ниҳоятда ширин. Шаҳар кўлнинг фарб томонида ва барча ҳаммом сувлари ва бошқа ифлос сувлар кўлга оқиб тушади. Бу шаҳар ва кўл кирғоғидаги қишлоқлар аҳолиси шу кўл сувини ичишади. Эшитишимча, бир замонлар бир амир келиб, ифлос сувларнинг йўлини боғлаб, кўлга оқизмасликни буорибди. Аммо кўл суви булғаниб, ичишга яроқсиз ҳолга келибди. Ноилож яна ҳамма ифлос сувларнинг йўлини очиб юборишни буорибди, шундан кейин кўл суви яна ширин бўлибди. Шаҳарнинг мустаҳкам девори кўл ёқаси-дан бошланиб, унинг гирди ўраб олинган, факат кўлга қараган томонида девор йўқ. Кўлнинг туби тошлок; жуда кўп бинолар сув ичидадир. Сув ичидан мармар сутун-лар тиклаб, устига миноралар қуришган. Бу кўлда ба-лик жуда кўп экан. Шаҳар ўртасида жоме масжида бў-либ, унинг олдида булоқ бор. Булоқ тепасида ҳаммом қуришган. Сув шунчалик иссиқки, совук сув чапишти-расдан баданга қуийб бўлмайди. Бу ҳаммомни Сулаймон ибни Довуд алайҳимуссалом қурдирган ва факир ҳам ушбу ҳаммомда чўмилдим. Табария шаҳрининг фарбида яна бир масжид бўлиб, уни «Ёсуман масжиди» деб ата-шаркан. Биноси гўзал килиб солиган. Масжид ўртасида майдонча бўлиб, унга меҳроблар ўрнатилган ва атрофи-га ёсуман дарахтлари ўтқазилган; масжид номи шундан олинган. Масжиднинг шарқ томонида равоқ бўлиб, унда Ошаъ алайҳиссалом қабри бор. Бани Исройл қавми то-монидан ўлдирилган етмиш пайғамбар қабри ҳам шу ердадир.

Табария шаҳридан жанубда Лут кўли жойлашган ва унинг суви шўрдир. Бу кўл ёқасида бир пайтлар Лут

қалъаси бўлган экан, аммо ҳозирда ундан асар ҳам қолмаган. Бир одамдан шундай деб эшитдим. «Шўр сувли Лут кўлида бир хил модда бор: у қора рангли бўлиб, кўл сатхидан ажралиб чиқиб, сигир шаклини олади. У тошга ўхшайди-ю, лекин қаттиқ эмас. Одамлар бу моддани кўлдан олиб чиқиб, парчалашади ва шаҳар ва вилоятларга элтишади. Агар бу модданинг бир парчаси дараҳт тагига қўйилса, бу дараҳтга ҳеч қурт тушмайди, илдизига ҳам қурт-кўмурсқа зиён етказа олмайди, хуллас, дараҳтзор ер ости ҳашаротлари хавфидан эмин бўлади».

Бу маълумот учун жавобгарлик айтувчининг гарданидадир. У яна бу моддани атторлар ҳам сотиб олишини айтди. Гиёҳдан тайёрланган дориларда нақра деган қурт пайдо бўлса, уни шу модда даф қиларкан.

Табария шаҳрида бўйра тўқиб, ундан жойнамоз қилишади. Бу ерда уни беш динордан сотишади. Фарб тарафда бир тоғ жойлашган, ундаги бир метин қояга яҳудий хати ёзилган. Бу лавҳа битилганида сайёralар ҳамал буржида бўлган.

Шаҳар ташқарисида, қибла тарафда Абу Ҳурайранг⁷³ (р.а.) қабри бор. Лекин бирон одам бу мозорни зиёрат қиломайди. Чунки, ўша жой одамлари шиалар бўлиб, зиёратга бораётган одамга болалар қичқириб ёпирилишади ва тош отишади. Шу сабабли менга ҳам зиёрат муяссар бўлмади.

Бу мавзеъдаги мозорларни зиёрат қилиб қайтаёттанимда Кафарканда деган қишлоқда бўлдим. Қишлоқ жанубида бир тепалик бўлиб, унда мустаҳкам дарвозали гўзал бир савмаа⁷⁴ курилган.

Юнус алайхиссалом қабри шу ердадир. Савмаа дарвозаси ёнида ширин сувли кудук бор. Бу жойни зиёрат қилгач, Аккага йўл олдим. Бу ердан Аккагача тўрт фарсангдир. Аккада бир кун бўлдим ва сўнгра яна сафаримизни давом эттиридик.

Биз Ҳайфо⁷⁵ деган қишлоққа бордик. Бу қишлоққа кела-келгунча йўлда қум кўп эди. Бунақа қумни Эронда заргарлар ишлатишади ва уни «мекки қуми» деб аташади. Ҳайфо қишлоғи денгиз соҳилида жойлашган бўлиб, хурмозор ва дараҳтзорлар бисёрдир. Қишлоқда кема ясовчи усталар яшаркан. Денгизда сузадиган кемаларни бу ерда «жуди» дейишади.

Биз у ердан чиқиб, бир фарсанг нарида жойлашган Кунайса қишлоғига келдик. Бу ерда йўл денгиздан узоқ-

лашиб, машриқ томондаги тоққа қараб көтади. Йўл тошлок даштдан ўтади, у ерларни «Тимсоҳлар водийси» деб аташаркан. Икки фарсангдан сўнг йўл яна денгиз бўйига чиқади. Биз бу ерда денгиз ҳайвонларининг жуда кўп устухонларини кўрдик. Бу ҳайвонот қолдиқлари тупроқ ва лойга кўшилиб, доимий тўлқинлар таъсирида тошга ўхшаб қолган эди.

Сўнгра Қайсария шахрига бордик. Аккадан Қайсариягача етти фарсангдир. Оқар сувлар, хурмозорлар, норинж ва турунж дараҳтларига бой, кўркам шаҳар экан. Темир дарвозалари, мустаҳкам девори бор. Жоме масжиди чиройли қилиб курилган. Масжид ҳовлисида турган ҳолда денгиз манзарасини томоша қилиб лаззатлашиш мумкин. Бу ерда бир мармар хум бўлиб, хитой чиннисидек нозик қилиб ишланган ва унга юз ман сув сифади.

Шаъбон ойининг охирида, шанба куни биз у ердан жўнаб кетдик. Қарийб бир фарсанг «мекки қуми» устидан юрдик, сўнгра яна анжирзор ва зайдунзорларни кўрдик. Йўл гоҳ дашт, гоҳ тор ёнбағридан ўтарди. Бир неча фарсанг йўл босиб, Кафарсалом деган шаҳарга етиб келдик. Бу шаҳардан Рамлагача уч фарсанг бўлиб, йўл атрофи дараҳтзордир.

Рамазон ойи бошида якшанба куни Рамлага етиб келдик. Қайсариядан бу ергача саккиз фарсангдир. Шаҳар катта, дарвозаси баланд ва мустаҳкам, деворлари тошдан қурилган экан. Шаҳардан денгиз сохилигача уч фарсанг. Аҳоли ёмғир сувини истеъмол қиласди. Ҳар бир ҳовлида ҳовуз бўлиб, унга ёмғир сувини тўплаб, захира қилиб қўйишади. Жоме масжиди ҳовлисида ҳам катта ҳовузлар бор. Улар сувга тўлганида, хоҳлаган одам сув олиши мумкин. Масжид майдони уч юзга икки юз қадам экан. Супасида ёзув бўлиб, унда тўрт юз йигирма бешинчи йил, ўн бешинчи муҳаррамда (1033 йил, 11 деқабр) бу ерда кучли зилзила бўлиб, кўп бинолар вайрон бўлгани-ю, аммо одамларга зиён-заҳмат етмагани қайд этилган.

Бу шаҳарда мармар жуда кўп экан. Саройлар ва кўпчилик одамларнинг уйлари мармар билан зийнатланган ва унга нақшлар чизилган. Мармарни тиҳсиз арра билан кесадилар ва бунда мекки қумини ишлатишади. Бу ерда мармарнинг хилма-хил турини — ола-була, яшил, қизил, қора, оқ ва ҳар хил ранглиларини кўрдим.

Бир нав анжири бўлиб, бундан яхшироғи ҳеч қаерда бўлмайди ва уни барча атроф шаҳарларга элтишади. Рамла шаҳрини Шом вилоятида ва мағрибда «Фаластин» деб аташади. Учинчи рамазонда биз Рамладан чиқиб, Хотун қишлоғига, ундан эса Қаријтулинааб қишлоғига бордик. Йўлда пасту баланд ерларда ёввойи ҳолда судоб⁷⁶ ўсиб ётарди. Қишлоқда бир қоя остида ширин сувли булоқни кўрдик, ёнида иморатлар қуриб, охурлар килишган эди. У ердан чиқиб, теналикка ўрлай бошладик. Назаримда, тоғдан ошиб, нариги тарафга тушсак, шахар кўринадигандек эди. Аммо биз бир оз тепалаганимиздан кейин кўз олдимизда баъзи жойлари қумлоқ, қолгани тошлоқ улкан водий пайдо бўлди. Тоғ тепасида Байтулмақдис⁷⁷ шаҳри жойлашган. Соҳилдаги Тароблисдан Байтулмақдисгача эллик олти фарсанг, Балхдан бу ергача эса саккиз юз етмиш олти фарсангдир.

Байтулмақдис таърифи

Тўрт юз ўттиз саккизинчи йил рамазон ойининг бешинчи куни (1046 йил, 16 март) биз Байтулмақдисга кириб келдик. Уйдан чиққанимиздан бери бир шамсий йил ўтган, биз мудом сафарда бўлиб, бирон жойда дурустроқ ором ҳам олмаган эдик. Бу ерликлар ва Шом аҳолиси Байтулмақдисни «Кудс» деб аташади. Агар вилоят аҳлидан кимки ҳажга боролмаса, ўша мавсумда Кудсга бориб мақом тутади ва, одат қилинганидек, Курбон байрамини ўtkазади. Баъзи йиллари зулҳижжа ойининг бошларида бу ерга йигирма мингдан ортиқ одам йифида. Одамлар болаларини ҳам олиб келиб, шу ерда суннат қилищади. Рум диёри ва бошқа ўлкалардан бу ердаги калисо ғаутишт⁷⁸ зиёрати учун кўплаб тарсо ва жуҳудлар келишади. Катта калисонинг таърифини кейинроқ ўз жойида келтирамиз.

Байтулмақдис чеккаси ва атрофлари тоғлиқдир. Бор ерлари экинзор, зайдунзор, анжирзор ва хоказолардан иборат. Сув йўқ, аммо ноз-неъматлар мўл-кўл ва арzonдир. Шундай одамлар борки, маҳсус қудукларни эллик мандан зиёдроқ зайдун мойига тўлатишади; улар бу мойни оламнинг турли жойларига элтишади. Айтишларича, Шом заминида ҳеч қаҳатчилик бўлмаган. Сўзи шоёни бовар бўлган одамлардан шуни эшитдимки, бир улуғ зот Пайғамбар алайҳиссалоту вас-саломни тушида кўриб,

дебди: «Ё Расулулло: турмушимизни фаровон қилгин!» Пайғамбар алайҳиссалом унга жавоб тариқасида дебдилар: «Шомнинг иону зайдунинг мен кафил бўлурман».

Энди Байтулмақдис шаҳрининг таърифини баён қила-ман. Шаҳар тоғ тепасида жойлашган. Ёмғир сувини ҳисобга олмаса, бошқа сув йўқ. Атроф қишлоқларда бу-лоқ ва жилгалар бор-у, шаҳарда учрамайди. Тошлок ерда бино бўлган бу катта шаҳар, биз бўлган пайтимида йигирма минг эркак аҳолига эга эди. Яхши бозорлари, гўзал бинолари бор. Бутун шаҳар заминига юзаси силлиқ тош бўлаклари ётқизилган. Қаердаки тоғлик ёки баландлик бўлса, тошни ўйиб текислаганлар, шу сабабли ёмғир ёққанида кўчалар покиза ювилади. Шаҳарда хунар-мандлар жуда кўп ва уларнинг ҳар гурухи ўзининг ало-ҳида растасига эга. Жоме масжиди шарқ тарафда. Ша-ҳарнинг шарқий девори айни пайтда масжид девори ҳам-дир. Масжид орқасига ўтсангиз, Соҳира номли кенг ва текис дашт кўринади ва қиёмат жойи шу ер бўлади, дейишади. Шу сабабли оламнинг турли бурчакларидан бу ерга минглаб одамлар келиб мақом тутишади. Шу шаҳарда вафот этиб, Ҳақ субҳонаҳу ва таоло иродаси билан қиёмат қуни етганида миодгоҳда ҳозир бўлишини орзу қилишади.

Худойим, ўша қуни бандаларингга шафқат қил! Уларни афв этгин, омин, ё Роббал-оламийн.

Дашт чеккасида улкан мақбара бўлиб, унда кўплаб азиз-авлиёлар дағн этилган. Одамлар бу ерда намоз ўқиб, Оллоҳга илтижо этишади ва Ҳақ субҳонаҳу таоло уларнинг ҳожатларни раво қилади.

Худойим, илтижоларимизни қабул эт! Гуноҳ ва камчиликларимизни ўз раҳматинг юзасидан кечиргин, меҳрибон Парвардигор!

Масжид билан Соҳира дашти ўртасида жуда чуқур бир водий бор. Хандакқа ўхшаган бу водийда қадимги замонларда курилган улкан иморатлар бўлиб, бир уй тепасида яхлит тошни ўйиб ясалган гумбазни кўрдим. Уни жойидан қандай кўзғатиб кўтарганларини тасаввур қилмоқнинг ўзи мушкул. Овозаларга қараганда, бу уй Фиръяннинг уйи ва водий жаҳаннам водийси экан. «Бу мавзеъга бунақа номни ким қўйган?» деб сўраганимда, менга: «Бир пайтлар халифа Умар ибн Хаттоб⁷⁹ розий аллоҳу анҳу Соҳира даштида лашкаргоҳ курган ва водий томонга назар ташлаб: «Бу жаҳаннам водийсидир, де-

ган», деб жавоб беришди. Авом халқ яна шундай дейди: «Агар кимки бу водий адогига борса, дўзахда ётганлар овозини эшитади, чунки дўзахдагилар фарёди бу ерга етиб келади». Мен ўша жойга бориб кўрдим, лекин ҳеч нарса эшитмадим.

Агар шаҳардан жанубга томон ярим фарсанг юриб, нишабликдан пастга тушилса, катта тош тагида Айни Салвон деган булоқ бор. Булоқ ёнида иморатлар кўп, унинг суви қишлоққа оқиб боради ва бу ерда ҳам иморатлар куриб, боғу бўстонлар барпо этишган. Айтишларича, кимки бу сувга боши ва танини ювса, турли дардлар ва сурункали касалликлардан халос бўларкан. Бу чашма учун вакфлар ажратилган. Байтулмақдисда яхши бир шифохона бўлиб, унинг жуда кўп вакфлари бор. Шифохонада одамларга дори ва малҳамлар беришади ҳамда вақф ҳисобидан мояна оладиган табиблар бор.

Шарқий девор жанубда бурчак ҳосил қилган жойда (қибла ҳам жануб тарафда), шимолий девор қаршисида еости масжиди жойлашган. Унга зинадан тушилади. Майдони йигирмага ўн беш газ, томи тошдан ва сутунлари мармар. Исо алайхиссаломнинг бешиги шу ерда сақланади. Бешик тошдан ясалган бўлиб, шу қадар каттаки, одамлар устига чиқиб намоз ўқишади. Факир ҳам унда намоз ўқидим. Уни ерга пайвандлаб қўйишган, шу сабабли тебранмайди. Бу ўша Исо (а.с.) болалигида ётган ва одамлар билан сўзлашган бешикдир. Бешик бу масжидга меҳроб ўрнида қўйилган. Масжиднинг шарқ томонида Биби Марям меҳроби, унга яқинроқда Закариё алайхиссалом меҳроби бор. Бу меҳробларга Закариё ва Марям ҳақидаги Куръон оятлари битилган. Айтишларича, Исо алайхиссалом ушбу масжидда туғилган. Сутунлардан бирида, гўёқи кимдир уни ушлагандек, икки бармоқ изи бор. Айтишларича, Марям тўлғоқ тутганда шу сутунни чангллаган экан. Бу масжид «Исо алайхиссалом бешиги» номи билан машҳурдир. Шифтига жуда кўп жез ва нукрадан ясалган қандиллар осиғлик ва ҳар кеча ёниб туради.

Байтулмақдисдан сўнг мен Иброҳим Халил ар-Рахмон алайхиссаловоту вассалом мозорини зиёрат қилишга азм этдим. Тўрт юз ўттиз саккизинчи йил зулқаъда ойи бошида, чоршанба куни (1047 йил 29 апрел) мен у ерга жўнадим. Байтулмақдисдан ушбу машҳад жойлашган ергача олти фарсангdir. Йўл жанубга караб кетади ва боғ-

роғларга бурканган қишлоқлардан ўтади. Кўп сув талаб этмайдиган узум ва зайдун, ёввойи ҳолда ўсиб ётган сумоқнинг⁸⁰ охири кўринмасди. Шаҳардан икки фарсанг масофада Чахордех қишлоғи жойлашган. Булоқ бўлгани учун бофу бўстонлар кўп. Гўзаллиги учун бу мавзесъни «Фародис» деб ҳам аташади.

Байтулмақдисдан бир фарсанг масофада тарсолар жуда азиз тутадиган бир жой бор. Бу ерда бир гурух мужовирлар⁸¹ бўлиб, зиёратчилар ҳам жуда кўп келишади. Мавзез «Байтуллаҳм» деб аталади. Тарсолар бу ерда курбонлик қилишади ва Румдан ҳам жуда кўп одам келади. Байтулмақдисни тарқ этган куним мен ўша ерда тунадим.

Халил салавотуллоҳу алайҳ машҳадининг таърифи

Шом ва Байтулмақдис аҳолиси бу машҳадни «Халил» деб аташади ва қишлоқ номини айтишмайди. Қишлоқнинг асл номи «Матлун» ва у бошқа кўплаб қишлоқлар қатори ушбу машҳаднинг вакфидир. Қоя остида кам сувли булоқ бор. Унинг ёнидан ариқ қазилиб, қишлоққа яқинлаштирилган. Булоқ суви исроф бўлмасдан, қишлоқ аҳолиси ва зиёратчилар эҳтиёжи учун етсин, деб қишлоқ чеккасида сув тўпланадиган усти ёпик ҳовуз қилинган. Машҳад қишлоқнинг жануби-шарқий чеккасидадир. У йўнилган тошдан тикланган тўрт девордан иборат. Узунлиги саксон, эни қирқ, баландлиги йигирма аршидир. Тепада деворнинг қалинлиги икки аршидир. Иморат ичида чиройли меҳроблар бор. Мақсурада икки гўр бўлиб, бошлари қибла тарафдадир. Ҳар иккала гўрга тарошланган тошлар териб, одам бўйидан юқори қилинган. Ўнг томондагиси Исҳоқ ибн Иброҳим алайҳимуссалом ва униси унинг хотини қабридир. Қабрлар оралиғи ўн аршидир. Бу машҳад замини ва деворларига қиммат баҳо гиламлар ва ишакдан ҳам чиройли мағрибий бўйралар тўшалган ва осилган. Мен бу ерда Миср сultonи саркардаси тортиқ килган тўқима жойнамозни кўрдим. Айтишларича, бу жойнамозни Мисрда ўттиз мағрибий олтин динорга харид қилишибди; шу миқдордаги рум ишагининг баҳоси бунча бўлмасди. Бунга ўхшаш жойнамозни мен ҳеч қаерда кўрмаганман. Мақсурадан чиккан жойда — машҳад ўртасида қиблага қараган икки уй бор. Ўнг томондагисида Иброҳим Халил салавотуллоҳи алайҳ-

нинг қабри жойлашган. Бу уй катта бўлиб, ичида яна бошқа бир уй бор, аммо унинг ичига кириб бўлмайди. Унинг тўрт деразаси бўлиб, зиёратчилар уй атрофида айланиб, қабрга деразалардан қарашади. Уйнинг замини ва деворларига ипак гиламлар қопланган. Тош қабр уч газ баландликда бўлиб, тепасига кўплаб кумуш қандил ва шамдонлар осиғелик. Қиблага нисбатан чап тарафдаги бошқа уйда Иброҳим алайҳиссаломнинг аёли Соранинг қабри бор. Икки уй ўртасида даҳлизга ўхшаган йўлак бўлиб, ҳар иккала уй эшиги шу тарафга қараган. Бу ерда ҳам қандилу шамдонлар кўпидир. Бу икки уйдан ўтгач, бир-бирига яқин жойлашган яна икки гўр бор. Ўнг томондагиси Ёқуб алайҳиссалом, сўлдагиси унинг аёли қабридир. Улардан нарида Иброҳим алайҳиссаломнинг меҳмонхонаси бўлган уй. Шундай қилиб, бу машҳаддан олтига қабр жой олган.

Тўрт девор ташқарисида нишаблик бўлиб, унда Юсуф ибни Ёқуб алайҳимуссалом қабри бор. Тош қабр устига чиройли гумбаз қилишибди. Юсуф гумбази ва машҳад ўртасида катта қабристон бўлиб, жуда кўп жойлардан марҳумларни келтириб, бу ерда дағи қилишади. Машҳаддаги мақсурा томида бу ерга келувчи меҳмонлар учун хужралар курилган. Машҳаднинг вақфи жуда кўп: қатор кишлоқлар, Байтулмақдисдаги қўпгина экинзор ерлар унга қарашлидир. Бу ерда буғдой кам ва кўпроқ арпа экишади. Зайтун ҳам кўп бўлади. Меҳмон, мусоғир ва зиёратчиларни нон ва зайтун билан сийлашади. Бу ерда хачир ва ҳўқиз қўшилган тегирмонлар кўп бўлиб, ҳар куни ун қилишади. Чўрилар ҳар куни нон ёпишади ва ҳар бир ноннинг оғирлиги бир мандир. Мусоғир келса, унга кунига битта нон ва зайтун ёғида пиширилган бир коса ясмик беришади. Шунингдек, майиз ҳам беришади. Бу одат халилурраҳмон алайҳиссалом замонасидан то шу кунларгача бир қоида бўлиб қолган. Баъзи кунлари бу ерга беш юздан ортиқ одам келади ва ҳаммалари учун ушбу зиёфат ҳозирланади.

Айтишларича, оддин машҳадга эшик қилинмаган ва ичкарига кирмасдан, ташқаридаги айвонда туриб зиёрат қилишган. Махди⁸² Миср таҳтига чиққанида, эшик қилишни буюрган ва иморатлар қурдириб, уларга асбобанжомлар қўйдириб, гиламлар тўшаттирган. Машҳад эшиги шимолий девор ўртасидадир. Ердан тўрт газ баландликда бўлиб, икки томонига тош зинаноялар қилин-

ган: бир томондан кўтарилиб, иккинчи томондан тушилади. Кириш жойида кичик темир эшик ўрнатилган.

Шундан сўнг мен Байтулмақдисга қайтдим ва у ердан пиёда Ҳижоз^{82а} сафарига чиккан бир гурух одамларга ҳамроҳ бўлдим. Йўлбошловчимиз Абубакр Ҳамадоний деган киши пиёда тез юрадиган, чаққон ва зийрак одам эди. Тўрт юз ўттиз саккизинчи йил зулқаъда ойининг ўртасида (1047 йил, май) Байтулмақдисдан чиқдик ва уч кундан сўнг Аръаз деган жойга келдик. Бу ерда оқар сув ва дараҳтзорлар кўп эди. Сўнгра Водиъил Қурро деган бошқа бир манзилга бордик. Йўлдаги яна бир манзилдан сўнг ўн кун йўл босиб, Маккага етиб бордик. Бу йил хеч қаердан карвон келмагани сабабли озуқа тақчил эди. Мен Бобун Набий⁸³ алайҳиссалом қаршисидаги атторлар маҳалласида турдим. Душанба куни Арафотга⁸⁴ бордик. Халқ бадавийлар босқин ясашидан қаттиқ ҳавфсиради. Арафотдан яна Байтулмақдис томон қайтдим. Тўрт юз ўттизинчи қамарий йилнинг бешинчи муҳаррамида (1047 йил, июл) мен Қудсга етиб келдим. Макка ва ҳаж қилганим тўғрисида ҳозир сўзлаб ўтирумайман. Чунки, охирги марта ҳажга борганимни сўнгроқ батафсил баён қиласман.

Байтулмақдисда тарсоларнинг Байъатулқўмома деган калисоси бўлиб, уни жуда азиз тутишади. Ҳар йили Румдан жуда кўп халқ зиёратга келади. Ҳатто Рум маликининг ўзи бирор таниб қолмаслиги, учун бу ерга яширинча келган. Ўша Рум қайсари келган йили Миср азизи ал-Ҳоким биамруллоҳ бўлган. Ҳоким Рум қайсарининг келганидан воқиф бўлгач, ўзининг бир жиловдорини Байтулмақдисга жўнатиб, шундай тоширик берган: «Байтулмақдис ибодатхонасидаги зиёратчилар орасида бир одам бўлиб, унинг кийимлари ва қиёфасини сенга уқтираман. Сен бориб унга: «Мени Ҳоким сенинг ҳузурингга узатди», дегин ва менинг ушбу сўзларимни етказ: «Эй Рум қайсари! Сен яна, Ҳоким менинг келганимдан бехабар, деб ўйламагин. Аммо хотиржам бўл, сенга бирон ёмонлик қилмайман».

Ўша Ҳокимнинг ўзи ушбу калисони талаб вайрон килишни буюрган. У бир неча йил хароб ҳолда ётган. Сўнгра қайсар элчилар орқали беҳисоб совфа-саломлар узатиб, сулҳ истади ва калисони қайта тиклаш учун ижозат сўради. Шундан сўнг уни қайта қурдилар. Калисо биноси катта бўлиб, саккиз минг одам сиғади. У

тасвир ва нақшлар чизилган мармарлардан жуда зийнатли қилиб қурилган. Ичкариси Рум ипаги билан безалиб, деворларга тасвиirlар чизилган ва зару тилла кўн ишлатилган. Исо алайҳиссаломниң эшак миниб турган сурати бир неча жойга ишланган. Бошқа анбиёлар: Иброҳим, Исмоил, Исҳоқ, Ёқуб алайхимуссалом ва унинг фарзандлари суратлари ҳам бор. Суратларга сандал мойи суреб, гарду губор кўнмаслиги учун ҳар бир сурат андозасида юпқа ойна ясатиб, улар юзасига қоплашган. Ойна шу қадар шаффофки, суратлар ҳеч хиралашмаган. Ходимлар ҳар куни ойналарни тозалашади. Ва яна бир қанча суратлар борки, уларнинг ҳам таърифини келтирсак, ҳикоямиз жуда чўзилиб кетади. Бу калисадаги суратлардан бири икки қисмдан иборат бўлиб, унда жаннат ва дўзах манзараси тасвирланган. Бир қисмида жаннат ва унга алокадор нарсалар, иккинчи қисмида дўзах ва унга таалуқли нарсалар тасвири бор. Хуллас, бу калисо шундай жойки, унга ўхшashi бўлмаса керак. Калисада руҳоний ва роҳиблар жуда кўп бўлиб, улар Ижил ўқишади ва кечаю кундуз ибодат қилишади.

Танис шаҳри таърифи

Байтулмақдисдан сўнг мен денгиз йўли орқали кемада Мисрга етиб олиб, у ердан яна Маккага бормоқчи бўлдим. Аммо денгизда қарши шамол эсар, кемалар сузмоғи душвор эди. Шунда мен қуруқликдаги йўлдан юрдим ва Рамладан ўтиб, Асқулон⁸⁵ деган шаҳарга келдим. Яхши бозори ва чиройли масжиди бор эди. Қадимий бир тоқини кўрдим, ўтмишдаги ибодатхона қолдиги экан. Тошдан қурилган бу тоқи шу қадар улканки, агар бирор уни йиқитмоққа қасд қилса, бу иш учун фоят катта сарфаражат қилмоғи муқаррар эди. У ердан чиққач, мен йўл бўйлаб кўплаб қишлоқ ва шаҳарларни кўрдим, лекин ҳикоямиз чўзилиб кетмаслиги учун уларнинг таърифини бу ерда келтирмадим. Тайва деб аталувчи бир жойга келдим ва бу ер Танисга борадиган кемалар учун бандар экан. Кемага тушиб, Танисга жўнадим. Танис оролда жойлашган чиройли шаҳардир. Қуруқликдан шунчалик узоқдаки, ҳатто шаҳардаги уйлар томидан ҳам соҳил кўринмайди. Шаҳар гавжум, яхши бозорлари ва иккита масжиди бор. Менинг ҳисобимда шаҳарда ўн мингга яқин дўкон бўлиб, шундан юзтаси атторлик дўкони

эди. Ёзда бозорларда қуртава (курт) сотишади. Шаҳар иссиқ минтақада жойлашгани учун турли касалликлар кўп учрайди. Салла, аёллар либоси учун қасаб (рангин мато) тўқишиади. Рангин қасаб Танисдан бошқа хеч жойда тўқилмайди. Дамиётда оқ рангли қасаб тўқишиади. Султонга қарашли корхоналарда тўқилган матоларни хеч кимга сотишмайди ва ҳадя ҳам килишмайди. Эшитишимча, Форс малики ўзига бир кийимлик мато сотиб олиш учун йигирма минг динор билан Танисга одамларини узатиби. Улар бир неча йилни бу ерда ўтказиб ҳам мато сотиб олишолмабди.

Бу ерда маҳсус кийимликлар тўқийидиган моҳир тўқувчилар бор. Эшитишимча, Миср султони ўзига салла тўқиган тўқувчига беш юз мағриби олтин динор беришини буюрибди. Мен бу саллани кўрдим ва, айтишларича, унинг баҳоси тўрт минг мағриби динор экан.

Танис шаҳрида буқаламун деган мато тўқишиади ва бутун оламда бунга ўхшали бошқа хеч ерда йўқ. Бу заррин мато бўлиб, куннинг ҳар вактида рангини ўзгартириб жилоланади. Бу матони Танисдан мағриб ва машрикка элтишиади. Эшитишимча, Рум кайсари Миср султонига вакил узатиб, Рум вилоятларидағи юзта шаҳарни олиб, эвазига Танисни унга беришини сўрабди. Миср султони бунга рози бўлмабди. Рум кайсарининг бу таклифдан кўзда туттган мақсади қасаб ва буқаламун тўқиладиган шаҳарни қўлга киритиб олиш эди.

Нил суви кўпайганда дарё суви Танис атрофидаги шўр денгиз сувини нари ҳайдайди ва шаҳардан ўн фарсанг масофагача денгиз суви чучуклашади. Пайтдан фойдаланиб қолиш учун орол ва шаҳарда улкан ва мустаҳкам ер ости сув омборлари бунёд этилган. Аҳоли уларни «масонеъ» деб атайди. Нил суви кўпайиб, шўр ва тахир сувни бу атрофдан суриб чиқаргач, сув омборларини тўлдиришиади. Бу иш қўйидагича амалга оширилади: сув йўлини очишиади ва денгиз суви ҳавзалар ва сув омборларига оқиб киради. Шаҳарнинг бор суви ана шу Нил суви кўпайганда тўлдириб олинадиган сув омборларидандир. То келаси йилгача шу сувни истеъмол қилишади. Кимки ошиқча сув ғамлаб олган бўлса, бошқаларга сотади. Вақф сув омборлари ҳам бўлиб, фарибу гуробаларни таъминлайди. Танис шаҳрининг эллик минг эркак аҳолиси бор ва шаҳар атрофида доимо савдогарлар ва султонга қарашли мингдан ортиқ кема боғлоғлик туради.

Бу шаҳарда ҳаёт кечириш учун зарур нарсалар бўлмагани учун ҳамма нарса олиб келиниши шарт. Бу ер орол бўлганидан борди-келди факат кемалар орқали қилинади. Фаранг ёки Румдан оролга ҳужум қилишлари эҳтимоли бўлиб, эҳтиёт юзасидан бу ерда доимий равища яхши куролланган бутун бир лашкар туради.

Айтишларича, Миср султони хазинасига бу ердан ҳар куни бир минг мағрибий динор тушаркан. Бу маблағ муайян бир кунда берилади. Шаҳар аҳолиси соликни тайинланган кунда солик йиғувчи кишига беришади, у эса хазинага олиб бориб топширади. Ҳеч ким тўлашдан бош тортмайди ёки бирордан зўрлик билан ҳам олишмайди. Султон учун тўқиладиган қасаб ва буқаламун баҳоси хазинадан тўла берилади. Шу сабабли одамлар султон учун иштиёқ билан ишлашади. Бошқа вилоятлардагига ўхшаб хунармандлар девон ва султон томонидан қаттиқ сиқув қилинмайди. Султон учун маҳсус тайёрланадиган түя ва от ёпинчиқлари ҳам буқаламундан қилинади. Озиқ-овқат ва меваларни Миср қишлоқларидан келтиришади. Бу ерда темир асбоблар, чунончи қайчи, пичоқ ва ҳоказо ҳам ясашади. Мисрга олиб борилган бир қайчини кўрдим: унга беш мағрибий динор сўрашарди. Шунаقا қайчи эдики, михини суғурса, очилар, қайта киритганда, кесар эди. Йилнинг маълум пайтида бу ерлик аёллар қуёнчик касалига ўхшаш бир касаллик билан оғришади. Икки-уч бор нола қилиб, яна ҳушларига келишади. Хуросонда «аёллари мушукка ўхшаб миёвлайдиган орол» хақида эшитган эдим. Бу гаплар ва менинг айтганларим ўртасида боғлиқлик бўлса керак.

Танисдан Кустантаниягача кема йигирма кунда боради. Биз Миср томонга равон бўлдик. Денгизнинг Нил дарёси куйиладиган соҳилига яқинлашгач, кемамиз дарё бўйлаб кўтарила бошлади. Нил дengизга яқинлашганда шоҳобчаларга бўлинниб, турли жойда куйилади. Биз кемада сузуб кирган шоҳобча «Румаш» деб аталарди. Яна сузуб, Солиҳия деган шаҳарга келдик. Ноз-неъмат ва озиқ-овқат мўл-кўл бўлган бир жой экан. Бу ерда кўплаб кемалар куришади ва ҳар бирига икки юз харвор мол юклашади. Мисрга мол элтган кемалар бакқоллик дўконлари олдигача боради. Чунки, кўчалар ғоят гавжум бўлганидан шаҳар эҳтиёжи учун зарур озукани түя ва отларда ташиш қийин. Биз Солиҳияда кемадан тушдик ва шу кечаси ушбу шаҳарда бўлдик. Тўрт юз ўттиз тўққизинчи

йил сафар ойининг еттисида, якшанба куни, эски тақвим бўйича эса шахривар ойида (1047 йил, 4 август) биз Коҳираға кириб келдик.

Миср мамлакати таърифи

Нил суви жануби-ғарб тарафдан оқиб келади ва Мисрдан ўтиб, Рум денгизига қуйилади. Нил дарёси суви кўпайганда Термиз ёнидаги Жайхунга икки баробар келади. Унинг суви Мисрга Нува вилоятидан⁸⁶ оқиб келади. Нува вилояти тоғлиқлардан иборат, текислик бошланган жойдан Миср вилоятидир. Нил суви дастлаб етиб келадиган шаҳар чегарадаги Ассувондир⁸⁷. Унгача уч юз фарсанг масофа бор. Дарё бўйида кета-кетгунча шаҳару қишлоқлар жойлашган, ушбу вилоятни «Сайдулаъло» деб аташади.

Кемалар то Ассувонгача қатнайди, ундан нарига ўтолмайди, чунки сув тор даралардан чиқиб, жуда тез оқади. Ундан юқорида, жануб тарафда Нува вилояти бўлиб, у жойнинг ўз подшоҳи бор. Одамлари қора танли, насроний динидадирлар. Савдогарлар у мамлакатга ойна, тароқ ва маржон элтишади ва у ердан қуллар келтиришади. Мисрда қуллар ё нубалик, ё румлик бўлади, Нувардан келтирилган буғдой ва тарикни кўрдим, униси ҳам, буниси ҳам қора тусда эди.

Айтишларича, Нил дарёси бошланадиган жойни ҳеч қачон аниқ билишолмаган. Эшитишимча, Миср сultonи у ерга маҳсус одамлар жўнатган, улар Нил қирғоғи бўйлаб роса бир йил юриб текшириш ўтказишган, лекин ҳақиқий ҳолни тўла аниқлаш ҳеч кимга мұяссар бўлмаган. «Нил дарёси жанубдаги Жабалулқамар⁸⁸ деган тоғдан бошланади», дейиш билан чекланишган. Қўёш сараторн буржига кирганда Нил суви кўпая бошлайди ва қиши фаслидаги сатҳига нисбатан йигирма арш кўтарилади. Сув тадрижий равишда кунба-кун кўпайиб боради. Миср шаҳрида⁸⁹ сувнинг кўпайиш суръатини аниқлайдиган асбоблар қурилган ва маҳсус белгилар қўйилган. Минг динор маош оладиган маҳсус амалдор бўлиб, у сувнинг қай даража кўпайишини кузатиб боради. Сув кўпайишга бошлаганда у шаҳарга жарчилар узатади ва улар аҳолига маълум қилишади: «Бугун Оллоҳ субҳонаҳу ва таоло Нил сувини мана бунча миқдорда кўпайтирди». Дарё суви ҳар куни бир қаричдан ошиқроқ кўпаяди ва бир

газ кўтарилигандан ҳамма ёкка хушхабарлар тарқалиб, шодланишиди. Бу ҳол сув то ўн саккиз арш кўтарилигунча давом этади ва ўн саккиз арш етарли ҳисобланади. Яъни, ҳар вақт сув бундан кам бўлганида, «тошқин яхши бўлмади», деб садақалар беришади ва назр-ниёзлар қилишади. Одамлар андухга ботиб, ғам чекишади. Сув бу микдордан ошганда шодлигу хурсандчилик қилишади. Агар сув ўн саккиз аршга кўтарилимаса, султон раиятга солик солмайди.

Нилдан ҳар томонга қаратса кўпдан-кўп анҳорлар қазилган. Анҳорлар бўйидан катта-кичик ариқлар бошлиниб, дарё сувини қишлоқ ва вилоятларга элтади. Ариқлар бўйига чигирлар ўрнатилган, уларнинг сон-санофи йўқ. Миср вилоятидаги барча қишлоқлар баландлик ва дўнгликларда жойлашган. Чунки, Нил тошганда бутун вилоят сув тагида қолади ва қишлоқлар сувга фарқ бўлмаслиги учун уларни тепаликларда куришган. Бу пайтда қишлоқдан қишлоққа қайиқларда боришади. Миср вилоятининг у чеккасидан бу чеккасигача Нил бўйлаб тупроқ кўтарма қилинган ва тошқин вақтида одамлар унинг устидан юришади. Ушбу иншоотни таъминлаб туриш учун ишончли бир амалдорга ҳар йили султон хазинасидан ўн минг мағриби динор ажратилади.

Вилоят аҳолиси ерлари сув тагида қоладиган тўрт ой муддатга етадиган барча зарур нарсаларни ғамлаб олишади. Қишлоқларда одамлар тўрт ойга етадиган нон ёпиб, мөғорламаслиги учун котириб қўйишади.

Дарё тошқини қўйидагича бўлади: биринчи кундан бошлаб то қирқинчи кунгача сув муттасил кўпаяди. Ўн саккиз арш кўтарилигач, яна қирқ кун барқарор туради: на кўпаяди ва на камаяди. Сўнгра яна тадрижий равишда камая бошлайди ва боз қирқ кундан кейин қиши фаслидаги сатҳига бориб қолади. Сув камайишга бошлаганда одамлар изма-из боришади ва қаердаки ер қуриса, ўзлари хоҳлаган экинни экишади. Ёзги ва қишки экинлар барчаси сувдан бўшаган ерга экилади ва бошқа сугоришга эҳтиёж йўқ.

Миср шаҳри Нил ва денгиз ўртасида жойлашган. Нил жанубдан келади ва шимол тарафга оқиб, денгизга бориб қуйилади. Мисрдан Искандариягача⁹⁰ ўттиз фарсанг деб ҳисоблашади. Искандария ҳам Рум денгизи⁹¹ ва ҳам Нил дарёси соҳилида жойлашган. Ва у ердан кемаларда Мисрга жуда кўп мева келтиришади. Искандария-

да маёқ бўлиб, мен кўрганимда бус-бутун эди. Маёқ тепасига ёндирувчи ойна ўрнатилган. Агар Истанбулдан келган рум кемалари унинг таъсири доирасига етса, ойнадан кемага ўт тушиб ёниб кетади. Румликлар бундан кутилиш учун фоят жидди-жаҳд қилдилар, турли ҳийлалар ўйлаб топдилар ва ниҳоят одам жўнатиб, бу ойнани синдирилар. Ҳоким биамрulloҳ⁹² Миср султони бўлганида бир одам унинг олдига келиб, агар ижозат берса, ойнани созлаб, аввалги ҳолига келтиришини айтган. «Эндиликда бунга хожат йўқ, — дебди Ҳоким, — румликлар бизга ҳар йили зар ва мол узатишади, лашкаримиз уларнинг сарҳадига кирса ҳам, қаршилик қилишмайди, хуллас, вазият аъло даражада».

Искандарияда ёмғир сувини истеъмол қилишади. Шаҳар атрофидаги биёбонда мен олдин таърифлаганимга ўхшаш тош сутунлар сочилиб ётиби.

Денгизнинг бу қирғоғи Қайрувонгача чўзилган. Мисрдан Қайрувонгача бир юз эллик фарсангдир. Қайрувон вилоятининг энг йирик шаҳари Силжимоса бўлиб, у денгиздан тўрт фарсанг масофада жойлашган. Водийда қурилган мустаҳкам кўрғонли катта шаҳардир. Унинг ёнида Маҳдия жойлашган. Бу шаҳарга амир ал-мўъминин Ҳусайн ибни Али розийаллоҳу таоло анхумонинг фарзандларидан бири бўлмиш Маҳди Мағриб ва Андалусни фатҳ қилганида асос соглан. Ушбу даврда Қайрувон Миср султони қўл остида эди. У ерда қор ёғади-ю, лекин узок турмайди. Андалусдан бошлаб денгиз соҳили ўнг тарафга — шимолга қараб бурилади. Миср ва Андалус ораси минг фарсанг бўлиб, бу оралиқдаги барча вилоятлар мусулмонободдир. Андалус тоғликлардан иборат катта вилоят. Бу ерда қор ёғади ва сув музлайди. Одамлари оқ танли ва малласоч бўлиб, кўзлари худди сақлоблар (славянлар)никидек мушукнинг кўзига ўхшайди. Андалус Рум денгизнинг чеккасида, шунинг учун у ерликларга денгиз шарқ тарафдадир. Агар Андалусдан ўнг қўл томонга — шимолга қараб муттасил денгиз соҳили бўйлаб юрилса, Румга борилади. Андалусдан Румга кўп боришади. Хоҳлаганлар Кустантанияга кемада боришилари мумкин. Ишончли одамлардан эшитишмча, денгизнинг айланаси тўрт минг фарсанг экан.

Денгиздаги ороллардан бири Сақаллия бўлиб, Мисрдан чиққан кема унга йигирма кунда етади. Ундан бошқа яна кўплаб ороллар бор. Айтишларича, Сақаллия

оролининг майдони саксонга саксон фарсанг бўлиб, у Миср сultonига қарашлидир. Ҳар йили бу ерга кема келиб, ўлпонни Мисрга олиб боради. Бу ердан таърифи оламга машҳур бир хил нафис мато олиб боришади ва унинг баҳоси Мисрда ўн мағриби динор туради.

Мисрдан машриқ сари юрилса, Қулзум денгизига⁹³ борилади. Денгиз соҳилида Қулзум шахри⁹⁴ жойлашган, Мисрдан унгача ўттиз фарсангдир. Бу денгиз оқёнуснинг бир шоҳобчаси бўлиб, Адан⁹⁵ ёнида қуруқликка ёриб кириб, шимолга қараб кетган. Қулзумга етганида, у саёзлашиб тугайди. Айтишларича, бу қўлтиқнинг эни икки юз фарсанг экан. Бу қўлтиқ ва Миср оралиғи сув ва ўсимликдан холи бўлган тоғу тош ва биёбондан иборат. Кимки Мисрдан Маккага боришни истаса, машриқ тарафга қараб юради. Қулзумга етганида, унинг олдида икки йўл пайдо бўлади: бири қуруқликдаги, иккинчиси эса сув йўлидир. Қуруқлик бўйлаб Маккага ўн беш кунда етиб олиш мумкин. Йўл мудом биёбондан ўтиб, узунлиги уч юз фарсангдир. Мисрдан келган карвонлар кўпроқ шу йўлдан юришади. Агар денгиз йўли бўйлаб юрилса, йигирма кунда Жорга етиб борилади. Жор Ҳижознинг денгиз бўйидаги кичик шаҳарчасидир. Жордан то Расул соллаллоҳу алайҳи вассаллам шахри Мадина гача уч кунлик йўлдир. Мадинадан Маккага эса юз фарсанг масофадир. Агар кимки Жордан ўтиб, яна денгиз бўйлаб юрса, Яман⁹⁶ соҳилига, ундан Адан соҳилларига боради. Агар ундан ҳам нарига қараб юраверса, Хиндистонга, шунингдек, то Хитойгача етиб бориши мумкин. Агар Адандан жанубга қараб юриб, мағриб томон бурилиб, йўлда давом этса, Зангигар ва Ҳабашистонга⁹⁷ борилади. Буларнинг шархи ўз жойида айтилгусидир.

Агар Мисрдан жанубга қараб юриб, Нубадан ўтилса, Масомуда вилоятига борилади. Ерлари унумдор бир ўлка бўлиб, чорва моллари жуда кўпидир. Одамлари қора танли, суюклари йирик ва таналари бақувват бўлади.

Миср лашкарида бу қабилага мансуб аскарлар кўп, улар хунук ва баҳайбатдирлар: уларни «масомуда» деб аташади. Улар асосан шамшир ва найзалар билан пиёда жанг қилишади, бошқа қуролларни ишлатишолмайди.

Қохира шаҳри таърифи

Шом тарафдан Мисрга келганда йўлдаги дастлабки иирик шаҳар Қохира бўлиб, Миср ундан жанубда жойлашган. Уни «Қохирай Муиззийа» деб аташади. Сабаби шундаки, амир ал-мўъминин Ҳусайн ибни Али салаватуллоҳи алайҳи авлодларидан бири бўлмиш Ал-Муиззиддиналлоҳ⁹⁸ Мағриб заминини то Андалусгача забт этгач, Миср сари лашкар жўнатибди. Лашкар Нил дарёсидан кечиб ўтмоғи лозим бўлган-у, бунга журъат қилишолмаган. Биринчидан, дарё фоят катта бўлса, иккинчидан, унда тимсоҳлар кўп, сувга тушган жонзотни дарё тубига тортиб кетади. Айтишларича, Миср шаҳри яқинидаги йўлда бир тилсим ўриатилган ва шаҳардан бир ёй ўки масофада сувга кирган одамлар ёки ҳайвонларга бирон заҳмат етмайди. Ал-Муиззиддиналлоҳ лашкарини жўнатганда, улар ҳозирги Қохира шаҳри жойлашган ерга келишибди. Амир фармон берибди: «Дарёга етганингизда бир қора ит сиздан олдин сувдан сузиб ўта бошлайди, хеч кўрқмасдан унинг изидан кечиб ўтаверинг». Лашкарда ўттиз минг отлик аскар бор экан. Чиндан ҳам қора ит лашкардан олдин сувга тушиб суза бошлабди, аскарлар унинг изидан бориб, дарёдан кечиб ўтишибди. Бирон жонзотга заҳмат етмабди. Бундан олдин Нил дарёсидан отликлар кечиб ўтгани маълум эмасдир.

Бу воқеа уч юз олтмиш учинчи йил (973 йил) бўлган эди. Султон ўзи денгиз орқали кемада келибди. Султон ва аъёнлари тушган кемалар Қохира яқинига келгач, уларни юқдан бўшатиб, кераксиз матоҳдек сувдан судраб чиқариб ташлашибди. Ушбу қисса муаллифи ўша кемаларни кўрди: еттита кема бўлиб, ҳар бирининг узунлиги бир юз эллик, эни олтмиш арш ва бу ерда турганига саксон йилдан ошибди. Ушбу ҳикоят ровийси ўша ерда бўлганида тўрт юз кирқ биринчи йил (1046 йил) эди.

Ал-Муиззиддиналлоҳ Мисрга келганида бу юртни Бағдод халифаси саркардаси идора этарди. У Муизнинг олдига келиб, унга итоат этибди. Муиз ҳозирги Қохира жойлашган ерга лашкаргоҳ қурибди. Бу жой куч билан ишғол этилгани учун лашкаргоҳ «Қохира» деб аталибди.

Муиз аскарларига Миср шаҳрига кириш ва одамларнинг уйига жойлашишни тақиқлабди. Миср даштида саройлар ва бошқа иморатлар қуришни буюрибди. Шун-

дай бир шаҳар бунёд этилганки, унга ўхшапи кам топилади. Менинг ҳисобимда Қоҳира шаҳридан султонга қарашли дўконлар йигирма мингдан кам эмас эди. Жуда кўп дўконларни ойига ўн мағриби динор ҳақ эвазига ижарага беришади, энг арзони ҳам икки динордан кам эмас. Карвонсарой, ҳаммом ва бошқа иморатларнинг саноғига етиб бўлмайди. Ҳаммаси султон мулкидир. Чунки, бирон одам ўзи курганидан бошқа иморатга эгалик қилолмайди. Эшитишимча, Қоҳира ва Мисрда султонга қарашли саккиз минг ҳовли бўлиб, уларни ижарага беришади. Истаган одам ҳовлини ижарага олиб, яна ўзи хоҳлаган пайтда қайта топширади.

Султон қасри Қоҳира шаҳри ўртасида бўлиб, унинг барча тарафи очиқ ва унга ҳеч қандай иморат тутаниманган. Муҳандислар унинг майдонини ўлчашганда Миёфо-рикин шаҳристони майдонига баробарлиги маълум бўлди. Чор тарафи яланглик бўлган қасрни тунда мингта пос-бон: беш юз отлик ва беш юз пиёда аскар қўриқлади. Номозшомдан бошлаб довул қоқиб, нофора чалишади ва тонг отгунча қаср атрофини айланишади. Агар шаҳар ташқарисидан қаралса, иморатларнинг кўплиги ва маҳо-батлиигидан султон қасри тоққа ўхшаб кўринади. Аммо шаҳар ичкарисида ҳеч-қўриб бўлмайди, чунки қаср де-вори жуда баланд. Айтишларича, бу қасрда ўн икки минг ёлланма хизматкор бор; хотинлар ва канизаклар канчалигини ким ҳам билсин? Фақат қасрда ўттиз минг одам истиқомат қилишини айтишади. Қасрда ўн иккита кўшк жойлашган. Ҳарамнинг ер устида курилган ўнта дарвозаси бор. Ер ости дарвозаларидан бошқа шу ўн дарвозанинг номланиши қуидагичадир:

Бобуззаҳаб (Олтин дарвоза), Бобулбаҳр (Денгиз дарвазаси), Бобуссириж (Чўл дарвазаси), Бобуззахума (Гўзал дарвоза), Бобуссалом (Тинчлик дарвазаси), Бобуззабаржад (Забаржад дарвоза), Бобулъийд (Ҳайит дарвазаси), Бобулфутух (Фатҳлар дарвазаси), Бобуззалоққа (Ботқоқлик дарвазаси), Бобуссурйа (Тунги дарвоза).

Ер остидан ҳам дарвоза бўлиб, султон ундан отда чиқа олади. Шаҳар ташқарисида ҳам бир қаср курилган, ер ости йўли ўшангага олиб боради. Лахм шифтини foят мустаҳкам қилганлар. Кўшк девори йўнилган тошдан шу қадар силлиқ қилиб қурилганки, гўё яхлит бир бўлак тошни тарашлаб ясагангага ўхшайди. Қаср ичкарисида миноралар, серҳашам айвонлар, аркони давлат учун

қабулхоналар бор. Хизматкорлар занжилар ва румликлардир. Вазир зухд, сидк, илм ва ақл жиҳатидан бошқалардан чанд даража устун одамдир. Бу ерда Ҳоким султонлик қилган даврда шароб ичиш ҳеч қачон расм бўлмаган. Хотинлар уйидан ташқари чиқишмаган. Шароб тайёрламасинлар, деб эҳтиёт юзасидан узумни майиз қилиш хам тақиқланган. Ҳеч ким май ичишга журъат қилолмаган. Фуқъ⁹⁹ хам ичишмаган, чунки маст киладиган ичимлик ҳисобланиб, ман қилинган.

Қохира шахрининг бешта дарвозаси бор: Бобуннаср (Зафар дарвозаси), Бобулфутух (Фатҳлар дарвозаси), Бобулқантара (Кўприк дарвозаси), Бобуззавайла (Кунботар дарвозаси), Бобулхалиж (Анҳор дарвозаси). Шаҳар атрофида девор йўқ, лекин бинолар шу қадар баландки, девордан афзал ва мустаҳкамроқдир. Ҳар сарой ва кўшк бир ҳисордир. Кўплаб бинолар беш ва олти қаватлидир.

Нил сувини ичишади ва уни мешкобчилар туяларда ташишади. Нилга яқин қудукларнинг суви яхши-ю, ундан узоқлашган сари шўрлиги ортиб боради. Айтишларича, Миср ва Қохирада мешкобчилар сув ташийдиган эллик мингдан ортиқ тия бор экан. Сувни жез кўза ва кичик мешларга солиб елкаларида ташийдиган мешкобчилар эса туялар ўтолмайдиган тор қўчаларга элтишади.

Шаҳарда саройлар оралиғида боғ ва дарахтзорлар бўлиб, уларни қудук суви билан сугоришади. Султон харами учун маҳсус боғлар бунёд этилган, улардан ҳам гўзалроқ маскан бўлмаса керак. Бу боғларни сугориш учун чиғирлар ўрнатилган.

Хатто томларга ҳам дарахтлар ўтқазилиб, шийлонлар қилинган. Мен у ерда бўлган пайтимда майдони йигирмага ўн икки газ бўлган уй ўн беш мағриби динор эвазига бир ойга ижарага бериларди. Мен яшаган уй тўрт қаватли бўлиб, уч қавати ижарага берилган эди. Ойига беш мағриби динор тўлашларини айтиб, тўртинчи қаватни ҳам ижарага сўрашди, лекин уй хўжайини рози бўлмади. «Бу ерда баъзи пайтлар ўзим келиб туришим мумкин», деди. Аммо мен бир йил яшаган бўлсан, шу муддат ичидаги ақалли икки марта ҳам бу уйда бўлмади. Уйлар шу қадар озода ва шинам эдикни, гўё фишт, тош, ганҷдан эмас, балки қимматбаҳо тошлиардан қурилган-дек. Қохирада барча ҳовлилар алоҳида-алоҳида жой-

лашган. Бирон кимсанинг даҳаҳт ё иморати бошқа бирорванинг деворига тегиб турмайди. Шунинг учун ким хоҳласа, уйини бузиб, бошқатдан янги уй қуриб олиши мумкин. Бундан ҳеч кимга зарар етмайди.

Агар Қохирадан чиқиб, фарб томонга юрсанг, Халиж номли катта анҳорга дуч келасан. Бу анҳорни сultonнинг отаси қаздирган ва анҳор бўйида унга қарашли уч юз қишлоқ бор. Анҳор Миср ёнидан бошланади ва Қохирага етгач, бурилиб, сulton қасри олдидан ўтади. Анҳор бўйида иккита кўшк қурилган, биттаси «Луълу», бошқаси «Жавҳара» деб аталади.

Қохирада тўртта жоме масжиди бўлиб, уларда жума кунлари намоз ўқишади. Булар — Азҳар, Нур, Ҳоким ва Муиз жомеларидир. Сўнгиси шаҳар ташқарисида, Нил бўйида жойлашган.

Мисрдан Қохирагача бир милдан ҳам камроқдир. Миср жанубда, Қохира шимолдадир. Нил Мисрдан ўтиб Қохирага келади. Икки шаҳар оралиғида иморатлар ва боғу бўстонлар бир-бирига туташиб кетган. Ёз фаслида бутун водий ва дашт денгизга ўхшаб қолади. Баландлик устида жойлашгани учун сув босмайдиган сulton боғидан ташқари барча боғлар сув остида қолади.

Халиж анҳорининг очилиши маросими

Нил суви етарли даражада кўнайиб, қиши фаслидаги сатҳига нисбатан ўн саккиз газ кўтарилган пайтда, яъни эски тақвим бўйича шахривар ойининг ўнинчи кунидан обонмоҳнинг йигирманчисигача бутун мамлакатдаги анҳор ва ариқлар, жумладан, Миср шахри ёнидан бошланиб, Қохирадан ўтадиган ва сultonнинг хос мулки бўлган Халиж анҳорининг ҳам боши ёпиқ бўлади. Ушбу анҳорнинг очилиш маросимида сultonнинг ўзи ҳозир бўлади. Худди шу пайтда барча вилоятлардаги ариқ ва анҳорларнинг ҳам бошини очишади. Бу кунлар катта байрам кунлари бўлиб, уни «Анҳор очилишига ташриф» деб аташади. Ушбу мавсум яқинлашганда анҳор бўйига сulton учун рум инагидан зарбоф саропарда тикишади ва уни жавоҳирлар билан безатиб, барча зарур асбоб-анжомларни муҳайё қилишади. Саропарда шу қадар улканки, унинг соясида юзта отлиқ тура олади. Унинг олдида буқаламун матодан яна катта бир чодир тикилади.

Байрам бошланишидан уч кун бурун отларни шовкінга ўргатиши учун султон отхонасида ноғора ва карнайлар чала бошлашади. Султон отланган куни тилла әгар урилған ва заррин анжомли ўн мингта арғумоқ оттайёр ҳолда туради. От ёпинчиқлари рум ипаги ва бука-ламундан бўлиб, маҳсус шунга тўқилгани учун кирқилмаган ва тикилмаган. Ҳошиясига Миср султони мулки эканлиги қайд этилган. Ҳар бир отга зирҳ ёки совут ёнилиб, әгар қошига дубулға ва бошқа қуроллар осилган. Жуда кўп туйларга кажавалар, хачирларга тахтиравонлар ўрнатилади, улар зару жавоҳир билан безатилади ва пардаларига марваридлар тикилади. Агар анҳор очиладиган куннинг бутун тантана ва дабдабасини баён қиласиз, десак ҳикоямиз жуда чўзилиб кетади.

Бу кун султоннинг бутун лашкари гурух-гурух бўлиб сафга тизилади. Ҳар бир бўлукнинг ўз номи ва лақаби бор. Каттолийлар бўлукни йигирма минг отлик аскардан иборат бўлиб, улар Қайрувондан Ал-Муиззиддиналлоҳ хизматига келишган экан. Яна бир гурухни ботилийлар деб аташади; улар мағриб аҳолисидан бўлиб, Мисрга султондан олдин келишган ва, айтишларича, ўн беш минг отлик эканлар. Масомуда деб аталувчи гуруҳда йигирма минг одам бўлиб, улар масомудийлар ўлкасидан келишган ва қора танлилардир. Мушорика¹⁰⁰ деб аталувчи гурух турклар ва эронийлардан иборат. Гарчанд уларнинг кўплари Мисрда туғилган бўлишса ҳамки, араб бўлишмагани учун лақаблари асл юртларига мослаб кўйилган. Айтишларича, улар ўн минг одам бўлиб, бакувват ва забардастдирлар. Бир гурухни «Абидушшарроъ» деб аташади ва булар пулга сотиб олинган қуллардир, жами ўттиз минг кишидир. Бадавийлар гурухи Ҳижоз аҳолисидан бўлиб, эллик минг отлиқдан иборат ва ҳаммаси наиза билан қуролланишган. Устодон деб аталувчи гуруҳда ўттиз минг қора ва оқ танли қуллар бор, улар турли хизматлар учун сотиб олинган. Саройилар деб аталувчи гурух турли ўлкалардан йигилган пиёдалардан иборат. Уларнинг саркардаси алоҳидадир. Бу гуруҳдаги ҳар бир элат жангчилари ўз юртига хос қурол-яроғ билан жанг қиласи ва улар ўн минг кишидир. Занжилар деб аталувчи гуруҳда ўттиз минг қиличбоз бор. Бутун лашкар султон қарамоғидадир. Ва ҳар бир аскарга мартаасига яраша озуқа ва маош тайинланган. Аскарларга на фуқаро ва на амалдорлар молидан бир динор ҳам

олишга рухсат этилмайди. Балки, ноиблар ҳар вилоят хирожини йигиф, хазинага топширадилар ва муайян вақтда хা�зинадан аскарларга маош тўланади, шу туфайли раият ва амалдорлар лашкарнинг пул ё мол талаб қилишидан жабрланишмайди.

Бундан ташқари, шахзодалар ва оламнинг турли ўлкаларидан Мисрга йигилган аслзодалардан иборат бир гурух ҳам бўлиб, у лашкар ҳисобига кирмайди. Бунда Марриб, Яман, Рум, Сақлаб, Нуба, Хабашистон зодагонлари, Дехли шоҳининг оналари билан бу ерга келган ўғиллари, Гуржистон шахзодалари, Дайlam маликзодалари, Туркистон хоқонининг ўғиллари бор эди. Шунингдек, яна турли табақага мансуб одамлар: олиму фозиллар, адиллар, шоирлар, қонуншунослар – ҳаммаси сultonдан маош олишарди. Зодагонлардан ҳеч бири беш юз динордан кам олмас, баъзилари икки минг мағрибий динор маош олишарди. Улар бирон иш қилишмас, фақат вазир кенгаш ўтказганида унинг қабулига бориб, сўнгра яна ўз уйларига қайтишарди.

Энди анҳорнинг очилиш маросими баёнини давом эттирамиз.

Султон анҳор бошига ташриф буюрадиган кун тонг сахарда биз юқорида зикр қилиб ўтган отларни олиб бориш учун ўн минг одам ёллашади. Отларни юзтадан гурухларга бўлиб, етаклаб боришади. Олдинда ноғора, карнай ва сурнайлар чалиб муғанийлар, орқада эса бир тўп аскар боради. Султон ҳарами дарвозасидан то Халиж анҳори бошигача шу тарзда боришади ва шундок қайтиб келишади. Отларни етаклаб борган ҳар одамга уч дирҳамдан беришади. Отлар орқасидан кажавалар ўрнатилган туялар ва тахтиравонлар ўрнатилган хачирларни етаклаб боришади. Бу пайтда султон лашкар ва отлардан нарирокда, хачир миниб келарди. У ёш, чиройли ва хушқомат одам бўлиб, амир ал-мўъминин Ҳусайн ибни Али ибни Абу Толиб соловотуллоҳи алайҳумо авладидан эди¹⁰¹. У миниб олган хачирнинг эгар ва абзаллари ҳеч қандай безаксиз ва зару симдан холи эди. У оқ кўйлак ва унинг устидан узун ва кенг барли чопон кийиб олган эди. Бу хил чопон араб заминида расм бўлиб, ажамда уни «дурроя» деб аташади. Султон кийган кўйлакни «дебки» деб аташади ва, айтишларича, унинг баҳоси ўн минг динор экан. Худди шу рангдаги салла ўраб, кўлида катта ва қимматбаҳо қамчи ушлаб олган эди. Унинг олдида уч юз

нафар пиёда дайламликлар боришар, ҳаммалари зарбоф румий матолар кийиб, белбоғ боғлашган, Миср одатига кўра, енглари кенг эди. Улар сих найзача ва ўқейлар кўтариб олишган. Султон шамсиясини кўтарувчи мулозим унга яқинроқда отда келарди. У бошига жавоҳирлар қадалган салла ўраган, эгнидаги чакмони ўн минг мағриби динор турарди. Қўлида ушлаб олган шамсия ниҳоятда нафис қилиб ишланган ва марваридлар билан безатилган эди. Султон яқинида бошқа отлиқлар йўқ, олдида ўша дайламликлар боришарди. Ўнг ва сўл томонда бир нечта куллар юриб, мижмарларда анбар ва уд ёқишарди. Одатга кўра, султон яқинлашганда одамлар тиз чўкиб, унинг хакига дуо ўқишарди. Султон изидан вазир, қозиул-қузот ва аркони давлат ҳамда илм аҳлидан катта бир гурухи боришарди.

Шу тарзда султон чодир тикилган жойгача, яъни анҳор бошига борди ва ҳачирдан тушмасдан тўхтади. Бир соатлардан сўнг унинг қўлига найза тутқазиши ва султон найзани тўғонга санҷди. Одамлар дарҳол куланг ва беллар билан ташланиб, бандни бузиб ташладилар. Сув кучли бир зарб билан емирилган бандни суриб, анҳорга оқа бошлади.

Бу кун Миср ва Қоҳиранинг бутун аҳолиси анҳор очилишини томоша қилишга келишади. Турли ажойиб ўйин ва томошалар кўрсатилади. Анҳорга биринчи бўлиб туширилган кемага гунг одамларни миндиришади, чунки буни хайрли фол деб билишади. Бу кун султон уларга садақалар беради.

Султоннинг йигирма битта кемаси бор. Султон қасри ёнида кемалар учун маҳсус сув омбори курилган. Ҳар бир кеманинг узунлиги эллик газ ва эни йигирма газ. Барчаси олтин-кумуш ва жавоҳирлар билан обдан безатилиб, ипак матолар копланганким, агар таърифини ба-тафсил келтирсам, бир неча варакни тўлдиришга тўғри келади. Отларни отхонада сақлаган каби, бу кемалар ҳам кўпинча сув омборида туради.

Шаҳардан икки фарсанг масофада султонга қарашли бир боғ бўлиб, уни «Айнушшамс» (Қуёш булоги) деб аташади. У ерда суви ширин булоқ бўлиб, боғ номини шундан олган. Қадимда бу ерда Фиръавннинг боғи жойлашган экан. Боғ ёнида кўҳна бир иморат кўрдим: баландлиги ўттиз газ бўлган тўртта улкан тош бўлаги ми-норалардек юксалиб туар ва тепасидан томчилаб сув оқарди. Бунинг нималигини ҳеч ким билмасди.

Миср шаҳри таърифи

Шаҳар баландлиқда жойлашган. Шарқ томонидаги тоғ унча баланд эмас. Тошлок тепалик деса ҳам бўлади. Шаҳар чеккасидаги тепаликка Тулун масжиди қурилган. Деворлари фоят мустаҳкам. Омад ва Миёфориқин деворларини айтмаса, мен олдин бундан ҳам яхшироқ деворни кўрмаганман. Уни Миср ҳокими бўлган аббосийлар амири Тулун қурдирган экан.

Хозирги сultonнинг бобоси Ҳоким биамрulloҳ ҳукмронлиги пайтида амир Тулуннинг ўғиллари сulton олдига келиб, ушбу масжидни унга ўттиз минг мағриби динорга сотишибди. Лекин бир қанча муддатдан кейин масжид ёнидаги минора тагини ковлай бошлишибди. Ҳоким одам юбориб: «Сизлар масжидни менга сотдингиз, нега энди уни бузяпсизлар?» деб сўраган экан, «Биз минорани сотмаганмиз», деб жавоб қилишибди улар. Шунда Ҳоким яна беш минг динор бериб, минорани ҳам сотиб олган экан. Сulton рамазон ойида ва жума кунлари бу масжидда намоз ўқирди.

Тошқин хавфи борлигидан Миср шаҳрини баландлик устида бино қилишган. Оддин тошлар ва қоялар бўлган, лекин ҳаммасини майдалаб текислашган. Агар узоқдан Миср шаҳрига назар ташланса, тоғ деб ўйлаш мумкин. Етти қаватли, ҳатто ўн тўрт қаватли уйлар бор. Ишончли одамдан эшитдимки, бир киши етти қаватли уйнинг томида боғ кўкартириб, бу ерга бузоқ олиб чиқибди ва бокиб катта қилибди. Шундан сўнг у қудуқдан сув чиқаридиган чиғир ўрнатиб, уни айлантириш учун буқани қўшибди. Томга поринж ва турунж дараҳтлари ва ҳоказолар ўтқазибди. Ҳаммаси мева берибди. У одам шунингдек, гуллар ва турли ўсимликлар экибди.

Бир эътиборли савдогардан шуни эшитдимки, Мисрда майдони ўттиз аршга ўттиз арш бўлган, ижарага бериладиган уйлар бўлиб, ҳар бирига уч юз эллик нафар одам сифаркан.

Айрим кўчалар ва бозорларда доимо қандиллар ёқиғлик туради, чунки у ерларга ҳеч ёруғлик тушмайди: одамлар йўлни кўрсинг, деб шундай қилишади.

Қоҳира масжидларидан ташқари, Мисрда еттига жоме масжиди бор, иккала шаҳардаги жоме масжидлари сони ўн бешта бўлиб, ҳар бирида жума кунлари хутба ва намоз ўқишади.

Бозор ўртасида Бобулжавомеъ масжиди бор. Уни бир пайтлар халифа Муовия¹⁰² Мисрга амир этиб тайнинган Амр ибн Ос курдирган. Масжиднинг тўрт юзта мармар сутуни бор. Мехробли хона деворига оқ мармар қопланиб, унга чиройли хат билан Куръон оятлари битилган. Шу яқинда бозор бўлиб, масжид эшиклари шу томонга қараган. Масжидда доимо мударрис ва муллалар бўлишади. Бу катта шаҳарнинг одамлар жамланадиган энг гавжум жойларидан бири ҳам ушбу масжиддир. Ҳеч қачон бу ерда беш мингдан кам одам бўлмайди, булар — муллаваччалар, мусофиirlар, ҳар хил хужжатлар ёзиб берувчи котиблар ва ҳоказолардир.

Ушбу масжидни Ҳоким Амр ибн Ос ўғилларидан сотиб олган ва бу ҳодиса қуйидагича рўй берган: Амир ибн Ос ўғилларий султон ҳузурига келиб, шундай дейишибди: «Биз муҳтожликда яшаемиз. Бу масжидни отамиз курдирган. Агар султон ҳазратлари ижозат берсалар, биз бу масжидни бузиб, фишт ва тошларини сотмоқчимиш». Шунда Ҳоким уларга юз минг динор бериб, масжидни сотиб олиби ва бутун Миср аҳолисини бу савдога гувоҳликка чақирибди. Кейин султон масжид учун ажойиб анжомлар ясашни буюрибди. Шулардан бири ўн олти қиррали кумуш чироқдондир. Ҳар кирраси бир ярим ва бутун айланаси йигирма тўрт аршдир. Муқаддас кечаларда унда етти юздан ортиқ шам ёқишиади. Унинг вазии йигирма беш қинтор кумуш экан. Бир қинтор юз ратл ва бир ратл бир юз қирқ дирҳам кумушдир. Айтишларича, бу чироқдон ясалганда катталиги сабабли ҳеч қайси эшиқдан сифмабди. Шунда масжид эшикларидан бирини бузиб, чироқдонни киритишибди ва эшикни яна таъмир қилишибди. Масжидда устма-уст тўшалган ўнта чиройли рангин бўйра бор. Ҳар кеча юздан ортиқ қандил ёниб туради. Қозиуол куззот маҳкамаси ҳам шу масжидда жойлашган.

Масжиднинг шимол томонида Суқулқанодил (қандил бозори) жойлашган. Бунаقا бозор бошқа бирон ўлкада йўқ. Оламда қанақа фалати буюмлар бўлса, бу бозорда топилади. Чунончи, мен тошбақа косасидан ясалган кутича, тароқ, пичоқ дастаси ва ҳоказоларни кўрдим. Шунингдек, жуда чиройли биллур кўрдим. Уни Мағрибдан келтиришган ва моҳир усталар ишлов беришаётган эди. Яна айтишларича, шу яқинда Кулзум денгизидан ҳам биллур топилибди: у Мағриб биллуридан юмшоқ ва шаф-

фофороқ экан. Занжибардан келтирилган фил суюгини кўрдим. Анча кўп олиб келишган: икки юз мандан зиёдроқ эди. Ҳабашистондан бир хил мол терисини келтиришибдики, йўлбарс терисига ўҳшайди¹⁰³. Ундан ковуш тикишаркан. Ўша ўлкадан яна каттакон уй паррандасини келтиришган¹⁰⁴. Бу күшнинг патларида оқ доғлар ва бошида худди товусникидек тожи бор эди.

Шунингдек, Мисрда асал ва шакар мўл-кўл бўлади.

Қадимги тақвим бўйича тўрт юз ўн олтинчи йил даймохнинг учинчи куни (1048 йил, 18 декабр) бир куннинг ўзида мен қўйидаги ўсимлик ва меваларни кўрдим: атиргул, нилуфар, наргис, турунж, норинж, лиму, олма, ёсуман, райхон, беҳи, анор, нок, қовун, дастанбуя¹⁰⁵, банан, зайдун, хурмо, узум, шакарқамиш, бақлажон, қовоқ, турп, шолғом, ловия, кўк пиёз, саримсок, бодринг, сабзи, лавлаги ва ҳоказо. Ҳар бир киши бу турли мева ва ўсимликларнинг баъзилари кузги, баъзилари баҳорги, яна бир хиллари қишки, бошқалари ёзги эканини мудоҳаза қилиб, уларнинг бир жойда жам бўлганига ишонмаслиги мумкин. Аммо мен ўз кўрган нарсаларимни бегараз ёздим. Бошқалардан эшитиб ёзганларим учун эса, жавобгарлик менинг бўйнимда эмас.

Миср мамлакати фоят азим ва оби ҳавоси турлича: баъзи вилоятлар иссиқ, баъзилари салқинроқ. Барча атроф қишлоқлардан шаҳарга маҳсулотлар келтиришади ва бир қисми бозорларда сотилади.

Мисрда сафолдан коса, қадаҳ, табоқ ва бошқа турли хил буюмларни шу қадар нафис ва шаффоф қилиб ясадиқи, уларга бир томондан кўл теккизсанг, бу томонидан кўринади. Сафол буюмларни буқаламун рангига бўяшади, шунинг учун ҳар томондан қараганда турлича кўринади. Тозалиги ва мусаффолигидан забарждадга ўҳшайдиган ойна ясашади ва уни вазнига қараб сотишади.

Бир эътиборли баззоздан бир ўрам арқоннинг Мисрда уч мағриби динор туришини эшитдим. Бу микдор уч ярим Нишонур динорига тўғри келади. Мен Нишонурда «Энг яхши арқонни қанчага харид қўлишади?» деб сўраганимда, «Энг зўр арқоннинг бир ўрамига беш дирҳам беришади», дейишидни.

Миср шаҳри Нил дарёси қирғоғи бўйлаб анча жойга чўзилган. Жуда кўп кўшк ва шийлонлар дарё лабида жойлашган ва уларга арқон билан сув чиқарилади. Ле-

кин шаҳарга сувни мешкобчилар баъзилари туяларда, бошқалари елкада ташишади. Дамашқий жездан ясалган ва ўттиз ман сув сифадиган кўзаларни кўрдим, ялтироқлигидан олтиндан ясалганга ўхшарди. Бир одам менга шунақадан беш мингта кўзаси бўлган бир аёл ҳакида ҳикоя қилиб берди. У ҳар битга кўзани ойга бир дирҳам эвазига ижарага бераркан. Ижаачилар муддат туғагач, кўзани бешикаст қайтаришни уҳдаларига олишаркан.

Миср олдида, Нил ўртасида орол бор ва у ерга бир пайтлар шаҳар қурилган. Шаҳарнинг фарб томонидаги бу оролда жоме масжиди ва боғлар бор. Дарё ўртасидағи қояга ўхшаган оролнинг икки томонидан окиб ўтувчи Нил тармоқларининг ҳар бири чамамда Жайхунга тенг бўлиб кўринади. Аммо анча секин оқади. Ўттиз олтида кемани бир-бирига боғлаб шаҳардан оролга ўтадиган кўпrik қилишган.

Шаҳарнинг бир қисми Нилнинг нариги тарафида жойлашган ва уни Жиза деб аташади. Бу ерда ҳам жоме масжиди бор, аммо нариги қирғоққа ўтадиган кўпrik йўқ. Жизага қайик ва кемаларда ўтишади. Мисрда қайик ва кемалар шу қадар кўпки, Бағдод ва Басрадагиларни¹⁰⁶ бирга кўшиб ҳисоблагандан ҳам бунча йўқдир.

Миср бозорларида бирон нарса сотишаётганда факат рост гапиришади. Агар кимки харидорни алдаса, уни тияга мингизиб, кўлига қўнфироқ тутқазишади ва шаҳар бўйлаб айлантиришади. У қўнфироқ чалиб: «Мен ёлғон гапирдим ва маломатга қолдим», дея қичқиради. Ёлғончининг жазоси шу!

Бу ернинг бозорида баққол, аттор ва майдадурушлар бирон нарса сотишиса, идишни ўzlари беришади. Идишлари шиша ёки сополдан ва қофоздан қилингандир. Харидорнинг бозорга идиш кўтариб боришига ҳожат йўқ.

Чироқ ёфини бу ерда турп ва шолғом уруғини эзиб олишади ва уни «зайти ҳор», яни, «ёнувчи ёғ» деб аташади. Кунжут бу ерда кам ва шу сабабли кунжут ёғи қиммат туради. Зайтун ёғи арzonдир. Писта бодомга кўра қимматроқ экан. Бодом мағзининг ўн мани бир динордан қиммат эмас.

Бозорчилар ва дўкондорлар уйларидан бозорга эшак миниб келишади. Ҳамма кўчалар бошида чиройли эгар солинган эшаклар туради. Ҳар ким хоҳласа, озгина кироя тўлаб, манзилга эшакда бориши мумкин. Айтишла-

рича, ҳар куни эллик мингдан ортиқ эшак ва хачирга эгар солиниб, кирояга бериларкан. Сарбоз ва саркардадардан бошқалар, яъни савдогарлар, дехқонлар, хунармандлар ва амалдорлар от минишмайди. Бу шаҳарда жуда кўп отга ўхшайдиган, ҳатто ундан чиройлироқ чавкар эшаклар кўрдим.

Мен бўлган пайтимда шаҳар аҳолиси фоят бой эди.

Тўрт юз ўттиз тўққизинчи (1047) йил маликалардан бири ўғил туғди ва султон бутун аҳолига байрам қилишни буюрди. Шаҳар ва бозорни шунақсанги безатищди, агар унинг таърифини баён қиласам, баъзилар ишонмаслиги, базоззлик, саррофлик ва бошқа дўконларда зару жавоҳир, мол ва пул, зарбоф либослар кўплигидан ўтиришга жой қолмади десам, муболага деб билишлари мумкин.

Хеч ким айғоқчи ва хуфиялардан кўркмайди. Ҳамма султоннинг аҳолига зулм ва бироннинг молига тамаъ қилмаслигига ишонади. У ер одамларида шунақсанги бойликлар кўрдимки, айтсам ёки ёзсан, ажам аҳлининг ақли шошиб қолади. Мен уларнинг бойликлари ҳисобига етолмадим ва бу ердагидек осойишта ҳаётни бошқа ҳеч қаерда кўрмадим.

Бир тарсо одамни кўрдим: Мисрнинг энг катта бойларидан экан. Айтишларича, унинг кемалари ва бошқа молу мулкининг ҳисобига етиб бўлмас экан. Қайсиdir бир йили Нил суви етарли даражада кўтарилимай, ғалла қимматлашибди. Султон вазири ҳузурига тарсони чақириб, унга: «Йил яхши келмади ва раиятнинг аҳволидан султоннинг кўнгли ғашланиб қолди. Сен ё пулга ё қарзга имконнинг етганича ғалла бергин», дебди. Тарсо шуйдай жавоб берибди: «Султон ва унинг вазири баҳтига мен шунча ғалла ҳозирлаб қўйганманки, Мисрни олтийил нон билан таъминлашга етади».

Бу вақтда Миср аҳолиси, шубҳасиз, Нишопур аҳолисидан беш баравар кўп эди. Ҳисоб илмидан хабардор одамга шунча ғалласи бор одамнинг бойлиги қай дараҷадалиги маълум бўлади. Султон одил ва раият эминлигидан уларда шу ҳол вужудга келган. Султон ҳеч кимга жабру зулм қилмайди ва одамлар ҳам ҳеч нарсани яширмайди.

«Дорулвазир» деб аталган карvonсарайни кўрдим. Бу ерда қасаб газламаси сотишади. Пастки қаватда тикувчилар, юқорида ямоқчилар яшашади. Карvonсарай соҳибидан йиллик даромадини сўрадим. «Ҳар йили йигирма

минг магриби динор, — деди у. — Аммо шу кунларда бинонинг бир қисми хароб бўлиб, уни қайта қуришмокда. Ҳозирда бизга ойига минг динордан, яъни йилига ўн икки минг динор тўлашяпти».

Менга шаҳарда бундан ҳам каттароқ карвонсарой йўқлигини айтишди. Лекин бунга қариб тенг келадиганлари икки юзга яқин экан.

Султон зиёфати таърифи

Мисрдаги одатга биноан султон йилда икки марта байрамлар пайтида элга дастурхон ёзиб, зиёфат килади ва хосу омга кўриниш беради. Зодагонлар султон ҳузурида, авом эса бошқа сарой ва уйларда зиёфат ейишади. Мен бу ҳақда жуда кўп эшитган бўлсан ҳам, ўз кўзим билан кўришни ҳавас қиласдим. Мен танишиб ва дўстлашиб қолганим султон дабирларидан бирига дедим:

— Мен ажам маликлари ва хукмдорларидан бўлмиш султон Маҳмуд Фазнавий¹⁰⁷ ва унинг ўғли Масъуд¹⁰⁸ боргоҳида бўлдим. Улар улуғ подшоҳлар бўлиб, неъмат ва бойликлари хисобсиз эди. Эндиликда амир ал-мўъминин мажлисини ҳам томоша қилмоқ истагим бор.

У дарҳол пардадорга (бу ерда уни «соҳибусситр» деб аташади) мен ҳакимда қўрсатма берди.

Тўрт юз қирқинчи йил рамазон ойининг сўнгги куни (1049 йил, 7 март) зиёфатгоҳ ҳозирлашди. Эртаги ийд куни бу ерга султон ташрифи кутиларди. Пардадор мени у ерга бошлаб борди. Сарой дарвозасидан кириш билан шийлонлар, айвонлар ва бошқа турли-туман иморатларга кўзим тушди. Агар уларнинг васфини тўла келтирсам, ҳикоя чўзилиб кетади.

Бу ерда мурабба шаклидаги ўн икки қаср юксалиб турарди. Биридан иккинчисига ўтганимда, ҳар гал навбатдагиси кўзимга олдингисидан гўзалрок бўлиб кўринарди. Ҳар бирининг майдони юз аршга юз арш, фақат биттасиники олтмиш аршга олтмиш арш эди. Ўша бинода хонанинг бутун энини эгаллаган ва баландлиги тўрт газ бўлган таҳт турарди. Таҳтнинг учала томони олтиндан ясалган бўлиб, унда ов манзараси ва бошқа манзаралар тасвирланган. Шунингдек, чиройли хат билан лавҳа битилган.

Гилам ва шоллар рум ипаги ва буқаламуидан эди. Уларни тўшаладиган жой андозасига мослаб тўқишигани

кўриниб турарди. Тўрдаги тахтга чиқиш учун кумуш зинапоя ясалган. Тахтнинг ўзи шундай эдик, агар бутун китоб унинг таърифини ёзишга бағишилганнида ҳам, бунинг уддасидан чиқмоқ амримаҳол.

Айтишларича, султон зиёфат берган куни эллик минг ман шакар шириналклар тайёрлашга ажратиларкан. Зиёфат хонасида турунж дараҳтига монанд қилиб ясалган дараҳтни кўрдим. Унинг шоҳ, барг ва мевалари шакардан эди. Султон ошхонаси қаср ташқарисида ва унда юзлаб ошпазлар ишлайди. Кўшқдан ошхонага ер ости йўли бор.

Бу ерда ўрнатилган тартибга биноан ҳар куни султон шаробхонаси учун ўн тўрт тия қор келтириларди. Бу ердан аъён ва зодагонлар улушларини олишарди ва шахар аҳли ҳам зарурат юзасидан сўрашса, беришарди. Шунингдек, шахар аҳолисига дори-дармон ва ҳоказолар керак бўлса ҳам, ҳарамга мурожаат қилиб, у ердан олишарди. Турли малҳамлар, балисон¹⁰⁹ мойи олмоқ тартиби ҳам шундай эди ва мазкур нарсалар сўралганнида оғриниш ёки рад қилиш ҳоллари юз бермасди.

Миср султонининг феъл-автори

Миср аҳолисининг эмин ва осойишталиги шу даражада эдик, баззоз, сарроф ва заргарлар дўконларининг эшигини ёпмай, фақат парда осиб қўйишар, бирон кимса молларига кўз олайтирмас эди.

Султоннинг ўзи ҳам қадрлайдиган бир яхудий заргар бўлиб, унинг беҳисоб бойлиги бор эди. Жавоҳирлар олди-сотдисида ҳамма унга эътимод қиласарди. Бир куни қандайдир жанжал чиқиб, сарбозлар яхудийга ташланиб, уни ўлдириб қўйишиди. Сўнгра султон қаҳридан қўрқиб, йигирма минг сарбоз отланиб, майдонга чиқишиди. Шахар аҳолиси бундан даҳшатга тушди. Отлиқлар туш пайтигача майдонда туришиди. Сарой дарвозасидан мулоzим чиқиб, дарвоза олдида туриб қичқирди:

— Султон ҳазратларига итоат қиласизларми, йўқми?

Лашкар бир овоздан гуриллаб, деди:

— Биз султоннинг қули ва унга итоат этамиз. Аммо гуноҳ қилиб қўйдик.

— Султон сизларга қароргоҳга қайтишни амр қилади, — деди мулоzим ва сарбозлар дарҳол ўз жойларига қайтишиди.

Ўлдирилган жуҳуднинг Абусайд исмли ўғли ва бир укаси бор эди. Овозаларга қараганда, унинг мол-дунёсининг ҳисоби ёлғиз Оллоҳгагина аён эди. Айтишларича, унинг уйи томида уч юзта кумуш тогора бўлиб, ҳар бирига дараҳт ўтқазилган, том усти мисли боғ бўлиб, барча дараҳтлар ҳосил берарди.

Жуҳуднинг укаси султонга хат ёзиб, икки юз минг мағриби динорни ҳазинага топширажакларини маълум қилди. У султондин кўрқани туфайли шундай қилган эди. Султон хатни ҳамманинг кўз ўнгида йиртиб ташлашини буюрди ва жуҳуднинг меросхўрларига қараб:

— Эмин-осуда уйингизга боринг, бирон кимса сизларга тегмайди ва биз бировнинг молига муҳтоҷ эмасмиз, — деди.

Шомдан Қайрувонгача қаергаки борган бўлсам, барча шахар ва қишлоқларда масжидларнинг чироқ ёфи, бўйра, жойнамоз ва имом, муаззин, фаррош ва бошқа хизматчиларнинг моянаси учун сарфлайдиган маблағни султон вакили тўларди.

Қайсиdir йили Шом волийси ўз мактубида шундай деб ёзибди: «Бу йил зайдун ёфи кам олинди. Агар фармони олий бўлса, биз масжидларга турп ва шолғом уруғидан олинувчи ёғ, яъни, «зайти ҳор» берамиз». Унга шундай жавоб жўнатишиди: «Сен вазир эмас, балки хизматкорсан. Худонинг уйи учун нимаики лозим бўлса, улар ўзгаришсиз ва кечиктирилмасдан берилиши шарт!»

Козийулқузотга ҳар ойда икки минг мағриби динор ва бошқа қозиларга ҳар бирининг даражасига қараб маош берилади, токим улар бировнинг молига тамаъ қилиб, одамларга зулм қилишмасин.

Ҳижоз ўлкаси таърифи

Зулқаъда ойи бошида биз Мисрдан чиқдик ва шу ойнинг йигирманчисида Қулзумга келдик. Бу ердан кемага тушиб, ўн беш кунда Жор шаҳрига келдик. Тўрт кундан сўнг эса, расууллоҳ саллоллоҳу алайҳи вассаллам шаҳри — Мадинага етиб келдик.

Пайғамбар алайҳиссалом шаҳри сахро чеккасида жойлашган. Замини намнок ва баъзи жойлари шўрҳок. Оқар суви кам. Хурмозорларга бой. Қибла Мадинадан жануб тарафдадир.

Расууллоҳ алайҳиссалом масжидининг катталиги

Маккадаги Масжид ал-Харамга тенг келади. Пайғамбар алайҳиссалом қабри масжид минбари ёнидадир. Қибла томонга қараб турилганда қабр чан қўл тарафда бўлади. Ҳатиб хутба пайтида Пайғамбар алайҳиссалом номини зикр қилаётib, ўнг томонга юзланади ва мақбарага ишора қилади. Мақбара мухаммас шаклида: масжиднинг бешта устунининг ўртасигача девор тикланган. Бирор кирмаслиги учун усти панжара қилинган ва қушлар учеб кирмаслиги учун очик жойларига тўр ёпилган. Қабр ва минбар орасида мармар қопланган кичик саҳн бўлиб, бу жойни «равза» деб аташади ва, айтишларича, бу ерда жанинат боғларидан бири жойлашган, чунки Пайғамбар алайҳиссалом, «Қабрим ва минбарим орасида жанинат боғларидан бор», деб зикр қилганлар. Масжиднинг эшиги битта.

Шаҳардан жануб тарафдаги саҳрода гўристон бор. Ҳамза ибни Абдулмутоллиб розийаллоҳу анхунинг қабри шу ердадир. Бу мавзеъни «Қубурушшуҳадо» (Шаҳидлар қабристони) деб аташади.

Биз Мадинада икки кун бўлдик ва сўнгра яна йўлга тушдик. Йўл машриқ тарафга кетарди. Мадинадан икки манзил нарида тоғ даралари бўлиб, бу ерни «Жуҳфа» деб аташарди. Бу ер Мағриб, Шом ва Мисрнинг мийқотидир. «Мийқот» деб ҳожилар эҳром киядиган жойга айтилади. Айтишларича, қайсиdir бир йили жуда кўп ҳожилар тўпланганида тўсатдан қаттиқ сел келиб, ҳаммалари ҳалок бўлишибди. Шу сабабли бу ер «Жуҳфа» (яъни, кучли сел) деб аталаркан.

Мадинадан Маккагача юз фарсанг масофа, аммо йўл тошлок бўлгани учун биз саккиз кун юрдик. Олтинчи зулхижжада якшанба куни Маккага кириб келдик ва Бобуссафо дарвозаси ёнида тўхтадик. Бу йил Маккада қаҳатчилик бўлиб, тўрт ман нонни бир нишопури динорга сотишарди. Одамлар Маккани ташлаб кетишар ва атрофдан ҳам ҳожилар келмай кўйишгаш эди. Чоршанба куни Ҳақ субҳонаҳу ва таоло мадади билан Арафот тогига чиқиб, ҳажни бажо келтирдик. Маккада икки кунни ўтказдик. Очлик ва қашшоқликдан жуда кўп одамлар Ҳижоздан турли ёқларга бош олиб кетган эканлар. Мен бу сафар ҳаж маросими ва Макка шаҳри ҳакида батафсил сўзлаб ўтирумайман. Бошқа сафар бу ерга келиб, олти ой мужовир бўлиб яшаганимда кўрган нарсаларимни ўз жойида муфассал хикоя қиласман.

Мен яна Миср тарафга йўл олдим ва етминн беш кундан кейин бу ерга етиб келдим. Бу йил Мисрга Ҳижоздан ўттиз беш минг одам қелган бўлиб, сulton уларни кийим-кечак ва бир йилга етадиган озиқ-овқат билан таъминлади. Чунки, улар барчаси оч-яланғоч эдилар. Ёғингарчилик бошланиб, Ҳижоз заминида озуқа кўпайгач, сulton мухожирларга боз сарнолар бериб, уларни Ҳижозга узатди.

Тўрт юз қирқинчи йил ражаб ойида (1048 йилнинг декабри) сultonнинг қуидаги мазмундаги ёрлигини масжидларда ҳалққа ўқиб беришди: «Ҳижозда қаҳатчилик ва ҳожиларнинг бормоғи маъқул кўрилмайди. Фуқаромиз ҳаж сафаридан сақланиб, Оллоҳ амр қилган бошқа юмушларни адо этаверсинлар».

Бу йил ҳам одамлар ҳажга боришмади. Лекин сulton ўзининг Макка ва Мадина амирларига, Каъба хизматчиларига узатадиган ҳар йилги совфа-саломларини канда қилмоқни истамасди. Иилига икки бор узатиладиган бу совғалар бедов отлар, чопонлар ва Макка амири ҳамда аъёнлари учун ҳар ойга уч минг динор пулдан иборат бўларди. Бу йил ушбу совғаларни Қози Абдулло исмли кишига топширдилар. У олдин Шомда қози бўлган экан. Мен ҳам улар билан йўлга тушдим ва биргаликда Кулзумга келдик. Бу гал бешинчи зулқаъдада кема Жорга етиб келди. Ҳаж мавсуми яқинлашиб, вақт жуда кам қолган эди. Битта тую беш динорга ижарага бериларди. Мен жуда шошилиб йўл босдим ва саккизинчи зулҳижжада Маккага етиб келиб, Ҳақ субҳонаҳу таоло кўмаги билан ҳажни бажо келтирдим.

Бу йил Мағрибдан катта карвон келган экан. Улар ҳаждан қайтишаётганда Мадина ёнида бадавийлар йўл тўсиб, ўлион талаб қилишибди. Икки ўртада олишув бошланиб, мағрибликлардан икки мингдан кўпроғи ўлдирилибди.

Худди шу йили Хурсондан ҳам бир гурӯҳ одам Шом ва Миср йўли билан ҳаж сафарига чиқишибди. Кемада Мадинага келишибди. Зулҳижж жойининг олтинчи куни бўлиб, Арафотга етишларига бир юз тўрт фарсанг бор экан. Арабларга дейишибди: «Кимки бизни ана шу қолган уч кун ичиди Маккага етказса ва ҳажга улгурсак, ҳар биримиз кирқ динордан тўлаймиз». Бадавийлар рози бўлиб, уларни икки ярим кунда Арафотга етказнишибди. Пулни олдиндан олишибди ва уларни бит-

та-биттадан чопқир туяларга миндириб, маҳкам боғлашибди. Мадинадан чиқиб, туяларни Арафотгача чоптириб келишиби. Туяларга бөғлоғлик хурсоңликлардан иккитаси ўлиб, қолган түрттаси ҳам ўлар холатда, аср намози пайтида, биз ўша жойдалигимизда етиб келишди. Шу холга етган эдиларки, оёқда тик туролмасдилар. Гапиришга ҳам мажоли етмасди бечораларнинг. Кейинчалик бизга шуни сўзлаб бердилар: «Йўлда бадавийларга неча бор, олган пулингиз сизники бўлсин, лекин бизни қўйиб юборинглар, ортиқ тоқат қилолмаймиз, деб зорландик. Қулок солмай, туяларни чоптираверишди». Бу тўрт нафар хурсоңлик ҳажни бажо келтириб, Шомга қайтиб кетишиди.

Ҳажни адо этгач, мен ҳам Мисрга қайтдим. Чунки, у ерда китобларим қолган эди. Бу йил Мисрга Мадина амири ташриф буюрди. У Ҳусайн ибни Али салавотуллохи алайхумо авлодидан бўлгани учун султон унга йиллик маблағ тайинлаган ва шуни олишга борган эди. Мен у билан кемада Қулзумга бирга бордим. Ундан Мисрга ҳам бирга кефидик.

Мутолиблар бошлигининг ўлими

Тўрт юз қирқ биринчи йили, мен Мисрда эканлигимда, Ҳалаб малики султонга қарши исён қўтаргани ҳақида хабар келди. У султонга чокар бўлиб, отаси ҳам Ҳалаб малики бўлган эди.

Султоннинг Умдатуддавла исмли навкари бўлиб, у мутолиблар бошлиғи ва ниҳоятда кўп бойликлар эгаси эди. Миср тоғларидан ҳазина ва дафналар изловчи одамларни «мутолиблар» деб аташарди. Мағрибдан, Мисрнинг барча вилоятларидан, Шомдан келган одамлар Мисрнинг тоғу тошларида изғиб, машаққатлар чекишида ва сарфу харажатлар қилишади. Ҳазина ва дафина топганилар кўп-у, аммо бор-будини сарфлаб, бирон бойлик тополмаганлар ҳам оз эмас. Айтишларича, бу мавзеъда Фиръавннинг бойликлари кўмилган экан. Бойлик тошиб олган одам топганининг бешдан бир қисмини султон ҳазинасига топшириши лозим, қолгани ўзиникидир.

Хуллас, султон ушбу навкарини катта лашкарга бош килиб, Ҳалаб вилоятига жўнатди. Унга маликларга хос буюмлар, саропарда ва ҳоказолар инъом этди. Навкар

Ҳалабга келиб, исёнкорларга қарши жанг бошлаб юборди-ю, аммо ўзи ҳам жангда ўлдирилди.

Унинг мол-мулки шу қадар кўп эдикى, хазинасидаги молларни икки ой давомида султон хазинасига ташишиди. Уч юздан ортиқ канизаги бўлиб, кўпчилиги соҳибжамол эди. Султон уларни озод кўйиб юборишни буюрди. Эрга тегишини хоҳлаганларини эрга бердири, қолганларига ҳам тегишли мол-мулкини бердириб, уйларига узатди. Биронтасига ихтиёрига қарши зўрлаш ёки жабр қилиш ҳоллари бўлмади.

Навкар Ҳалабда ўлдирилгач, малик султоннинг яна катта лашкар жўнатишидан қўрқди. У хотини ва етти яшар ўғлини беҳад кўп ҳадялар билан султон ҳузурига юборди ва бўлиб ўтган воқеалар учун узр сўради. Улар етиб келгач, қарийб икки ой шахар ташқарисида туришиди. Чунки, дарвозадан киритишмади ва тухфалари ҳам қабул этилмади. Ниҳоят, шахар қози ва имомлари шафоат юзасидан султон даргоҳига кириб, уларни қабул этмоғини илтимос қилишди. Султон уларни қабул қилди ва сарполар бериб, ўз юртларига жўнатди.

Мисрдаги боғдорчилик таърифи

Агар Мисрда кимки боғ яратмоқчи бўлса, буни йилнинг истаган фаслида қила олади. Чунки, истаган дарахтини — хоҳ мевали, хоҳ манзарали дарахт бўлсин — ҳамиша топиб ўтқаза олади. Ниҳолфурушлар бўлиб, улар харидор айтган кўчатни бир зумда топиб беришади. Улар ниҳолни томда, катта тувакларда ўстиришади. Шунинг учун кўплаб томлар боғни эслатади. Асосан норинж, турунж, анор, олма, беҳи каби мевали дарахтлар, шунингдек, турли гул ва ўсимликлар ўстиришади. Кимки сотиб олмоқни истаса, хаммоллар келиб тувакларни ичидаги кўчати билан кўтариб, айтилган жойга олиб боришади. Тувакни ерга кўйишади. Исталган пайтда кўчатни тувакдан олиб ерга ўтқазиш мумкин ва бу ҳол дарахтнинг ўсишига заррача зиён етказмайди. Боғ яратмоқнинг бунақа усулини бошқа бирон бир мамлакатда кўрганим ёки эшитганим йўқ. Инсоф билан айтганда, бу ғоят ажойиб усулдир.

Мисрдан қайтмоимиз баёни

Энди ўзимнинг Мисрдан Макка орқали ватанга қайтмоимни баён қиласман. Ийд намозини Қохирада ўқиб, тўрт юз қирқ биринчи йил зулхижжа ойининг ўн тўртичисида, сешанба куни (1050 йил, 10 апрель) Мисрдан кемага ўтиридим ва Саидаъло орқали йўлга тушдим. Бу вилоят жанубда жойлашган бўлиб, Нил дарёси унинг ҳудудидан ўтиб, Мисрга келади. Миср бойликлари манбай асосан шу вилоятда. Нилнинг ҳар иккала қирғофида жуда кўп шаҳару қишлоқлар бор: агар битталаб ёзаман деса, кўп вактни олади.

Ниҳоят, Асют¹¹⁰ деган шаҳарга келдик. Бу шаҳарда афюн тайёрлашади. Унинг уруғи кора кўкноридан олинади. Кўкнори ўсиб бош ҳосил қилгач, уни тилишади, шунда шира ажралиб чиқади. Ширани йигиб олиб саклашади ва мана шу афюндир. Бу кўкнорининг уруғи жуда майда ва зирага ўхшайди.

Асютда кўй жунидан ажойиб саллалар тўқишиардики, ўхшаши оламда йўқ. Эронга келтириладиган ва «мисрий» деб аталувчи юқори сифатли жун Саидаъло вилоятидан олиб борилади. Мисрнинг ўзида жун йигиришмайди. Асютда кўй жунидан тўқилган фўта кўрдим; бунга ўхшашини на Лохур¹¹¹ ва на Мўлтонда¹¹² кўрганман. Кўринишидан уни ипак деб ўйлаш мумкин.

У ердан Қавс номли шаҳарга келдик. Бу ерда тошдан қурилған улкан биноларни кўрдим; шу қадар маҳобатлики, одам донг қолади. Шаҳарнинг кўхна қалъаси ва девори ҳам тошдан бунёд этилган, биноларнинг кўпи ҳар бири йигирма-ўттиз минг ман келадиган катта тошлардан қурилган. Шуниси ажабланарлики, яқин ўн-ўн беш фарсанг масофада на тоғ ва на тош бор.. Бу тошлар қаердан ва қандай қилиб келтирилди экан?

У ердан биз Ахмим шаҳрига етиб келдик. Обод ва гавжум шаҳар бўлиб, мустаҳкам кўрғони бор экан. Хурмозор ва боғлари жуда кўп. Бу шаҳарда йигирма кун туриб қолдик. Сабаб шу эдики, олдимиизда икки йўл турарди: бири сувсиз саҳродан ўтади ва иккинчиси дарё йўли. Қайси биридан юришимизни билмай анча иккилашиб турдик. Ниҳоят, дарё йўлидан жўнаб, «Ассувон» деб аталувчи шаҳарга келдик. Нил дарёси мана шу шаҳарнинг жанубида жойлашган тоғ дараларидан оқиб келади. Айтишларича, кемалар бу ердан юқорига суза ол-

майди, чунки сув тор дарадан ўтиб, баланд қоя устидан отилиб тушади. Бу шаҳардан тўрт фарсанг масофада Нуба мамлакати жойлашган. Бу мамлакат аҳолиси тарсо динидадир. Доимо Нуба малики тарафидан Миср сultonига ҳадялар узатилиб туради ва икки ўргада лашкарлар бошқа мамлакат ҳудудига бостириб кирмаслиги ҳақида аҳдномалар тузилади. Ассувон шаҳри ғоят даражада мустаҳкам. Нуба тарафдан ҳужум қилиб қолмасликлари учун вилоят ва шаҳарни кучли қўшин ҳимоя қилиб туради. Шаҳар рўбарўсида Нил дарёси ўртасида орол бор. Чорбогга ўхшаган бу оролда хурмозор ва зайдунзорлар, бошқа турли дараҳт ва экинлар бор. Чифир ёрдамида сув чиқаришади. Хуллас, жуда сердараҳт жой экан.

Биз бу ерда йигирма бир кун туриб қолдик, чунки олдимизда бепоён сахро ястаниб ётар, денгиз соҳилига-ча икки юз фарсанг масофа бор эди. Бу пайт ҳожилар қайтиб келадиган мавсум бўлиб, улар одатда туяларда келишарди. Биз тия кироя қилиб кетмоқ мақсадида туюкашларнинг қайтишини кутардик. Мен Ассувонда бўлганимда Абу Абдуллоҳ Муҳаммад ибн Филиж исмли киши билан танишиб қолдим. У порсо ва ҳимматли одам бўлиб, мантиқ илмидан хабардор эди. У менга тия кироя қилишга, ҳамроҳлар тонишга ва йўл анжомларини ҳозирлашга ёрдам берди. Мен бир ярим динорга тия кироя қилиб, тўрт юз қирқ иккинчи йил рабиъулаввал ойининг бешинчи куни (1050 йил, 29 июль) бу шаҳардан жўнаб кетдим. Йўл жануб тарафга кетарди. Саккиз фарсанг йўл босиб, Зайқа деган манзилга етиб келдим. Бу ер сахро ўртасида бир дара каби, икки томондан худди девордек тоғлар тўсиб туарди. Даранинг кенглиги юз арш келади. Ўртасида кудук қазилган, суви кўп, аммо яхши эмас. Бу манзилдан нариёғи беш кунлик йўлгача сувсиз сахродир. Шу сабабли ҳар бир йўловчи мешларга сув тўлатиб олди ва йўлда давом этдик.

Ниҳоят, Ҳавзаш деган манзилга етиб келдик. Тоги тошлок бўлиб, иккита ёриқдан сув оқиб тушар ва пастдаги чукурда тўпланар эди. Суви яхши экан. Ҳамроҳларимиздан бири ёриқ олдида туриб, туялар учун сув олди. Етти кундан бери туялар сув ичмаган ва ўт емаган, чунки йўлимизда униси ҳам, буниси ҳам учрамаган эди. Бир кеча-кундузда туяларга бир маротаба дам берардик. Қуёш қаттиқ қиздира бошлагандан то намозгар найтигача дам олиб, сўнгра йўлга тушардик. Манзиллар-

нинг қай ахволдалиги бизга маълум эди. Баъзи жойларда тўхтаганимизда ҳатто олов ёқишига ҳеч нарса топилмасди. Манзил теварагидаги тую тезакларини териб ўтиб, ўзимизга бирон таом ҳозирлардик. Туялар ҳам, агар танбаллик қилсалар ташнилиқдан ҳалок бўлишларини билгандай, жуда тез юришар, уларга шигов бермоққа ҳам ҳожат йўқ эди. Бу биёбонда на бир йўл ва на унинг аломати кўринади, аммо туялар тўғри йўналишни ўзлари топишар ва ҳамиша машриқ тарафга қараб юришар эди. Баъзан ўн беш фарсанг йўл юриб, оз-моз сувга дуч келардик, у ҳам шўр бўларди. Баъзан ўттиз-қирқ фарсанг масофада ҳам бир қатра сув топилмасди.

Тўрт юз кирқ иккинчи йил рабиъулаввал ойининг йигирманчи куни биз Айзоб шахрига етиб келдик. Ассувондан Айзобгача ўн беш кун йўл юрдик ва бу масофа тахминан икки юз фарсангdir. Айзоб шахри дengиз соҳилида жойлашган. Бу ерда жоме масжиди бор. Шахар Миср сultonнига қаравши бўлиб, аҳолисидан беш юз нафари эркак. Бу ерда божгоҳ жойлашган. Чунки, бу ерга Ҳашабистон, Занжибар ва Ямандан кемалар келади. Келтирилган товарларни туяларга юклаб, биз ўтган саҳро йўли билан Ассувонга олиб боришиади. Ассувонда яна кемаларга юклаб, Нил орқали Мисрга элтишиади. Қибла тарафга юзланганда, бу шаҳарнинг ўнг томонида тоғ кўринади. Тоғнинг ёнбошида серўт яйловлари бўлган улкан чўл ястаниб ётиби. Бу чўлда «Баджолар» деб аталувчи катта қабила яшайди. Уларнинг ҳеч қанақа дини йўқ, ҳеч қайси пайғамбар ёки авлиёга иймон келтиришмаган. Сабаби уларнинг обод вилоятлардан узоқда яшашларидир. Қабила макон тутган саҳронинг узунлиги минг фарсангдан зиёд ва эни уч юз фарсангdir. Шунчалик кенг жойда бор-йўғи иккита кичкина шаҳарча бор. Бу саҳро бўйига Мисрдан Ҳабашистонга, яъни шимолдан жанубга қараб, энига эса Нурадан Кулзум дengизига, яъни гарбдан шарққа қараб чўзилган. Баджолар шу кенг жойда яшашади. Улар ёмон одамлар эмас, ўғрилик ё талончилик қилишмайди. Фақат чорвачилик билан шуғулланишиади. Мусулмонлар ва бошқалар уларнинг болаларини ўғирлашади ва Ислом шаҳарларига элтиб сотишади.

Кулзум дengизи қўлтиқ бўлиб, Адан вилояти ёнида оқёнусдан ажралиб, то Кулзум шахригача шимолга қараб чўзилган. Айтишларича, бу дengизда уч юздан ортиқ орол бор экан. Оролларга кемалар қатнаб, ёф ва курут

олиб келишади. Чунки, бу оролларда сигир ва қўйлар кўп экан. Эштишимча, ороллар ахолиси мусулмон бўлиб, баъзилари Мисрга, қолгани Яманга бўйсунар экан.

Айзоб шахрида қудук ва булоқлар йўқ. Бу ерда ёмғир сувини истеъмол қилишади. Ёғин ёғмайдиган пайтларда баджолар сув келтириб сотишади. Биз бу ерда уч ой муддат яшаганимизда бир меш сув учун бир дирҳам, баъзан икки дирҳам тўлардик. Бунча узок туриб қолганимизнинг сабаби кемамиз жўнаб кетолмагани эди. Чунки, шамол доимо шимол тарафдан эсар, бизга эса жанубий шамол керак эди. Маҳаллий одамлар мени қўришганда: «Бизга хатиб бўлгин», деб таклиф қилишди. Мен рад қилмадим ва то қулай мавсум келиб, кемада шимолга жўнаб кетгунимизча уларга хатиблик қилдим. Биз у ердан Жиддага¹¹³ келдик. Айтишларича, бу атрофдаги биёбонда зотдор таялар етиштирилар, уларни Миср ва Хижозга элтишаркан. Айзобда бўлганимда мен сўзига ишонадиган одам шундай ҳикоя қилиб берди: «Бир йили бу шаҳардан кемалар Хижоз сари йўлга тушди. Кемаларда Макка амири учун таялар олиб кетишаётган эди. Мен кемадаги йўловчилардан бири эдим. Таялардан бири ўлиб қолди, одамлар унинг лошини денгизга улоқтиришди. Шу он уни каттакон бир балиқ ютди. Таянинг фақат бир оёғигина унинг оғзидан чиқиб турарди. Бошка бир балиқ пайдо бўлиб, тая ютган балиқни бутунича ўз комига тортди». Ўша балиқни «қараш» деб аташаркан.

Мен бу шаҳарда Хурросонда «шафак» деб аташадиган балиқ пўстини кўрдим. Олдин уни Хурросонда кўрганимда бирон тур калтакесакнинг териси бўлса керак, деб ўйлаган эдим. Энди эса унинг балиқ пўсти эканини билдим, чунки сузгичлари ҳам бор эди.

Мен Ассувонда бўлганимда бир дўстим бор эди. Исли, олдин ҳам зикр қилиб ўтганимдек, Абу Абдуллоҳ Мұхаммад ибн Филиж эди. Мен Айзобга жўнаганимда у дўстона мурувват кўргузиб, менга Айзобдаги ўз вакили номига бир хат ёзиб берган эди. Хатда: «Носир нимаики сўраса бериб, эвазига фақат олгани хақида тилхат ёздириб олгин», дейилган эди. Айзобда уч ой туриб қолганимизда мен бор маблағимни сарфлаб тугатдим ва ноиложлигимдан хатни ўша одамга элтиб бердим. У олижаноб одам экан ва менга шундай деди: «Худо ҳаққи, менда унинг жуда кўп моллари бор. Сенга хоҳлаган нар-

сангни бераман, фақат тилхат ёзиб берсанг бўлди». Мен Муҳаммад Филижнинг олиҳимматлигига қойил қолдим. Мендан бирон манфаат кўрмаган бўлса ҳам, шунча яхшиликлар қилди. Агар мен диёнатсиз одам бўлиб, фурSATdan фойдаланиб қолишни хоҳлаганимда, ўша хат туфайли бу одамдан кўп моллар олишим мумкин эди. Лекин мен ундан фақат юз ман ун олдим. Бунча миқдордаги ун ҳам бу ерда арzon эмасди. Мен олганим ҳакида тилхат ёзиб бердим ва у одам тилхатимни Ассувонга жўнатди. Мен Айзобдан жўнаб кетмасимдан бурун Муҳаммад Филижнинг қўйидаги мазмундаги жавоб хати етиб келди: «У сендан қанча миқдорда мол сўрамасин, айтганини менинг ҳисобимдан бергин. Ўз молингдан берсанг ҳам, кейин мен сенга тўлайман».

Бу ҳикояни келтиришдан мақсадим шуки, то ўкувчилар инсон инсонга эътимод қилишини билиб қўйсилар. Хайр-саҳоват ҳамма жойда бор, олижаноб одамлар доимо бўлган ва бўлишади.

Жидда дengиз соҳилидаги мустаҳкам девор билан ўраб олинган катта шаҳардир. У дengизнинг шимолий соҳилида жойлашган. Шаҳарда беш минг эркак аҳоли яшайди. Чиройли бозорлари бор, жоме масжиди шарқ тарафдадир. Шаҳар ташқарисида «Расулуллоҳ алайҳиссолату вассаллам масжиди» деб аталувчи масжиддан бошқа бирон иморат йўқ. Икки дарвозаси бор: бири шарқий дарвоза бўлиб, Макка тарафга қараган, фарбий дарвоза эса, дengиз тарафдадир. Агар Жиддадан дengизни ёқалаб, жанубга юрilsа, Яманга борилади. Яманнинг Саъда¹¹⁴ шахри бу ердан эллик фарсанг масофада жойлашган. Шимол тарафга қараб юрilsа, Ҳижознинг Жор шаҳрига борилади. Жиддада дарахт ва экинзорлар йўқ. Зарур нарсаларни қишлоқлардан келтиришади. Бу ердан Маккагача ўн икки фарсангдир. Жидда амири Макка амирига бўйсунади ва унинг номи Тожулмаъоли ибн Абулфутухдир. Мен Жидда амири қабулида бўлдим. Менга ҳурмат кўрсатиб, бож тўлашдан озод қилди. Ҳатто Маккага «Бу одам донишманд, ундан ҳеч нарса олмаслик керак», деган мазмунда хат жўнатди.

Жума куии намозгар пайти мен Жиддани тарқ қилдим ва жумодилохир ойи сўнггида якшанба куни Макка дарвозаси олдига етиб келдим. Ҳижоз ва Яман вилоятларидан жуда кўп халқ ражаб ойининг биринчи куни умрахи¹¹⁵ адo этиш учун бу ерга йиғилишган эди. Бу пайт

худди рамазон ҳайити ва ҳаждагидек одам ниҳоятда гавжум бир мавсумдир. Йўл яқин ва қулай бўлгани учун хижозликлар ва яманликлар йилига уч бор келишади.

Маккаи Мукаррама таърифи

Макка шаҳри баланд тоғлар ўртасида жойлашган. Қайси томондан борилмасин, то яқин келгунча шаҳар кўринмайди. Макка яқинидаги тоғларнинг энг баланди «Абуқубайс» деб аталади ва гумбаз каби думалоқдир. Агар ёнбағридан туриб камондан ўқ узилса, тепасигача етади. Бу тоғ шаҳарнинг шарқ тарафидадир. Тепасида бир тош хужра бўлиб, айтишларича, уни Иброҳим алайхиссалом қурган экан. Тоғ оралиғидаги водийда шаҳар жойлашган, эни ва бўйининг узунлиги икки ёй ўқи етадиган масофадан зиёд эмас. Масжид ал-Ҳарам водий ўртасида жойлашган ва унинг атрофини шаҳар кўчалари ва бозорлар ўраб олган. Масжид ал-Ҳарамнинг ғарб томондаги «Боби Иброҳим» деб аталувчи дарвозаси олдиғаги қудук атрофида бир неча баланд ва сершоҳ дараҳт борлигини айтмаса, шаҳарнинг бошқа жойларида дараҳт кўринмайди. Масжид ал-Ҳарамнинг шарқ томонида катта бозор бўлиб, у жанубдан шимолга қараб чўзилган. Бозорнинг жанубий чеккаси Абуқубайс тоғига бориб тақалади. Тоғ ёнбағридаги тошларни тартиб билан териб, зинапояга монанд қилишган. Одамлар унинг поғоналирига чиқиб, дуо ўқишиди. Бозорнинг шимол томонида Марво тоғи жойлашган бўлиб, у қадар баланд эмас. Шаҳар ичидаги бу тоғнинг тепасига уйлар қурилган. Сафодан Марвога югуриш деганда, ушбу бозорнинг у чеккасидан бу чеккасига югуриш тушунилади.

Маккадан ярим фарсах масофада, барча йўлларда маҳсус белгилар қўйилган ва масжидлар қурилган. Умрани адо этиш учун узоқдан келган одамлар бу ерда эхром кийишади. «Эхром киймоқ» деб, тикилган либосларни ечиб, бир парча матони белга ўраш ва яна бошқа мато ёки чодрага ўраниб олишга айтилади. Шундан кейин баланд овозда «Лаббайка, Оллоҳумма, лаббайка», деб хитоб қилиб, Макка сари юришади. Агар кимки ўзи Маккада бўлиб, умра қилмоқчи бўлса, йўлдаги маҳсус белги қўйилган жойгача боради ва эхром кийиб, «Лаббайка» деб хитоб қилгачгина, умра қилиш учун Маккага киради.

Зиёратчи шаҳарга киргач, Масжид ал-Ҳарамга боради. Ўнг томондан масжид атрофини айланиб чиқа бошлиди ва бунда Каъба доимо унинг чап томонида бўлади. Ҳажарул Асвад¹¹⁶ турган руқн¹¹⁷ ёнига келгач, қора тошини ўпади. Тош ёнидан ўтиб, шу тарзда яна айланиб чиқади ва тағин Ҳажарул Асвад ёнига келиб, уни ўпади. Мана шу бир тавоф ҳисобланади. Шу тариқа етти марта тавоф қилинади: уч марта югуриб ва тўрт мартасида оҳиста юриб. Тавоф тугагач, Иброҳим алайҳиссалом мақомига келишади. Каъба рўбарўсидаги мақом орқасида туришади ва бунда мақом Каъба ва зиёратчи ўртасида бўлади. Бу ерда «тавоф намози» деб аталувчи икки ракат намоз ўқишади. Сўнгра Замзам кудуфи жойлашган бўлмага кириб, сувидан ичишади ё юзларига сепишади. Масжид ал-Ҳарамдан Бобуссафо эшиги орқали чиқишиди. Бу эшикдан чиқсан жойда Сафо тоғи жойлашган. Зиёратчилар Сафо тоғига кўтарилгач, Каъба тарафга караб, маълум дуоларни ўқишади. Дуохонликдан сўнг пастга тушиб, бозор орқали Марвога боришади, яъни жанубдан шимол томонга караб юришади. Бозордан ўтишаркан, юзларини Масжид ал-Ҳарам эшиклари томон қаратишади. Бу бозордан Расул алайҳиссалоту васаллам югуриб ўтган ва бошқаларни ҳам югурмокка ундалан. Бозорнинг узунлиги эллик қадам ва икки тарафида тўртта минора бор. Одамлар Сафо тоғидан югуришганда бу ердаги икки минора орасидан ўтишади ва то бозорнинг нариги чеккасидаги икки минора оралиғигача югуриб боришади, сўнгра оҳиста юриб, Марво тоғига келишади. Погоналарга етгач, тепага чиқиб, маълум дуоларни ўқишади ва орқага қайтишади. Боз ҳам бозордан ўтишади. Шу тарзда тўрт марта Сафодан Марвога ва уч марта Марводан Сафога бориб, бозордан жами етти бор ўтишади.

Марво тоғи ёнбағрида бир-бирига рўпара йигирма дўкон бор. Буларда ҳожилар соч олдиришади. Умра тамом бўлиб, Ҳарамдан чиқишигач, шарқ томондаги «Суқулатторин»¹¹⁸ деб аталувчи катта бозорга боришади. Гўзал қилиб солинган бу бозорда асосан дорифурушлар савдо қилишади. Маккада иккита ҳаммом бўлиб, заминига бир хил яшил тош ётқизилганки, уни қайроқтош сифатида ҳам ишлатса бўлади. Менинг тахминимча, Макка шаҳрида икки мингга етар-етмас туб жой эркак киши бор. Қолган беш юз киши муҳожир ва мужовирлардир. Ўша пайтда бу ерда қаҳатчилик бўлиб, ўн олти ман буғдой

бир мағриби динор турарди. Аҳолининг бир қисми шаҳарни тарк қилган. Маккада Хуросон, Мовароуннахр, Ироқ ва бошқа мамлакатлардаги ҳар шаҳарнинг ўз карвонсаройи бўлиб, бу пайтда уларнинг аксари вайронга ҳолида эди. Бағдод халифалари бу ерда жуда кўп иморатлар ва гўзал бинолар курдиришган. Аммо биз борган пайтимизда буларнинг баъзилари хароб бўлган, баъзилари эса айрим одамларнинг мулки бўлиб қолган эди.

Маккадаги қудуқларнинг суви ўйр, ичиб бўлмайди. Аммо жуда кўп чукур ҳовузлар қазиб, катта сув омборлари бунёд этишганки, уларнинг ҳар бирига ўн минг динор сарфланган. Буларни ёғингарчилик пайти тоғ дараларидан оқиб тушадиган сувга тўлдириб олишади. Аммо биз борган пайтимизда ҳаммаси бўм-бўш эди. Адан амирларидан бири – уни Шоддил ўғли деб аташарди – Маккага ер остидан сув келтиришга жуда кўп пул сарфлаган. Арафотда бу сувдан экинзор ва боғларни суғоришарди. Бу ерда полизлар кўплигидан Маккага сув кам колади ва у ҳам шаҳарга етиб келмайди. Сув етиб кела-диган жойда ҳовуз қазилган. Ҳовузга тўпланадиган сувни мешкобчилар шаҳарга элтиб сотишади. Шунингдек, йўлларда ҳам сув сотишади. Ярим фарсанг масофада «Бираззоҳид» деб аталувчи қудук бор. Ёнида ажойиб масжид бор. Бу қудуқнинг суви ширин ва мешкобчилар шаҳарга келтириб сотишади.

Макка оби ҳавоси ғоят иссик бўлади. Қадимги йил хисоби бўйича баҳманмоҳ (январ)да мен бу ерда янги узилган бодринг ва бақлажонни кўрдим. Ниҳоят, мен тўртинчи маротаба Маккага келиб, тўрт юз қирқ иккинчи йил ражаб ойи бошларидан (1050 йил, ноябр) то зулҳижжа ойининг йигирманчисигача мужовир бўлиб яшадим. Эски тақвим бўйича фарвардин ойининг ўн бешларида (апрел) узум пишди ва қишлоқлардан келтириб шаҳар бозорларида сота бошлишди. Ўрдибехишт ойида (май) қовун мўл бўлиб қолди. Ҳатто қишида ҳам бу ерда ҳар хил мевалардан топилади ва дўконлар бўшаб қолмайди.

Арабистон ва Яман таърифи

Маккадан жануб томонга қараб юрилса, бир манзилдан сўнг Яман вилояти бошланади ва бу вилоят замини то денгиз бўйигача чўзилган. Яман ва Ҳижоз ерлари ўзаро туташган ва ҳар икки вилоятда араб тилида сўзлашишади. Яманини бошқачасига «Ҳимяр»¹¹⁹, Ҳижозни эса «Араб» деб ҳам атashади. Ҳар икки вилоятни уч тарафдан денгиз суви ўраб олган ва шунинг учун бу замин оролсифатдир. Арабистонда обод жойлар кам. Аҳолиси асосан сахройилар бўлиб, улар чодирларда яшаб, чорвачилик билан шуғулланишади. Ҳимяр ўлкаси уч қисмдан иборат. «Тиҳома» деб аталувчи қисми Қулзум денгизи соҳилида жойлашган. Бу ерда шаҳарлар ва обод жойлар кўп. Саъда, Зобид¹²⁰, Санъо¹²¹ ва бошқа бир қанча шаҳарлар ушбу водийда жойлашган. Ҳимярнинг бошқа қисми тоғликлардан иборат бўлиб, «Нажд» деб аталади. Бу ерда кимсасиз ва совуқ даралар, мустаҳкам қальдалар бор. Бу ўлканинг учинчи қисми машриқ тарафдадир. Бу ерда шаҳарлар кўп, Нажрон, Аср ва Беша шулар жумласидандир. Бу заминда ҳар бир ноҳиянинг ўз малики ёки раиси бўлиб, ҳамма бўйсунадиган султон ёки ҳукмдор йўқдир.

Гумдон қасри Яманда, Санъо шаҳрида жойлашган. Ҳозирда ундан фақат шаҳар ўртасидаги бир тепалик қолган. Бу ерликларнинг, айтишича, бу қаср эгаси жаҳонга ҳукмрон бўлган эмиш. Бу тепаликка жуда кўп хазина ва дафиналар кўмилган дейишади, аммо на султон ва на раият бу бойликларни қазиб олмоққа рафбат қилмайди. Санъо шаҳрида ақиқка ишлов беришади. Ақиқ тоғдан олинадиган бир хил тошдир. Уни қумга булаб, оловда тоблашади. Сўнгра яна қумга булаб, офтобга қўйишади. Шундан кейин чархда ишлов беришади. Мен Мисрда бўлганимда султонга Ямандан келтирилган шамширни кўрдим: унинг дастаси ёқутга ўхшаш қизил ақиқ парчасидан ясалган эди.

Масжиди Ҳарам ва қаъба хонаси таърифи

Аввал айтиб ўтганимиздек, Қаъба хонаси Масжиди Ҳарам ўртасида ва Масжиди Ҳарам Макка шахри ўртасидадир. Унинг узунаси шарқдан фарбга, эни шимолдан жанубга чўзилган. Аммо масжид девори тўғри эмас, бур-

чаклари ёйик бўлгани учун айланада шаклга мойилдир. Зеро, масжиднинг қай бир жойида туриб намоз ўқишиша ҳам, Каъбага юзланмоқ лозим. Масжиднинг энг узун томони Иброҳим алайҳиссалом дарвозасидан Бани Ҳошим дарвозасигача бўлиб, тўрт юз йигирма тўрт аршдир. Эни эса шимол тарафдаги Бобуннадвадан жанубдаги Бобуссафогача уч юз тўрт аршдир. Айланага мойил бўлгани учун баъзи жойлари торроқ ва айрим жойлари кенгрок кўринади.

Масжид теварагига учта мармар сутунли усти ёпик рavoқ тикланган. Шифтининг масжид ҳовлиси тарафдаги узун томонида кирқ бешта ва энида йигирма учта тоқи қилинган. Мармар сутунлар жами саксон тўрттадир. Айтишларича, буларнинг ҳаммаси Бағдод халифасининг фармонига кўра денгиз йўли орқали Шомдан келтирилган. Яна ҳикоя қилишларича, сутунларни Маккага келтиргач, кемаларга боғланган ва кела-келгунча узилиб-титилиб кетган арқонларни сотишибди. Бу савдодан олтмиш минг мағриби динор олишибди. Ушбу сутунлардан бири Бобуннадва ёнида бўлиб, қизил мармардандандир ва, айтишларича, у вазни баравар тиллага сотиб олинган. Шундай битта сутун вазни тақрибан уч минг мандир. Масжида Ҳарамга кириладиган ўн саккиз жой устига тоқилар қилинган бўлиб, уларни мармар сутунлар кўтариб туради. Биронтасига эшик ўрнатилмаган ва истаган пайт бемалол кириш мумкин.

Машриқ томонда тўрт дарвоза бор. Шимолий бурчакда уч тоқили Бобуннаби¹²² жойлашган. Шу деворнинг жанубий бурчагида бошқа икки тоқили дарвозани ҳам «Бобуннаби» деб аташади. Бу икки дарвоза орасидаги масофа юз аршдан кўпроқдир. Бу дарвозалардан чиқсан жойда атторлар бозори жойлашган. Расул алайҳиссаломнинг уйи шу ерда бўлган ва намозга ушбу дарвозадан киргандар. Бу дарвозадан нарироқда, худди шу шарқий деворда Боби Али жойлашган. Бу дарвозадан амиралмўъминин Али каррамаллоҳу важҳаҳу намозга кирган ва уч тоқилидир.

Жанубий деворда, яъни масжиднинг узун томонида етти дарвоза бор. Ярим доира кунжда жойлашган биринчи Бобудаққоқин¹²³ бўлиб, у икки тоқилидир. Фарб томонга бир оз юрилса, бошқа икки тоқили Бобулфасонин деб аталувчи дарвоза бор. Ундан нарида беш тоқили Бобуссафо бўлиб, унинг ўртадаги тоқи улкан ва икки

ёнбошида иккитадан кичик токилар қилинган. Расулуллоҳ алайҳиссалом шу дарвозадан чиқиб, ибодат қилмок учун Сафо тоғига борган. Ўртадаги тоқи бўсағаси каттақон оқ тошдан. Аввал бу ерда қора тош бўлиб, Пайғамбар алайҳиссалом табаррук оёқларини қўйгандан, муборак оёқ излари муҳрланиб қолган. Бу изни қора тошдан авайлаб қирқиб олиб, оқ тошга ўрнатгандар. Оёқ бармоқлари масжид томонга йўналган. Баъзи ҳожилар оёқ изига юзларини босишади, баъзилари оёқ қўйишади. Мен табаррук изга юзимни қўйишни вожиб билдим. Бобуссафодан фарб томонга бир оз юрилса, икки тоқили Бобуссатво, ундан нарироқда яна икки тоқили Бобуттаммоприн, сўнгра эса Бобулмаъмил жойлашган. Бу икки тоқили дарвоза қархисида Абужаҳлнинг¹²⁴ уйи бўлиб, эндиликда бу ер ҳожатхонадир.

Масжид эни бўлмиш фарбий деворда уч дарвоза бор. Биринчиси жанубий кунждаги икки тоқили Боби Урватдир. Девор ўртасида уч тоқили Боби Иброҳим алайҳиссалом жойлашган. Шимолий деворда эса тўртта дарвоза бор. Фарбий кунжда якка тоқили Бобулвасит¹²⁵, нарироқда шарқ тарафда ҳам якка тоқили Бобулмушоварат¹²⁶ жойлашган. Масжиднинг шимоли-шарқий кунжида Боби Бани Шайба бор.

Каъба хонаси масжид ичкарисидадир. У чўзиқ мурраббаъ шаклида бўлиб, узунаси шимолдан жанубга, эни шарқдан фарбга чўзилган ва узунаси ўттиз, эни ўн олти аршдир. Эшиги шарқ тарафдадир. Ичкари кирганда ўнг қўл тараф рукни ироки, чап қўл тараф рукни Ҳажарул-Асваддир. Жанубий-фарбий бурчакни «рукни ямани», шимоли-фарбий бурчакни эса «рукни шоми» деб аташади. Ҳажарул-Асвад девор бурчагидаги каттакон тошга ўрнатилган бўлиб, агар қоматдор одам ёнида турса, унинг қўкрагига тўғри келади. Ҳажарул-Асваднинг узунлиги бир қаричу тўрт бармок, эни саккиз бармок бўлиб, шакли думалоққа мойилдир. Ҳажарул-Асваддан хона эшиигигача тўрт арш бўлиб, бу оралиқни «Мултазам» деб аташади. Хона эшиги ердан тўрт арш баланд қилинган ва ерда турган одамнинг бўйи бўсағага етади. Ёғоч нарвон ясашган ва лозим пайтларда уни қўйишади ва одамлар кўтарилиб, Каъба хонасига киришади. Нарвон кенг бўлгани туфайли ундан ўн одам ёнма-ён кўтарилиб — туша олади. Хона сатҳи ҳам шунча миқдорда баланд кўтарилиган.

Каъба эшигининг таърифи

Бу сожъ¹²⁷ дарахти ёғочидан ясалган икки табақали эшик бўлиб, баландлиги олти ярим арш ва ҳар табақаси-нинг эни биру уч чорак газ, яъни иккала табақа биргаликда уч ярим газ келади. Эшикнинг ўзига ва ундан тепароққа ҳам ёзув битилиб, кумуш доирачалар ва накшинкор лавҳалар ўймакорлик қилинган. Лавҳалар эритилган олтин ва кумуш сувини юргизиб битилган ва ушбу оят охиригача битилган: «Инно аввало байтин вузиъа мин наси аллазий би бакка». ¹²⁸ Фазнадан жўнатилган иккита катта кумуш ҳалқа эшикнинг икки табақасига қоқиб қўйилган. Ҳар кимнинг ҳам қўли уларга етавермайди. Улардан кичикроқ яна иккита кумуш ҳалқа табақаларга қоқилган бўлиб, буларга истаган кишининг қўли bemalol етади. Пастки икки ҳалқага катта кумуш қулф солинган ва унинг воситасида эшик бекилади. Қулфни ечмас эканлар, эшик очилмайди.

Каъба ичкариси таърифи

Каъба девори эни, яъни қалинлиги олти қаричдир. Хона заминига оқ мармар қопланган. Хонада учта бўлма бор ва бири эшик қаршисида, қолган иккитаси шимол тарафдадир. Томни кўтариб турган ёғоч сутунлар сожъ дарахтидан ясалган ва битта айланасини истисно этганда барчаси чор кирралидир. Шимол тарафда ерга ётқизилган узунчоқ қизил мармар тахтacha бўлиб, айтишларича, Расул алайҳиссалом шу ерда намоз ўқир эканлар. Бундан воқиф бўлган ҳар бир кимса худди ўша жойда намоз ўқимоққа интиларди.

Хона деворлари рангбаранг мармар билан қопланган. Farb тарафда олтига кумуш меҳроб бўлиб, деворга мих билан қоқилган. Уларнинг ҳар бири одам бўйи баробарида, зар ва кумуш, ҳал ишлатиб обдан безатилган. Меҳроблар ердан баландроқдадир. Деворларнинг ердан тўрт арш баландликкача бўлган қисми оддий ва безаксиз, ундан тепаси эса то шифтгача мармар билан қопланиб, зарҳал накшлар чизилган. Биттаси рукни ироки, иккинчиси рукни шоми ва учинчиси рукни яманида жойлашган ҳар уч бўлманинг бурчакларида деворга кумуш мих билан иккитадан ёғоч тахта қоқиб қўйилган. Бу тахталар Нуҳ алайҳиссалом кемасидандир. Ҳар тахта-

нинг узунлиги беш газ ва эни бир газдир. Ҳажарул-Асвад ортидаги бўлмага қизил ипак тўшалган. Каъбага кирганда ўнг томон бурчакда эни ва бўйи уч газга уч газ бўлган бир бўлма бўлиб, унда томга олиб чиқадиган зина жойлашган. Бўлманинг бир тавакали нуқрагин эшигини «Бобурраҳмат» дейишади ва унга кумуш қулф солинган. Томга чиқишида шифтда яна бир кўтарма эшик бўлиб, унинг ҳар икки томонига кумуш қопланган. Каъба шифти ёғочдан килинган, лекин бутун юзасига ипак қоплангани учун ёғоч кўринмайди. Олд девор тепасида, шифт тагида заррин китоба¹²⁸ бўлиб, унга Маккани Аббосий халифалар кўлидан тортиб олган Миср сultonни номи битилган. У ал-Ализуддиналлоҳдир¹³⁰. Яна шу деворга қоқилган тўртта катта кумуш тахталарнинг ҳар бирига ўз даврида ушбу тахталарни узатган Миср сultonлари номлари ёзилган.

Сутунлар орасида учта кумуш қандил осилган. Каъба томи билурга ўхшайдиган Яман мармари билан қопланган. Хонанинг тўрт бурчагида тўртта дераза бор ва уларга ойна қўйилган бўлиб, ёруғлик шулардан тушади, аммо ёмғир ўтолмайди. Шимолий девор ўртасида новдорн ўрнатилган ва узунлиги уч газдир. Унга бошдан охир заррин хат ёзилган.

Шимол тарафда, Каъба ташқарисида бир ярим газ баландликда девор тикланган. Ёй шаклидаги бу деворнинг икки чеккаси Каъба бурчакларига тақалган. Девор ўртаси эса Каъба деворидан ўн беш газ масофададир. Девор ва унинг олдида майдонча рангоранг нақшли мармарлар билан қопланган ва бу жойни «Хижр» деб аташади. Томдаги сув тарновдан Хижрга оқиб тушади ва тарнов остига меҳроб шаклидаги яшил тош қўйилган. Бу тош катталиги шу қадарки, унинг устида намоз ўқимок мумкин. Иброҳим алайҳиссалом мақоми Каъбадан шарқ тарафдадир. Бу бир тош бўлиб, унда Иброҳим алайҳиссаломнинг икки оёфи изи бор. Мақом ва Каъба оралиғи уч аршдир.

Замзам қудуғи таърифи

Замзам қудуғи Каъба хонасидан шарқ тарафда, яъни Ҳажарул-Асвад турган бурчак тўғрисидадир. Хона ва қудук оралиғи қирқ олти аршдир. Қудук оғзи уч ярим газга уч ярим газ бўлиб, суви шўрроқ, лекин ичса бўлади. Қудук атрофи икки ярим арш баландлиқдаги оқ

мармар ихота билан ўраб олинган. Ихотанинг тўрт тарафига ҳовузлар бўлиб, уларга сув қўйишади ва одамлар таҳорат учун шу ҳовузлардан сув олишади. Тўкилган сув пастга оқиб кетиши учун қудуқ ва ихота оралиғига бўйра тўшалган. Ихота эшиги шарқ томондадир. Замзам ихотаси қархисида, ундан шарқ томонда яна бир мурабба шаклидаги гумбазли бино бўлиб, уни «Сикоятулҳожи»¹³¹ деб аташади. Бу ерда сув тўлдирилган хумлар бор ва ҳожилар улардан сув ичишади. Сикоятулҳожидан шарқ томонда узун қилиб солинган уч гумбазли бино бўлиб уни «хизонатуззайт»¹³² деб аташади. Бу ерда шам, мой ва қандилларни сақлашади.

Каъба атрофига сутунлар тикланган; бир-бирига тўсинлар билан бирлаштирилган. Бу тўсинлар безак ва нақшлар билан безатилиб, кечаси шам ва чироқлар осиш учун ҳалқа ва илмоқлар ўрнатилган. Уларни «машоъил» деб аташади. Каъба деворидан мазкур машоъилгача бир юз эллик газ масофа бўлиб, у ер тавоғ қилинадиган жойдир.

Шундай қилиб, Масжиди Ҳарам саҳнида Каъбаи Муаззам шаррафаҳуллоҳи таолодан бошқа яна учта уй: Замзам ихотаси, Сикоятулҳожи ва Ҳизонатуззайт бор. Масжид атрофидаги усти ёпик айвон деворлари ёнига Мариф, Миср, Шом, Рум, икки Ирок¹³³, Хуросон, Мовароунинаҳр ва бошқа ўлкалар шаҳарларига қарашли сандиклар қўйилган.

Маккадан тўрт фарсанг шимолда Бурқа ноҳияси жойлашган. Бу ерда Макка амири ўз лашкари билан туради. Оқар сув ва дараҳтзорлари бўлган ушбу ноҳиянинг майдони эни ва бўйига икки фарсангданdir. Шу йил мен ражаб ойининг биринчи кунидан бошлаб, Маккада мувожовир бўлдим. Бу ерда бутун ражаб ойи мобайнида ҳар куни қуёш чиққанда Каъба эшигини очиш одати бор.

Каъба шаррафаҳуллоҳи таоло эшигини очиш маросими таърифи

Каъба хонаси эшигининг калити Бани Шайба деган араб қабиласида бўлиб, хонанинг хизматини ҳам шу қабила қиласиди. Бунинг эвазига улар Миср сultonидан маош ва сарполар олишади. Қабила оқсоқоли калитни доимо ўзида сақлайди. У Каъбага борганида беш-олти киши унга ҳамроҳ бўлади. Улар келишгач, ҳожилардан ўн киши таъриф қилганимиз нарвонни кўтариб келтириб,

эшик олдига қўйишади. Оқсоқол нарвондан кўтарилиб, остона олдида тўхтайди ва яна икки одам чиқиб, сарик ипак мато ёйиб, бири бу, бошқаси нариги чеккасидан ушлаб, эшикни очаётган оқсоқолни тўсиб туришади. Оқсоқол қулфни очиб, ҳалқалардан чиқариб олади. Бу пайт эшик олдига жуда кўп ҳожилар тўпланишади. Эшик очилганда, улар қўлларини кўтариб дуо ўқишади. Маккадаги барча одамлар ҳожиларнинг овозини эшитгач, Каъба эшиги очилишини билишади ва бутун халқ баланд овозда дуо ўқиб, гўё Маккага улкан ғулгула тушгандек бўлади. Сўнгра оқсоқол ичкари киради. Икки одам ипак матони олдингидек ушлаб туришади ва оқсоқол икки ракат намоз ўқийди. Ташкари чиққач, эшикнинг икки табақасини ҳам очиб, остонада турган ҳолда баланд овозда хутба ўқийди ва Расулуллоҳ алайҳиссалом ва унинг хонадонига саловот бағишлийди. Сўнгра оқсоқол ва унинг ёронлари эшикнинг икки томонида туришади ва ҳожилар хонага кира бошлайдилар. Ҳар бир ҳожи икки ракат намоз ўқиб чиқади ва бу ҳол кун ярмигача давом этади. Каъбада намоз ўқиганда эшик тарафга юзланишади, аммо бошқа тарафларга юзланиб намоз ўқимоқ ҳам раводир. Каъба одамга лиқ тўлиб, бошқа киши киришига имкон қолмагач, мен одамларни санай бошладим ва жами етти юз йигирма киши бор экан.

Яман халки ҳажга келишганида уларнинг ҳар бири хиндилар каби лунги боғлаб олишади ва соchlарини ёйиб, соколларини ўришади. Улар худди хиндилардек белларига дудама шамшир (катора) осиб олишади. Айтишларича, хиндилар асли Ямандан келиб чиққан бўлиб, «катора»нинг араблашган шакли «қаттола»дир.

Шаъбон, рамазон ва шаввол ойларида душанба, пайшанба ва жума кунлари Каъба эшигини очишади ва зулқаъда ойи бошлангач, бошқа очишмайди.

Жаъронада қилинадиган умра таърифи

Маккадан тўрт фарсах шимолда Жаъронада номли мавзеъ бор. Бу ерда Мустафо саллаллоҳу алайҳи вассалам ўз лашкари билан тўхтаб, ўн олтинчи зулқаъдада эҳром кийиб, бу ердан Маккага бориб умра қилганлар. Бу ерда иккита кудук бўлиб, бирининг номи Биъруррасул¹³⁴, иккичисиники Биъри Али ибни Абутолиб¹³⁵ саловотуллоҳи алайҳумо. Иккала кудукнинг ҳам суви ғоят ширин бўлиб, ораларидаги масофа ўн газдир. Пайғамбар бажо келтир-

ган ишлар суннат бўлганидан бу ерда белгиланган мавсумда умра қилишади. Қудуқлар яқинида бир қоя бўлиб, тошлар юзасида косага ўхшаб кетадиган чуқурликлар бор. Айтишларича, пайғамбар алайҳиссалом шу чуқурлиқда ўз қўллари билан ҳамир қорган эканлар. Одамлар бу ерга келиб, қудук сувидан олиб, чуқурликларда ҳамир қоришади. Атрофда бутазорлар кўп бўлиб, ўтин териб келишади ва ион ёпиб, уни табаррук нарса сифатида уйларига элтишади.

У ерда яна бир баланд қоя бўлиб, ривоятларга қаранганди, Билол Ҳабаший¹³⁶ унинг тепасида туриб, аzon айтган экан. Ҳануз одамлар бу қояга чиқиб, намозга чақириб аzon айтишади. Мен у ерга борганимда издиҳом ҳаддан зиёд эди. Кажавали туяларнинг ўзи мингдан ортиқ бўлиб, бошқаларининг сону саноғига етиб бўлмас эди.

Мен Мисрдан Маккага бу гал келганим йўл уч юз фарсангдир. Маккадан Ямангача ўн икки фарсанг. Арафот водийси тепаликка ўхшаш пастак тоғлар билан ўралган. Водийнинг кенглиги эни ва бўйига икки фарсангдандир. Олдин бу ерда Иброҳим алайҳиссалом бино қилган масжид бўлиб, ҳозирда фиштин минора вайронасигина сақланиб қолган. Пешин намози пайтида хатиб унга чиқиб хутба ўқииди. Сўнгра аzon айтилиб, сафарда расм бўлганидек, жамоат билан икки ракат намоз ўқишиади. Шундан сўнг хатиб туяга минади ва ҳамма машриқ томон йўл олади. Бир фарсанг масофада чоғроқ қояли тоғ бўлиб, уни «Жабалурраҳмат» деб аташади. Бу ерда тўхтабиб, то кун ботгунча ибодатга машғул бўлишади.

Шоддилнинг Адан амири бўлган ўғли водийга узок жойдан сув келтирган. У беҳисоб маблағ сарфлаб, сувни бу тоғдан Арафот водийсига оқизган ва у ерда ховузлар қаздирган. Улар ҳаж пайтида ҳожилар учун сувга тўлатиб қўйилади. Ўша Шоддилнинг ўғли Жабалурраҳмат тоғи тепасига тўрт тоқили азим иморат курдирган бўлиб, арафа куни ва кечаси унинг гумбазида кўплаб чироқ ва шамлар ёқишиади ва уларнинг ёғдуси икки фарсангдан кўриниб туради. Айтишларича, бу иморатни қуришга ижозат олиш учун у Макка амирига минг динор берган.

Тўрт юз кирқ иккинчи йил зулҳижжа ойининг тўққизинчи куни (1051 йил, 27 апрел) Оллоҳ субҳонаҳу ва таоло мадади билан мен тўртинчи маротаба ҳаж қилдим. Кун ботгач, хатиб ва ҳожилар Арафотдан бир фарсанг масофадаги Машъаралҳарамга боришади. Бу ерни «Муздалифа» деб аташади. Максурага ўхшаш бино қурилган

бўлиб, одамлар унда намоз ўқишиади. Минода шайтонга отиладиган тошларни шу ерда йиғишиади. Одатга кўра бу кеча, яъни ҳайит кечаси бунда бўлиб, бомдод намозини ўқишиади. Қуёш чикқач, ҳожилар Минога бориб, қурбонлик қилишиади. Бу ерда катта масжид бўлиб, «Хайф масжиди» деб аталади. Минода хутба ва ҳайит намози ўқиши расм эмас, чунки Мустафо соллаллоҳу алайҳи вассаллам буюрганилар. Ойнинг ўнинчи куни Минода бўлиб, тош отишади. Бу ҳолнинг шархи «Ҳажнома»да айтиб ўтилган.¹³⁷

Ойнинг ўн иккинчисида кимки ватанига қайтишга қарор қилган бўлса, шу ердан жўнаб кетади, бошқалар Маккага боришади.

Маккан Мукаррамадан қайтморим баёни

Шундан сўнг бир бадавийнинг туясини то Лаҳсогача кироя қилдим. Маккадан у ергача ўн уч кунлик йўл деб айтишиди.

Худои таоло уйи билан видолашиб, тўрт юз кирқ иккинчи йил зулхижжа ойининг ўн тўққизида жума куни, қадимги тақвим бўйича хурдодмоҳнинг бошида (1051 йил, 7 май) Маккадан йўлга чиқдим. Етти фарсанг йўл юргач, бир яйлоққа етиб келдим. Бу ердан тоғ кўриниб турарди. Тоғ тарафга қараб йўлга тушдик. Йўлимизда водий ва қишлоқлар, Биърул Ҳусайн ибн Салома деб аталувчи қудук бор эди. Ҳаво салқин бўлиб, йўл шарқ томонга кетарди.

Зулхижжа ойининг йигирма иккинчисида душанба куни Тоифга¹³⁸ етиб келдик. Маккадан бу ергача ўн икки фарсангдир. Тоиф – тоғ устида жойлашган. Хурдод ойида чунон совуқ эдики, офтобрўяда ўтиришга тўғри келарди. Маккада эса бу пайт қовун пишиғи эди. Тоиф шаҳарчасининг анорзор ва анжирзорлари жуда кўп экан. Шаҳар яқинида Абдуллоҳ ибн Аббос¹³⁹ розияллоҳу ан-хунинг қабри бор. Бағдод халифалари бу ерда катта масжид курдишишган. Қабр масжиднинг бир бурчагида, меҳроб ва минбарнинг ўнг томонида жойлашган. Одамлар масжид атрофида уйлар қуриб жойлашиб олишган.

Тоифдан чиқиб, пасту баланд тоғ йўлида давом этдик. Тез-тез кичик қишлоқ ва қўргонлар учраб турарди. Менга қоялар орасидаги вайронна бир қўргонни кўрсатишиди. Араблар: «Лайлининг уйи шу бўлган», деб ай-

тишди. Лайли ва Мажнун киссаси ғоят ажибдир. У ердан биз Мутор қалъасига етиб келдик. Тоифдан бу ергача ўн икки фарсангдир. У ердан Сурайё деб аталувчи ноҳияга бордик. Хурмозорлар жуда кўп бўлиб, экинзорларни чигир ёрдамида чиқарилган кудук суви билан суғоришаркан. Айтишларича, бу ерда ҳеч қандай ҳоким ва султон йўқ экан. Ҳар жойнинг ўз меҳтари ва раиси бўлиб, бошقا ҳеч кимга бўйсунмайди. Аҳоли талончилик ва хунрезликка машғул бўлиб, доимо бир-бирлари билан уруш ва хусумат қилишади. Тоифдан бу ергача йигирма беш фарсанг деб хисоблашади. У ердан ўтиб «Жиз» деб аталувчи қалъага келдик. Ярим фарсанг жойда тўртта қўргон бўлиб, биз улардан энг каттаси — «Хисни Бани Нусайр» деб аталувчи қўргонда тўхтадик. Камроқ бўлса-да, хурмо дараҳтлари бор экан. Биз туясини кироя қилган одамининг уйи Жизда эди. Бу ерда ўн беш кун туриб қолдик, чунки бизни нарига бошлаб борадиган ҳафир¹⁴⁰ йўқ эди. Бу ўлка бадавийларининг ҳар қабила ўз чорвасини боқадиган худудлари бўлиб, бегона худудга қадам босолмасди. Кимники хафирсиз қўрсалар, ушлаб бор-будини шилиб олишар, ҳатто кийимларини ҳам қолдиришмас эди. Шу сабабли улар еридан ўтиш учун қабила аҳлидан хафир олиш керак эди. Хафир йўл бошлаб борар ва уни «қаловуз» деб ҳам аташарди.

Иттифоқан, биз ерларидан ўтишимиз лозим бўлган бадавийлар қабиласининг (бу қабилани «Бани Савод» деб аташарди) сардори Жизга келиб қолди ва биз уни ўэзимизга хафир килиб олдик. Унинг исми Абуғоним Аббос ибн ал-Баир эди. Биз унинг ҳамроҳлигида йўлга тушдик. Бир тўда бадавий бизни кўриб, устимизга бостириб келишди. Улар, ўлжа топдик, деб ўйлашган эди. Чунки, улар ҳар бир бегона одамини ўлжа хисоблашади. Сардорлари бизга ҳамроҳлиги туфайли ҳеч нарса дейишишмади. Агар бу одам бўлмаганида, эҳтимол, бизни ўлдиришарди. Барibir буларнинг орасида ҳам бир неча муддат туриб қолишга тўғри келди. Чунки, бизни яна нарига бошлаб борадиган хафир йўқ эди.

Бу ерда биз ҳар бирига ўн динордан тўлаб, иккита хафир ёлладик. Бу пул эвазига улар бизни бошقا қабила ҳудудидан ўтказиб қўймоклари керак эди. Бу араб қабиласининг етмиш ёшли кексалари менга ўз умрлари давомида тужа сутидан бошқа овқат ейишмаганини сўзлаб беришди. Чунки, бу чўлда фақат туяларгина ея оладиган

шўрадан бошқа бирон гиёҳ битмайди. Улар ҳатто бутун олам шунақа бўлса керак, деб ўйлашаркан. Шу тарзда мен бир неча бор у қабиладан – бу қабилага ўтдим. Ҳамма жойда хавф-хатар ва таҳдида дуч келмоқ мумкин эди. Аммо Оллоҳ таборак ва таоло бизнинг бу цурхатар жойдан соғ-саломат чиқишимизни хоҳлаган экан.

Сўнгра даралар орасидаги Сўрбо деган жойга етиб келдик. Бу ерда гумбазга ўхшаган тоғлар бўлиб, буларга ўхшашини мен бошқа хеч бир вилоятда кўрмаган эдим. Баландлиги шу қадарки, ёй ўқи чўққисига етмаса керак. Товуқ тухуми янглиғ қаттиқ ва силлиқ бўлиб, ҳеч бир ёриқ ё нотекислик кўринмасди. Биз бу тоғлар ёнидан ўтиб кетдик.

Менинг ҳамроҳларим калтакесак кўриб қолсалар, тутиб олиб ейишарди, қаердаки бадавийлар бўлса, тuya сути ичишарди. Мен калтакесак ёёлмас, тuya сутига ҳам иштаҳам йўқ эди. Йўлда бир хил дараҳтлар учраб, уларнинг катталиги мошдек келадиган меваси бор эди. Мен шу мевалардан бир мунча териб, шунга қаноат қилдим. Кўп нарсаларни кўриб, азоблар чекиб, ниҳоят, бисёр мешақатлардан сўнг сафар ойининг йигирма учунчи куни (1051 йил, 8 июл) Фалажга етиб келдик. Маккадан бу ергача бир юз саксон фарсангдир. Фалаж – чўл ўртасидаги катта ноҳия, лекин ўзаро урушлар натижасида хароб ҳолга келган. Биз бўлган пайтимиизда обод жойи бўйига ярим фарсанг ва энига бир мил эди. Бу жойда ўн тўртта кўрғон бор. Одамлари ўғри, муфсид ва жоҳилдирлар. Ўн тўрт кўрғон икки мухолиф тарафга қарашли бўлиб, улар орасида мудом хусумат ва адovat мавжуддир. Улар «Биз тангри таоло Қуръонда зикр қилган Асҳоби ар-раким¹⁴¹ авлодиданмиз», деб таъкидлашарди. Бу ерда тўртта кориз¹⁴² бўлиб, суви асосан хурмозорларни суғоришга сарф бўлади. Экинзорлари баландроқда, кўпроқ қудуқ сувидан суғоришади. Дала юмушларида ҳўқиз эмас, балки туяларни ишлатишади ва мен умуман, бу ерда ҳўқиз кўрмадим. Экинзорлари кам ва ҳар одам ўзига ажратилган озгина ундан ион ёниб ейди. Кундузлари хурмо ейишади. Мен бу ерда Басра ва бошқа жойдагилардан ҳам кўра яхшироқ хурмо кўрдим. Бу ерининг одамлари юят қашшоқ ва бадбаҳтдирлар. Шу қашшоқликларига қарамай, ҳар куни уруш, адovat ва қон тўкишга машғул эдилар. Бу ерда хурмонинг «майдун» деб аталадиган навини кўрдим, ҳар донаси ўн дирҳам¹⁴³ ке-

ларди. Ўртасидаги данаги бир ярим дирҳамдан ошмасди. Айтишларича, бу хил хурмони йигирма йил сақласа ҳам, айнимас экан. Уларнинг савдо-сотифида Нишопур олтини муомала қилинади.

Мен Фалажда тўрт ой бўлдим ва бу кунларни шундай ҳолатда ўтказдимки, ундан ёмонини тасаввур ҳам қилиб бўлмайди. Икки қоп тўла китобларимни айтмаса, бошқа ҳеч қандай мол-дунём йўқ эди. Бу ернинг одамлари оч-яланғоч эдилар. Намозга борганда қилич ва қалқонини ўзлари билан олишарди. Турган гапки, булар китоб сотиб олишмайди. Биз бир масжидда яшардик. Менда бир оз шангарф ва ложувард бўёғи бор эди. Масжид деворига байт битиб, орасига баргли новданинг расмини чиздим. Улар буни кўриб, ҳайратланишиди ва бутун кўргон аҳолиси йигилиб, томошага келишди. Улар менга шундай дейишди: «Агар масжидимиз меҳробига нақшлар чизсанг, сенга юз ман хурмо берамиз». Юз ман хурмо уларнинг назарида катта бойлик эди. Чунки, мен у ерда бўлганимда қуролланган бир гурух араблар келиб, улардан беш юз ман хурмо беришни талаб қилишди. Улар рози бўлмагач, тўқнашувда кўргон аҳлидан ўн киши ўлдирилди ва келгинидилар минглаб хурмо дараҳтларини чопиб ташладилар. Шунга қарамай, ақалли ўн ман хурмо беришмади.

Мен билан шартлашишгач, меҳробга нақш солдим. Бу юз ман хурмо бизга нажот бағишлиди. Чунки, озиқовқат тонолмасдан ҳаётдан умидимизни узган ва бу саҳродан қандай чиқиб кетишимизни тасаввур ҳам қиломас эдик. Обод вилоятларга етиб олиш учун қайси тарафга қараб юрманг, хатарли ва ҳалокатли икки юз фарсанг биёбондан ўтиш керак эди. Шу тўрт ой мобайнида мен бирон марта беш ман буғдойни бир жойда кўрмадим.

Нихоят, Ямомадан карvon келди. Улар чарм олиб Лахсога элтишмоқчи экан. Чунки, Ямандан Фалажга чарм олиб келиб, тожирларга сотишарди. Бир араб мени Басрага олиб бора олишини айтди, аммо тия кироясига тўлашга ҳеч вақом йўқ эди. Бу ердан Басрагача икки юз фарсанг бўлиб, тия кирояси бир динор эди, чунки яхши түялар икки-уч динорга сотиларди. Нақд пулим бўлмагани сабабли насияга кетишга тўғри келди. Аммо: «Басрада ўттиз динор берсанггина, сени олиб борамиз», — дейишди. Басрани бир бор ҳам кўрмаган бўлсам-да,

зарурат юзасидан рози бўлдим. Араб менинг китобларимни тияга юклаб, укамни ҳам тияга миндириди. Мен пиёда йўлга тушдим. Банотуннаш¹⁴⁴ юлдузи йўналишида юрдик ва ер юзаси ҳамвор бўлиб, тоғ ва дўнгликлар йўқ эди. Ер юзаси қаттиқ бўлган жойларда (такирларда) ёмғир суви туриб қолган эди. Ҳеч жойда йўл асари кўринмаса-да, сезгилаrimизга таяниб, кечаю-кундуз йўл юрдик. Энг ажабланарлиси шунда эдики, бизда бирон белгиси бўлмаслигига қарамай, тўсатдан суви бор қудукқа дуч келиб қолдик.

Алкисса, тўрт кечаю кундуздан сўнг Яномага етиб келдик. Яномада катта ва қадимий қалья бор эди. Қалья ташқарисида шаҳар ва бозор бўлиб, бунда ҳар турли хунармандлар бор эди. Жоме масжиди жуда чиройли. Бу жойнинг амирлари қадимдан Али (р.а.) авлодидан бўлишган ва ҳеч ким бу ноҳияни улар қўлидан тортиб олмаган. Чунки, яқин атрофда қудратли султон ё подшоҳ бўлмаган. Улар зайдимазҳаб бўлиб, аzon пайтида шундай дейишади: «Мұхаммадин ва Алиййу хайрулбашар ва ҳайяала хойруламал». Бу ноҳияда оқар сувли коризлар ва хурмозорлар бор. Айтишларича, хурмо мўлкўл бўлганида минг мани бир динор тураркан. Яномадан Лахсогача кирк фарсангдир. Қишида у ёққа борса бўлади, чунки баъзи жойларда ёмғир суви бўлиб, уни ичиш мумкин. Ёзда бир қатра ҳам сув топилмайди.

Лаҳсо – чўл ўртасидаги шаҳар. Унга қайси томондан борманг, азим саҳрордан ўтишга тўғри келади. Султони бор мусулмон шаҳарларидан Лаҳсога энг яқини Басрадир. У ердан Басрагача бир юз эллик фарсангдир. Басрада ҳеч качон Лаҳсо фатҳига азм қилган султон бўлмаган.

Лаҳсо таърифи

Бу шаҳар яқинидаги маҳаллалар, қишлоқлар – бари қальасифатдир. Шаҳар атрофида заранг тупроқдан кетма-кет тўрт девор тикланган. Ҳар икки девор оралиғи бир фарсанг келади. Бу шаҳарда серсув булоқлар бўлиб, ҳар бири беш тегирмонни айлантиришга етгулик сув беради. Бу сувнинг ҳаммаси ушбу ноҳияда сарфланади ва девордан ташқари чиқазилмайди. Қальалар ўртасида катта шаҳарларга хос барча нарсаларга эга бўлган ғоят чиройли бир шаҳар қурилган. Шаҳарда йигирма мингдан ортиқ курол кўтаришга яроқли эркак бор. Уларнинг сул-

тони уруғ оқсоқолларидан бири бўлган экан. У одамларни мусулмонликдан чиқишига даъват этиб: «Сизни намоз ва рўзани бажо келтирмок мажбуриятидан озод этаман. Сизнинг мендан ўзга паноҳингиз йўқдир», деган. Унинг номи Абусаид экан. Агар бу шаҳар аҳлидан «Қайси мазҳабдасан?», деб сўралса, «Биз бусайдилармиз», деб жавоб беришади. Улар намоз ўқишишади, рўза тутишмайди, лекин Абусаид уларга: «Мен вафотимдан кейин яна сизларнинг олдингизга келаман», дебди. Унинг гўри Лахсо шаҳри ўртасида бўлиб, у ерда чиройли машҳад курилган. У ўзининг фарзандларига улардан олти киши вилоятни идора ва ҳимоя қилишини, у яна қайтиб келгучиша раиятга адолат билан ҳукм юргизиш ва бир-бирлари билан ёвлашмасликни васият қилибди.

Энди улар «Дорулмулк» деб аталадиган катта қасрда яшашади. Бу қасрда бир пайтнинг ўзида олти киши ўтира оладиган таҳт бор. Улар бир-бирлари билан иттифоқлиқда фармон ва ҳукмлар чиқазишади. Вазирлари ҳам олтита. Олти султон бир таҳтга, олти вазир бошқа таҳтга ўтириб, ҳар бир иш юзасидан кенгаш қилишади. Ўша вақтда уларнинг ўттиз минг дирҳамхарид¹⁴⁵ занги ва ҳабаш қуллари бўлиб, дала ишлари ва боғдорчиликка машғул эдилар. Раиятдан ушр олишмайди. Агар бирон киши камбағаллашса, ё қарздор бўлиб қолса, ишлари яхшиланиб кетиши учун ёрдам қилишади. Агар бирон одам бошқа биронга қарз берган бўлса, ундан қарзидан ортиқча ҳеч нарса талаб қилолмайди. Агар шаҳарга келган мусоғир ўзини боқа оладиган касб-хунарга эга бўлса, унга ишлаши учун керакли асбоб-усқуналар сотиб олишига етарли пул беришади. Бу пулни, қанча олган бўлса, худди шунча миқдорда, ўзи хоҳлаган пайтда қайтариб беради.

Агар хўжалик эгаларининг биронтаси мулкида оғат юз берса-ю, у ўз кучи билан бартараф қилолмаса, улар бу мулкни обод қилиш учун ўз қулларини юборишади, бу иш учун мулк соҳибидан ҳеч нарса олишмайди. Лахсада султонга қарашли тегирмонлар бўлиб, халқнинг ғалласини ун қилиб беришади-ю, эвазига ҳақ олишмайди. Тегирмонни куриш ва сақлаш харажатлари, тегирмончиларнинг маоши султон хазинасидан тўланади. Султонларни «саодат», вазирларни «шойира» деб аташади. Лахсада жоме масжиди йўқ ва хутба, намоз ўқишишади. Фақат ажамлик Али ибн Аҳмад деган бир одам қурдир-

ган масжид бор. Бу одам мусулмон ва ҳожи бўлиб, жуда бой экан. Бу шаҳарга келган ҳар бир ҳожига у моддий ёрдам беради. Бу шаҳарда савдо-сотиқ ва бошқа ҳар турли олди-берди муомаласида қўргошин ишлатилади. Қўргошинни чарм қопда олиб юришади ва бир қопга олти минг дирҳам сифади. Муомала пайтида қопларни санаб, керагича олишади. Бу тангаларни ҳеч ким вилоят ташқарисига олиб чиколмайди. Бу ерда ажойиб фўталар тўкишади ва Басра ҳамда бошқа шаҳарларга элтишади. Бирон киши намоз ўқиса, унга халал бермайдилар, лекин ўзлари намоз ўқишмайди. Султон қабул қилганида, кимки у билан сўзлашмасин, яхши жавоб бериб, ўзини камтар тутади. Ҳаргиз шароб ичишмайди, Абусаид қайта тирилганида минади, деб унинг мақбараси эшиги олдиди кечаю кундуз тушовланган отларни навбати билан алмаштириб, ушлаб туришади. Айтишларича, Абусаид ўз ўғилларига шундай дебди: «Мен келганимда сизлар мени танимасликларинг мумкин. Белги шуки, ўз қиличим билан бўйнимга урасизлар. Агар ўзим бўлсан, тирик қоламан». — Бу қоидани у яна бошқа бирон кимса абусаидлик даъвосини қилмасин деб ўрнатган.

Султонлардан бири Бағдод халифалари замонида Маккага лашкар тортиб, уни эгаллаган. Каъба хонасини тавоф қилаётган зиёратчиларни ўлдириб, Ҳажарул Асвадни — Қора тошни сутундан қўпориб олиб, Лаҳсога келтирган. Бу тош одамлар учун мағнотис бўлиб, жаҳоннинг ҳар тарафидан одамларни ўзига қараб тортади, дейишарди. Улар Мухаммад Мустафо соллаллоҳу алайхи васалламнинг шараф ва шукухи у ерга тортишини билишмасди. Қора тош бу ерда кўп йиллар турди, лекин ҳеч ким келмади. Нихоят, Ҳажарул Асвадни улардан сотиб олиб, яна ўз жойига элтишди.

Лаҳсо шаҳрида ҳамма ҳайвонлар: мушук, ит, эшак, мол, қўй ва ҳоказолар гўшти сотилади. Бирон нарсани сўйиб сотаётганда харидор қанака гўшти сотиб олаётганини билиши учун, ҳайвоннинг калласи ва терисини гўшти ёнига қўйишади. Бу ерда итларни худди бўрдоки қўйлардек чунон бокиб семиртиришади ва бокувдаги ит семизлигидан юролмай қолгач, сўйиб ейишади.

Лаҳсадан шарққа қараб юрилса, етти фарсангдан сўнг денгиз келади. Денгиз йўли билан юриб Бахрайнга¹⁴⁶ бориш мумкин. Бу узунлиги ўн беш фарсанг бўлган оролдир. Унда катта шаҳар ва хурмозорлар бор. Бу денгиз-

дан марварид олишади. Фаввослар олиб чиққан марвариднинг ярми Лахсо султонлари ҳиссасидир. Лахсадан жанубга қараб юрилса, Уммонга¹⁴⁷ етиб келиш мумкин. Уммон араб заминидадир. Уни уч томондан одам ўтса оёғи, қуш учса қаноти куядиган биёбон ўраб олган. Уммон вилояти саксон фарсангга саксон фарсангдир. Вилоят иқлими ғоят иссиқ бўлиб, унда «норгил» деб аталадиган хинд ёнғоғи ўсади.

Лахсада хурмо мўллигидан туяларни ҳам хурмо билан боқишиди. Баъзи пайтлар минг мандан кўпроғини бир динорга беришиди. Лахсадан шимолга қараб юрилса, етти фарсангдан сўнг Қатиф¹⁴⁸ ноҳиясига борилади. Бу ерда ҳам катта шаҳар ва хурмозорлар бор.

Араб амирларидаи бири Лахсога юриш қилиб, бир йил уриниб, шаҳарнинг тўрт деворидан биттасини эгаллаб, уни кўп форат қилди, лекин бундан ортиқ ҳеч нарсага эришолмади. Мени кўриб қолиб, юлдузлар ҳолатидан сўраб сўриштириди:

— Мен Лахсони эгалламоқчиман, қўлимдан келадими ёки йўқми? Ахир улар динсиз-ку, — деди.

Мен ўзимга маъқул бўлиб кўринган жавобни бердим.

Менинг назаримда, бадавийлар ҳам динсизликда Лахсо ахлидан қолишмас, чунки баъзи одамлар бир йил давомида бир марта ҳам қўлинни ювмас эди. Бу гапларни ёлғондан тўқиганим йўқ, балки ўз кузатишларим юзасидан айтаётирман, чунки мен уларнинг орасида тўққиз ой узлуксиз яшадим. Туя сутини ичолмасдим, қаерданки чанқоғимни босишга сув сўрасам, сут таклиф этишарди. Олмасдан, яна сув сўрасам, менга шундай дейишарди: «Қаерда сув кўрсанг, ўша жойдан сўрагин. Фақат кимда ҳам сув бўлиши мумкин?» Улар умрларида на ҳаммом ва на оқар сувни кўришган.

Энди яна ҳикоямизга қайтамиз. Биз Ямомадан Басра томонга қараб йўлга тушганимизда, йўлдаги манзилларнинг баъзиларида сув бор, бошқаларида эса йўқ эди.

Тўрт юз қирк учинчи йил шаъбон ойининг йигирманчи куни (1051 йил, декабр) Басра шахрига етиб келдик. Шаҳар уч томондан баланд девор билан ўраб олинган бўлиб, фақат дарёга қараган томони деворсиз эди. Бу дарё «Шаттулараб» деб аталарди. Дажла ва Фурот дарёлари Басра вилояти сарҳадида туташиб, уларга Хувайза анҳори ҳам қўшилгач, Шаттулараб дарёси ҳосил бўлади. Шаттуларабдан иккита катта анҳор чиқазилган

бўлиб, улар оралиғи бир фарсангдир. Ҳар икки анхор тўрт фарсанггача қиблага қараб оқади. Сўнгра қўшилиб, жанубга қараб бир фарсанггача ягона ўзандаги оқади. Бу икки анхордан сон-саноқсиз ариқ ва ариқчалар бошлиниб, турли томонга таралиб кетган. Ариқлар бўйида хурмозор ва боғлар барпо этилган. Анхорлардан шимоли-шарқ тарафда оқадиган баланддагисини «Наҳри Маъқил» деб, жануби-фарбда жойлашган пастдагисини «Наҳри Убулла» деб аташади. Бу икки анхор узун тўртбурчак шаклида катта орол ҳосил қилган. Басра шу тўртбурчакнинг қисқа томонида жойлашган. Басранинг жануби-фарб тарафи чўл бўлиб, обод жойлар, сув ва дараҳтзорлар йўқ.

Басра шахри таърифи

Биз бўлган пайтимиизда шаҳарнинг кўп жойлари ҳароба ҳолида эди. Обод жойлар ғуж бўлмай, шаҳар бўйлаб сочиған, бир маҳалладан бошқасига ўтиш учун ярим фарсанг миқдорида вайроналар орасидан юришга тўғри келади. Аммо девор ва дарвозалари мустаҳкам ва ҳалки тўқ эди. Султон ҳазинасига шаҳардан катта даромад келарди. Бу пайтда Басра амири Абу Наср ибн Абу Қолинжор Дайлами¹⁴⁹ бўлиб, бир пайтнинг ўзида у Форс¹⁵⁰ малики ҳам эди. Вазири форс бўлиб, исми Абу-мансур Шоҳмардан эди.

Ҳар куни Басрада уч жойда бозор бўлади. Эрталаб савдо-сотиқ қилинадиган жойни «Суқулхузъя» дейишиди, тушда Суки Усмон, кечқурун эса Суқулқаддоҳинда бозор бўлади. Савдо-сотиқ уларда қуйидаги тарзда бўлади: кимнинг қандай моли бўлса, саррофга топшириб, бу ҳақда ундан хат ёздириб олади. Сўнгра ўзига лозим нарсаларни олади ва бу нарсалар учун ҳам саррофга хат ёзиб беради. Қисқаси, олди-сотти пул ишлатилмасдан, сарроф хатлари орқали амалга оширилади. Биз дастлаб келганимизда озиб кетганимиз ва ярим яланғочлигимиз билан девоналарга ўҳшардик. Соч-соқолимизга устара тегмаганига уч ойдан ошган. Ҳаво совуқ, тузукроқ кийимимиз бўлмаганидан мен ҳаммомга бориб, исинишга қарор қилдим. Мен ва укамнинг белида фақат эски лунги бўлиб, устимизга совуқдан химояланиш учун йиртиқ шол ёпиниб олган эдик. Мен: «Ким ҳам энди бизни ҳаммомга қўяди?» дедим. Китоб соладиган бир хуржу-

ним бор эди, шуни сотиб, тушган пулидан бир неча мис дирҳамни ажратиб, қоғозга ўрадим. Буни ҳаммом ходимиға берсам, зора у кўпроқ ювинишимизга қўйса, баданимиздаги кир-чирлардан халос бўлардик, деб ўйладим. Пулни унинг олдига қўйганимда, у бизга назар ташлади ва бизни девоналар хаёл қилиб бақирди: «Қани, йўқолларинг, ҳозир одамлар ҳаммомдан чиқишиади!» Хуллас, бизни ҳаммомга киргизмади. Бу ердан хижолат билан кўчага чиқиб, тез юриб кетдик. Ҳаммом олдида болалар ўйнаб юришган эди. Улар ҳам бизни девоналар деб ўйлаб, изимиздан югуришди ва шовқин-сурон кўтариб, бизга тош ота бошлиашди. Биз бир бурчакка яшириниб, дунёнинг ишларидан таажжуб қилдик.

Туякаш биздан ўттиз мағриби динор талаб қилар, қандоқ тўлаймиз, деб бошимиз қотган эди. Шу пайтларда Аҳвоз¹⁵¹ маликининг вазири Абулфатҳ Али ибн Аҳмад Басрага келди. У шеъру адабдан хабардор фозил одам, сахийлиги билан ном қозонган экан. У ўғиллари ва аъёнлари билан келиб мақом тутган, лекин ишга машғул эмас эди. Мен бир форс олими билан танишган эдим ва унинг вазир билан алоқаси бор экан, гоҳи пайтлар ҳузурида бўларди. Бу форс ҳам камбағал бўлиб, бизнинг ахволимизни ўнглашдан ожиз эди. У биз тушиб қолган ахвол ҳакида вазирга сўзлаб берибди. Вазир эшитган заҳоти бир одамни от билан менинг олдимга юборди: қанақа ахволда бўлсанг ҳам, отга мин-у, менинг ҳузуримга келавер. Мен ўзимнинг ёмон ҳолатим ва яланғочлигимдан уялиб, бормоқни муносиб кўрмадим. Хат ёзиб, ундан узр сўрадим ва «Кейинроқ хизматингизга борурман», дедим. Бундай йўл тутмоққа менда икки сабаб бор эди: биринчиси — қашшоқлигим ва иккинчиси — у хатимни ўқигач, илмлардан хабардор фозил одам эканимга ишонч ҳосил қиласди ва шунда хижолат тортмасдан, олдига бора оламан, деб ўйладим.

Кийим-кечак сотиб олишим учун у дарҳол менга ўттиз динор узатди. Мен бу пулга икки киши учун яхши либослар сотиб олиб, учинчи кун вазирнинг мажлисида ҳозир бўлдим. Мен олижаноб, фозил, ёқимли чехрали, камтар, такводор ва хушсхан бир одамни кўрдим. Унинг тўрт ўғли бўлиб, катта ўғли сухандон, маълумотли ва ақлли йигит, уни Раис Абу Абдуллоҳ Аҳмад ибн Али деб аташарди. У шеърлар ёзар, донишманд ва парҳезли йигит эди.

Вазир бизни ўз яқинига жойлаштириди ва шаъбон ойи бошидан рамазон ойи ўртасигача шу ерда бўлдик. Туя кираси учун арабга беришимиз лозим бўлган ўттиз динорни ҳам вазир ўз ҳисобидан тўлашни амр этди. Худойи таборак ва таоло барча бандаларини қарз балоси ва қарздорлик азоб-уқубатларидан халос этсин!

Биз йўлга тушмокқа истак билдирганимизда, у иззатикром билан денгиз йўлидан узатди. Ушбу олижаноб инсон кўмаги ила Форсга заҳмат чекмасдан, эсон-омон етиб бордик. Кодир ва меҳрибон Худойим олижаноб инсонлар кўнглини доимо шод қилсин!

Басрада Али ибн Абутолиб солаватуллоҳи алайҳи номи билан боғлиқ ўн уч машҳад бор. Улардан бирини «Бани Мозин машҳади» деб аташади. Пайғамбар алайҳиссалоту вассалам ҳижратидан сўнгги ўттиз бешинчи йил рабиулаввал ойида (655 йил, сентябр) амирал мўъминин Али солаватуллоҳи алайҳи Басрага келган. Бу пайтда Ойинша розийаллоҳу анҳо унга қарши жанг қилмоққа ҳозирланарди. Амирал мўъминин Маъсуд Наҳшалининг қизи Лайлига уйланган ва бу машҳад ўша хотиннинг саройи бўлган. Амирал мўъминин бу уйда етмиш икки кун яшаб, сўнгра бу ердан яна Кўфа тарафга қайтиб кетган. Жоме масжиди яқинидаги яна бир машҳадни «Бобуттиб» деб аташади. Басра жомесида узунлиги ўттиз арш, йўғонлиги беш қаричу тўрт бармоқ келадиган, бир томони бошқа тарафига нисбатан йўғонроқ бир ёғочни кўрдим. Ҳиндистонда ўсадиган дараҳтлардан эди. Айтишларича, бу ёғочни амирал мўъминин олиб келтирган. Қолган ўн бир машҳаднинг ҳар бири турли мавзеда жойлашган ва мен уларнинг барчасини зиёрат қилдим.

Дунёвий ишларимиз ўнглангач, иккаламиз ҳам яхши либослар кийиб, бир куни бизни киритишмаган ўша ҳаммомга бордик. Эшикдан кирганимизда, ҳаммом ходими ва бошқа шу ерда ҳозир бўлган мижозлар барчаси жойларидан тик туришди. Биз ҳаммом ичкарисига киргач, дархол ходимлар келиб, хизматимизда бўлишди. Чиққанимизда, ҳаммом дахлизидаги одамлар яна жойларидан туриб, то биз кийинниб чиқиб кетгунимизча ўтиришмади. Ҳаммом ходимларидан бири хизматдошига: «Бу йигитлар фалон куни биз ҳаммомга қўймаган икки одамдир», деди. Улар бизни тил билмайди, деб ўйлашарди. Мен арабчалаб дедим: «Рост айтасан, биз ўша куни устига йиртиқ шол ёпиниб юрган одамлармиэ». У одам

хижолат бўлиб, биздан узр сўради. Бу икки ҳолат йигирма кун мобайнида юз берди. Буларни ҳикоя қилишдан мақсадим одамларга шуни англатишки, ҳаёт рўбарў келтирадиган қаттиқликлардан нолимаслик керак. Оллоҳ таолонинг фазлу раҳматидан ноумид бўлмаслик керак, чунки у раҳмлидир.

Басра яқинида денгиз ва дарё сувининг кўтарилиши ва пасайиши таърифи

Уммон денгизи одатда бир кечакундузда икки марта кўтарилади ва ўн газ баландликка чиқади. Энг баланд нуқтасига етгач, тадрижий равишда пасая бошлайди ва ўн-ўн икки газ настга тушади. Мен айтган ўн газ баландликка кўтарилиш Басрада соҳилда ўрнатилган сутун ё деворда кўзга аниқ кўринади. Агар соҳил текис ва тепаликлар бўлмаса, сув жуда узоққа боради. Дажла ва Фурот шу қадар секин оқадики, баъзи мавзеларда ҳатто дарё суви қайси тарафга оқаётгани ҳам сезилмайди. Денгиз суви кўтарилиши таъсирида дарёлар суви ҳам то қирқ фарсанггacha кўтарилади ва шунда гўё дарёлар ортга қайтиб, тескари оқаётгандай туюлади. Денгиз соҳилидан бошқа жойларда сувининг кўтарилиш даражаси ернинг наст-баландлигига боғлиқ; наст жойларда сув жуда баланд; тепаликларда эса саёроқ бўлади.

Айтишларича, сувнинг кўтарилиши ва пасайиши ойнинг вазиятига боғлиқ. Ой Зуҳал¹⁵² сайдераси доирасига кирганда кўтарилиш даражаси энг юқори бўлади. Ой икки уфқдан бири, яъни машриқ ё мағрибда бўлганида пасайиш даражаси энг юқорига етади. Бундан ташқари, ой қуёшга яқинлашганда денгиз суви кўпаяди, яъни бундай пайтларда кўтарилиш даражаси анча юқори бўлади. Ой қуёшдан уч бурж узоқлашганда эса, аксинча, сув камаяди, яъни кўтарилиш унча кучли бўлмайди, энг юқори даражага етмайди ва, аксинча, пасайиш бу пайтда энг юқори даражага етади. Ушбу далилларга асосланиб, сувнинг кўтарилиши ва пасайиши ойга боғлиқ дейишади ва яна Оллоҳ билгувчидир.

Убулла шахри анхор бўйида жойлашган ва анхор ҳам ана шу ном билан аталади. Менга обод шаҳар бўлиб кўринди: унда қасрлар, бозорлар, масжиду работлар шу қадар кўп эдик, барчасини таърифламоқ имконсиздир. Шаҳарнинг ўзи анхорнинг шимолида жойлашган, лекин

анхордан жануб тарафда ҳам маҳалла, масжид, работ ва бозорлар бор. Бинолар фоят муҳташам бўлиб, улардан ҳам кўркамроғи оламда йўқдир. Шаҳарнинг бу қисми «Шиққи Усмон» деб аталади. Фурот ва Дажла қўшилувидан ҳосил бўлган катта дарё, яъни Шаттулараб Убулладан шарқ тарафдадир. Шаҳар эса жануб тарафда. Убулла ва Маъқил анхорлари, мен муқаддимада айтиб ўтганимдек, Басрада бир-бирига туташади, Басранинг йигирма ноҳияси бўлиб, ҳар ноҳияда кўплаб қишлоқ ва экинзорлар бор.

Басра музофотлари таърифи

Улар қуийдагилар: Ҳишон, Шараба, Балас, Ақа, Мисоналмуқим, Наҳрулҳарб, Шаттулараб, Саъд, Сом, Жаъфари, Алмашон, Асумд, Алжуна, Жазиратулузмо, Муррват, Ашишарир, Жазиратулурш, Алхумайда, Жубара, Алмунфаридот.

Айтишларича, илгари Убулла анхорининг қуийлиши жойида улкан гирдоб бўлиб, кемалар ўтолмас экан. Шунда Басранинг энг бой-бадавлат кишиларидан бўлмиш бир аёл тўрт юз кема курдириб, уларни хурмо данаги билан тўлдириб, устини маҳкам ёпиб, ўша жойга чўктиришини буюрибди. Шундан сўнг кемалар бемалол ўтадиган бўлибди.

Нихоят, тўрт юз қирқ учинчи йил шаввол ойи ўртасида (1052 йил, феврал) биз Басрадан чикиб кемага тушдик. Убулла анхори бўйлаб тўрт фарсанг кемада юрдик: ҳар икки тарафда боғу бўстон ва хушманзара кўшикларнинг кети узилмасди. Анхордан ҳар тарафга караб шоҳобчалар кетган, катталигидан ҳар бири гўёки дарёга ўхшарди. Шиққи Усмонга етиб келгач, Убулла шахри рўбарўсида кемадаин тушдик ва шу ерда жойлашдик.

Ойнинг ўн еттинчи куни «Буси» деб аталадиган катта кемага чиқдик. Ҳар икки соҳилда жуда кўп одамлар бўлиб, кемани кўришгач: «Сенга Худойи таоло йўл кўрсатсин, ё Буси», деб дуо қилишарди. Уббодонга етиб келдик ва одамлар кемадан тушдилар. Уббодон шахри дениз соҳилида ва бу ерда Шат икки шоҳобга ажраб кетгани учун у ер оролга ўхшаб қолган. Шу сабабли Уббодонга қайсики тарафдан борилмасин, сувдан ўтишга тўғри келади.

Уббодондан жануб тарафда окёнус бошланади. Сув

кўтарилигданда то Уббодон деворигача етиб келади, пасай-
ганда қарийб икки фарсанг узоқлашади.

Баъзи йўловчилар Уббодонда бўйра харид қилиша-
ди. Кейинги кун тонгда кемани денгизга чиқаришиди ва
шимол тарафга қараб йўлга тушдик. То ўн фарсанг ма-
софагача денгиз сувини ичса бўларди, чунки бу сув тил
шаклида денгизга ичкарилаб кирган Шатнинг чучук суви
эди. Қуёш чиққанида, узоқда денгизнинг ўртасида чум-
чукка ўхшаган бир нарса кўринди. Яқинлашганимизда,
у каттара бошлади. Тўғрисига етганимизда, у биздан чап
томонда бўлиб, орадаги масофа бир фарсанг келарди.
Шу пайт қарши шамол эса бошлади ва лангар ташлаб,
елканларни туширишиди. Мен «У нарса нимадир?» деб
сўраганимда, «Хашшоб», деб жавоб беришиди. Бу тўртта
улкан сожъ дарахти ёғочидан манжаниқда ўхшатиб ясал-
ган бир қурилмадир. Ёғочлар тўртбурчак шаклида би-
риклирилган ва асоси кенг, тепаси эса торроқдир. У
сувдан қирқ газ тепага чиқиб турибди ва устига сопол ва
тошлар терилган. Сўнгра ёғочлар билан шипга ўхшатиб
ёпишган. Томда яна тўрт тоқи тиклашган ва бу ерда
назоратчи туради. Бу хашшобни, баъзилар айтишича,
бой бир савдогар курдирган, бошқалар эса уни қандай-
дир подшоҳ қурдирганини таъкидлашарди. У асосан икки
мақсадга хизмат қиласи. Биринчидан, у жойлашган ҳудуд
тубида кўчма қумлар бор ва бу ерда денгиз саёзрок. Шу
сабабли катта кемалар бу ердан ўтмоқчи бўлса, қумга
ўтириб қолиши мумкин. Кечалари бу ерда шамол ўчир-
маслиги учун шиша ичида чироқ ёқишади. Одамлар ёғду-
ни узоқдан кўриб, эҳтиёт бўлишади, чунки бундай жойга
бориб қолган кема кутулиб кетолмайди. Иккинчидан, у
олам томонларини аниқлаш учун хизмат қиласи. Шу-
нингдек, қароқчилар борлигини хабар қилиш ва кема-
ларнинг хатардан узоқлашиши каби мақсадларда ҳам фой-
даланишида. Бу хашшобдан ўтганимиздан сўнг, у кўздан
йўқолгач, ўшанга ўхшаш яна биттаси кўринди. Факат
коровулхона тепасида гумбаз йўқ эди. Эҳтимол, ҳали
қуриб битказишмагандир.

Мехрубон ва Арғон шаҳарлари таърифи

У ердан биз Мехрубон шаҳрига етиб келдик. Бу —
денгизнинг шарқий соҳилида жойлашган катта шаҳар.
Катта бозори ва кўркам масжиди бор. Аммо улар факат

ёмғир сувини истеъмол қилишади. Чучук сувли қудук ва коризлар йўқ. Бу ерда ҳовуз ва сув омборлари бўлиб, ҳеч қачон сув қаҳатчилиги рўй бермайди. Учта катта карвонсарой қурилган, ҳар бири баланд ва мустаҳкам қалъага ўхшайди. Жоме масжиди минбарига Яъқуб ибн Лайс¹⁵³ номи битилганини кўриб қолдим ва бирордан бу ҳолнинг сабабини сўрадим. «Яъқуб ибн Лайс бу шаҳарни ҳам эгаллаган. Хурросон амирларидан бошқа ҳеч бири бунга муваффақ бўлолмаган», деб жавоб берди у. Мен бўлган пайтимда бу шаҳарда Форс малики Абу Қолинжор ўғиллари ҳокимлик қиласарди. Бу шаҳарга озиқ-овқатни бошқа шаҳар ва вилоятлардан келтиришади, чунки бу ерда балиқдан бошқа нарса йўқ. Шаҳарда божгоҳ ва бандаргоҳ бор. Агар бу шаҳардан соҳил бўйлаб жанубга юрилса, Тавоҳ ва Козарун¹⁵⁴ ноҳияларига бориш мумкин. Менга Мехрубон шахрида бир қанча вақт қолишга тўғри келди. Чунки, одамларнинг айтишича, йўллар бехатар эмас, Абу Қолинжорнинг ўғиллари бир-бири билан ёвлашиб жанг қилишмоқда экан. Уларнинг ҳар бири ўз атрофига тарафдорларини тўплаган ва вилоятда но tinчлик ҳукм сураётган экан.

Менга «Арғон шаҳрида бир машхур олим бўлиб, унинг номи шайх Садид Мухаммад ибн Абдумалик», дейишиди. Бу шаҳарда туриш жонимга тегиб кетган эди. Шу сабабдан у одамнинг номини эштишим билан унга хат ёзиб, ўз аҳволимни баён қилдим ва бу шаҳардан бирон бехатар жойга борища менга мадад қилмоғини сўрадим. Хатни жўнатганимнинг учинчи куни ўттизиста куролланган пиёда аскар менинг олдимга келиб, дейишиди: «Бизни шайх сени Арғонга олиб бормоқ учун жўнатди». Уларнинг ҳимоясида Арғонга жўнадик.

Арғон катта шаҳар бўлиб, йигирма минг эр одами бор. Унинг шарқий чеккасидан дарё оқиб ўтади ва бу дарё тоғдан келади. Дарёнинг шимолий соҳилидан тўртта катта анҳор чиқазилган бўлиб, улар шаҳар ичкарисига сув олиб киради. Бу анҳорларни қазишига катта пул харж қилинган ва улар шаҳардан анча нарига ўтиб кетади. Қирғоқларида боғу бўйстонлар барпо этишган: хурмо, норинж, турунж ва зайдунларнинг кети узилмайди. Шаҳар шундай қурилганки, ҳар бир уйнинг остида, шу уй катталигига мос ертўлалар қилинган. Барча ертўлаларнинг бир чеккасидан сув оқиб ўтади. Ёзда шаҳар аҳолиси ертўлаларга тушиб, сув салқинида ором олишади. Бу

шаҳарда турли мазҳабларга мансуб одамлар бор. Муътазилийлар имомининг исми Абусаид ал-Басрий бўлиб, у фасоҳатли ҳамда ҳандаса ва ҳисоб фанларида чуқур билимлар эгаси бўлган одам эди. Бир куни у билан баҳсласиб қолдик: калом, ҳисоб ва бошқа фанлардан бир-биримизга саволлар ёндиридик ва жавоблар бердик.

Муҳаррам ойининг биринчи куни (1052 йил, 3 май) биз бу шаҳарни тарк қилиб, тоғ йўли орқали Исфаҳон сари жўнадик. Йўлда тор дарали бир тоғни кўрдик. Айтишларича, бу тоғни Баҳром Гўр қилич билан чопиб ташлаган ва шу сабабли уни «Шамширбурид» деб атashadi. Бу ерда ўнг қўл томондаги ёриқдан оқиб чикиб, баланд жойдан тиккасига тушадиган шаршарани кўрдим. Одамлар: «Бу шаршара ёз бўйи тинмай оқади, қишида эса музлаб қолади», дейишди. Сўнгра биз Арғондан қирқ фарсанг масофада жойлашган Лурдғон шаҳрига етиб келдик. Лурдғон Форс вилояти чегарасида жойлашган. У ердан биз Хонлунжон шаҳрига келдик. Шаҳар дарвозасига султон Тўғрулбек номи ёзилганини кўрдим. Бу ердан Исфаҳонгача етти фарсангдир. Хонлунжон ахолиси ниҳоятда тинч ва осоийшта ҳаёт кечиради. Ҳар бир одам ўз касби ва уй-рўзгор юмушларига машғулдир.

Исфаҳон, Табас, Тун ва Қоин шаҳарлари орқали Балхга қайтиб келмогимиз баёни

Биз бу шаҳарни тарк қилдик ва тўрт юз қирқ тўртинчи йил сафар ойининг саккизинчи куни (1052 йил, 10 июнь) Исфаҳон шаҳрига етиб келдик. Басрадан Исфаҳонгача бир юз етмиш фарсангдир. Бу – водийда жойлашган, оби ҳавоси бағоят латиф шаҳар. Қаерданки ўн газ чуқурликда қудук қазилса, муздек ширин сув чиқади. Шаҳар атрофи баланд мудофаа девори билан ўраб олинган. Кунгурадор деворда дарвозалар ва жанггоҳлар бор. Шаҳар ўртасида улуғвор жоме масжиди бор. Шаҳар деворининг узунлиги, айтишларича, уч ярим фарсанг экан. Шаҳарнинг барча маҳаллалари обод бўлиб, бирон жойда вайроналар кўрмадим. Бозорлар жуда кўп. Мен саррофлар бозорида бўлдим ва бу ерда икки юздан ортиқ сарроф бор эди. Ҳар бир бозор девор билан ўраб олинган ва дарвозалари бор. Шунингдек, маҳаллалар ва кўчаларнинг ҳам мустаҳкам дёвор ва дарвозалари бор.

Карвонсаройлари озода. «Тироз» деб аталадиган кўчада элликта яхши карвонсарой бўлиб, ҳар бирида кўплаб тожир ва мусофиirlар истиқомат қилишади. Биз ҳамроҳ бўлиб келган карвонда бир минг уч юз харвор¹⁵⁵ юк бор эди. Аммо шаҳарга шундоқ катта карвон келгани сезилмади, деса ҳам бўлади. Чунки, жой танглиги, ўрин ва кундалик озиқ-овқат таъминоти юзасидан мурожаат этганларни рад қилиш каби ҳоллар бу шаҳарда кўрилмайди.

Султон Тўғрулбек Абутолиб Мухаммад ибн Мекоил ибн Салжук раҳматуллоҳи алайҳ Исфаҳонни эгаллаганда, бу шаҳарга ҳоким қилиб асли нишопурлик бўлган хушхат, мулоим табиат ва хушрўй бир одам тайинланган, уни Хўжа Амид деб аташарди. У хушсухан ва саҳий бўлиб, фозил одамларни қадрларди. Султон уч йилгача шаҳар аҳолисидан хеч қандай солиқ олмасликни амр этган эди. Ҳоким бу фармонга амал этар ва тарқалиб кетган одамлар яна ўз масканларига қайтиб келишган эди. Ҳоким олдин султон девонида дабир¹⁵⁶ бўлиб хизмат қилган.

Биз келишимиздан олдин ёмон қаҳатчилик юз берган экан. Аммо биз келганимизда арпа ўрим-йифими бўлаётган эди. Бир ярим ман буғдой ионини бир дирҳамга беришар ва уч ман арпа ионнинг ҳам нархи шунча эди. Шаҳарликлар олдин саккиз ман ион бир дирҳамдан қиммат бўлмаганини таъкидлашарди.

Мен форсийзабон аҳоли яшайдиган ўлкаларнинг хеч бирида Исфаҳондан ҳам кўра кўркам, обод ва аҳолиси кўп шаҳар кўрмадим. Айтишларича, буғдой, арпа ва бошқа хил донларни йигирма йил сақласа ҳам чиримасдан туаркан.

Кўплар олдин, мудофааа девори бўлмаган пайтда шаҳар ҳавоси бундан ҳам тозароқ бўлганини сўйлашарди. Девор тиклангач, ҳаво ўзгариб, баъзи маҳсулотлар тез айнийдиган бўлибди. Аммо қишлоқлар ҳавоси ҳанӯз олдингидай. Карвон йўлга кеч отлангани учун биз Исфаҳонда йигирма кун туриб қолдик.

Йигирма саккизинчи сафарда шаҳардан чиқиб, йўлга тушдик ва Ҳаймобод деган қишлоққа етиб келдик. У ердан водий ва Маскиён тоғи орқали Ноин¹⁵⁷ қасабасига келдик. Исфаҳондан бу ергача ўттиз фарсангдир. Ноиндан нарига қирқ уч фарсанг йўл юриб, Гарма қишлоғига етдик. Бу қишлоқ Биёбон ноҳиясидан ва ушбу ноҳияда

ўн-ўн иккита қишлоқ бор. Бу мавзенинг иқлими иссиқ бўлгани учун хурмозорлар кўп. Бу нохия илгари Күфж қабиласи¹⁵⁸ қўл остида экан. Лекин биз бўлган пайтимизда мазкур нохияни амир Гелаки улар қўлидан тортиб олган ва кичкина қалъаси бўлган Пиёда қишлоғида ўз ноибини қўйган эди. Ноиб вилоятни идора қилади ва йўлларининг бехатарлигини таъминлайди. Агар қуфжлар йўлларда қароқчилик қылсалар, уларга қарши ўз саркардаларини жўнатади. Саркардалар уларни ушлаб, талаган молини тортиб олиб, ўзларини қатл қилишади. Бу муҳтарам одамнинг муҳофазаси туфайли йўллар бехатар ва ҳалқ осойиштадир. Худойи таборак ва таоло барча одил ҳокимларни ўз паноҳида сақласин ва уларга мададкор бўлсин ҳамда ўтганлар рухига раҳмат қилсин!

Биёбон нохияси йўлларида ҳар икки фарсангда кичик гумбазли сардобалар қурилган бўлиб, уларга ёмғир суви тўпланади. Сардобаларни қурганда шўр ерларни четлаб ўтишган. Гумбазли қилиб қурилганинг сабаби шундаки, йўловчилар унга қараб йўлни йўқотишмайди ҳамда қиши совуғи ва ёз жазирамасида унда бирнас дам олишади.

Йўлда биз кўчма қумли улкан майдонни кўрдик. Кимки йўлдан адашса, бу кўчма қумлар орасидан омон чиқолмайди. Бу ердан ўтгач, олти фарсанг масофагача ер шўр бўлиб, ер юзаси шишиб кетгандек бўлиб кўринарди. Агар кимки йўлдан четлашса, оёғи ерга ботиб кетарди. Ниҳоят, Зубайда работига етиб келдик. Бошқа ном билан «Мароми» ҳам деб аталадиган бу работнинг бешта сувли қудуғи бор. Агар бу работ ва сув бўлмагандан ушбу биёбонни ҳеч ким кесиб ўтолмасди. У ердан биз Табас¹⁵⁹ вилоятига бордик ва Рустобод қишлоғида тўхтадик. Тўққизинчи рабиъулаввалда (1052 йил, июл) биз Табасга етиб келдик. Исфаҳондан Табасгача бир юз ўн фарсанг дейишлади. Табас қишлоққа ўхшаб кўринади-ю, аммо гавжум шаҳар. Сув камлигидан экинзорлар унчалик кўп эмас. Лекин хурмозорлар ва боғлар бор. Агар бу ердан шимол тарафга қараб юрилса, қирқ фарсангдан сўнг Нишонур келади. Жануб томонда сахро йўли билан қирқ фарсанг масофада Хabis жойлашган. Шарқ томонда эса тикка тоғлар бор.

Бу пайтда шаҳар амири Гелаки ибн Муҳаммад эди. У бу шаҳарни қилич қучи билан олган. Ҳаёт бу ерда

хавфсиз ва осойишта эди. Кечаси ҳовлилар дарвозаларини қулфлашмас, мол-ҳоллар ташқарида эди. Ваҳоланки, шахар девор билан ўраб олинмаган. Ҳеч бир аёл бегона эркак билан сўзлашмоққа журъат қилолмайди, сўзлашса, ҳар иккаласини қатл этишади. Шунингдек, амирнинг адолати ва ҳимояси туфайли бу ерда ўғри ва қотиллар йўқ эди. Бутун Араб ва Ажам ўлкаларидан мен факат тўрт жойда ушбу ҳолни кўрдим, биринчиси — Лашкархон ҳокимлиги давридаги Даشت ноҳияси, иккинчиси — амирлар амири Жистон ибн Иброҳим давридаги Дайламистон, учинчиси — амир ал-мўъминин Алмустансирубиллоҳ вилоятида ва тўртинчиси — Табасда, амир Абулҳасан Гелаки ибн Муҳаммад ҳокимлиги·найтида. Қанчаки сафар қилган бўлсан, шу тўрт жойдаги каби эминн-осойишталикни бошқа жойларда кўрмадим ва эшифтадим.

Амир бизни Табасда ўн етти кун меҳмон сифатида ушлади. Бизнинг шарафимизга зиёфатлар берди. Кетар вақтимизда совғалар бериб, яна узр сўраб қолди. Ҳак субҳонаҳу ва таоло ундан хушнуд бўлсин. У ўзининг жиловдорини то етмиш икки фарсанг масофадаги Завзангача¹⁶⁰ бизга ҳамроҳ қилиб узатди. Табасдан чиқиб ўн икки фарсанг йўл юргач, Риққа қасабасига етиб келдик. Бу ерда оқар сув, экинзор ва боғу бўстонлар бор. Қалъаси ва масжиди ҳам бўлиб, атрофда қишлоқлар ва дала-лар ястаниб ётиди.

Рабиъулоҳир ойнинг тўққизиңчи куни (август) Риққадан чиқдик ва шу ойнинг ўн иккинчи куни Тун¹⁶¹ шаҳрига етиб келдик. Риққа ва Тун оралиғи йигирма фарсангдир. Тун бир пайтлар катта шаҳар бўлган, аммо мен кўрган пайтимда унинг кўп жойлари вайронга ҳолида эди. Шаҳар водийда жойлашган, оқар сувли ариқлар, қоризлар, шарқ томонида кўплаб боғлар бор. Қалъаси анча мұстаҳкам. Менга бу шаҳарда тўрт юзта гилам тўқидиган корхона борлигини айтишди. Шаҳардаги ҳовлиларда писта дарахтлари жуда кўп эди. Ҳолбуки, Балх ва Тоҳаристон¹⁶² ахолиси, писта тоғдан бошқа жойда ўスマйди ва бўлмайди, деб таъкидлашади. Тундан чиқиб йўлга тушганимизда амир жиловдори менга қуидаги ҳикояни сўзлаб берди:

— Бир куни биз Тундан Канобудга кетаётган эдик. Каердандир қароқчилар пайдо бўлиб, бизга ҳужум қилишди. Бир неча одам кўрққанидан ўзларини кориз

қудукларига¹⁶³ ташлашди. Ичимизда бир йигитнинг мушфиқ отаси бор эди. У келиб, бир одамдан ҳақ эвазига қудукқа тушиб, ўғлини чиқариши илтимос қилди. Одамларда қанақаки арқон ва тасмалар бўлса, ҳаммасини ҳозирлашди ва бу ерга жуда кўп киши йифилди. У одам қудук тубига етиши учун арқонни етти юз газ пастга туширишга тўғри келди. У йигитнинг белига арқонни боғлади ва юқорига тортиб чиқаришди, аммо аллақачон жони узилган экан. Қудукдан чиқкан одам кориздан жуда кўп сув оқиб ўтаётганини айтди. Бу кориз тўрт фарсанггача боради ва, айтишларича, Кайхисрав фармони билан қазилган.

Рабиъулохир ойининг йигирма учинчи куни Қоин¹⁶⁴ шахрига етиб келдик. Тундан бу ергача ўн саккиз фарсанг, аммо йўл ёмонлигидан карвон бу масофани тўрт кунда аранг босиб ўтади. Қоин мустаҳкам девор билан ўраб олинган катта шаҳар. Девор ташқарисида хандак қазилган. Жоме масжиди шаҳар ўртасида. Масжид максураси ёнида улкан бир тоқи бўлиб, бутун Хуросонда ундан хам муҳташамроини кўрмаган эдим. Аммо бу тоқи масжидга тегишли эмас. Шаҳардаги барча иморатлар гумбазлидир. Агар Қоиндан шимоли-шарқ тарафга қараб юрилса, ўн саккиз фарсангдан сўнг Завзан келади, ундан ўттиз фарсах жанубда Ҳирот жойлашган. Қоинда Абумансур Мухаммадбин Дўст деган бир одамии кўрдим. Айтишларича, у хар хил илмлар: тиб, нужум ва мантиқдан хабардор экан. У менга шундай савол берди: «Фалак ва юлдузлардан ташқарида қандай модда бор?» — Мен жавоб бердим: «Модда деб фалакда мавжуд нарсаларга айтилади. Ундан ташқарида ҳеч нарса йўқ». У деди: «Хўш, у холда фалакдан ташқарида номоддий маъни борми?» «Албатта, — деб жавоб бердим мен, — олам чегараланган ва фалакул афлокни унинг сарҳади деб ҳисоблашади. Сарҳад деб бир нарсани бошқа нарсадан ажратиб турувчи чизиқ назарда тутилишини ҳисобга олсак, фалакнинг ташқарисидаги нарса унинг ичкарисида гидан тафовутлидир, деган хulosага келамиз». «Хўш, олам ташқарисида номоддий маъни борлигини ақл исбот этар экан, бунинг ҳам нариги томонда чеккаси борми, — дея савол ёғдиришда давом этди у. — Агар чеккаси бўлса, у қаерда? Ёки чеккаси бўлмаса, чексизлик қандай мавжуд бўла олади?»

Ушбу мавзуда бир муддат сухбатлашганимиздан ке-

йин, у деди: «Бу нарсалар мени ғоят ҳайратлантиради». «Ҳа, кимни ҳам ҳайратга солмаган бу», – дедим мен.

Хуллас, Завзанда Убайд Нишонур фавро кўтаргани ва Завзан ҳокимининг исёни туфайлидан мен Қоинда бир ой туриб қолдим. Шундан сўнг амир Гелакининг жиловдорига қайтмоққа рухсат этдим ва Қоиндан чиқиб, Сарахс томонга йўл олдим. Жумодилохир ойининг иккинчи куни Сарахсга етиб келдим. Басрадан Сарахсгача менинг ҳисобимда тўрт юз тўқсон фарсанг масофа экан. Сарахсдан сўнг Работи Жаъфари, Работи Амрави ва Работи Неъмати орқали йўл юрдим. Бу уч работ бирбирига яқин бўлиб, йўл устида жойлашган. Ўн иккинчи жумодилохирда Марврудга етиб келдик. Икки кундан сўнг шахарни тарк қилиб, Обигарм йўлидан юриб, ойнинг ўн тўққизинчи куни Борёбга келдик. Бу ергача ўттиз олти фарсанг экан.

Хуросон амири Чагрибек Абусулаймон Довуд ибн Мекоил ибн Салжуқ бу пайтда Шибурғонда бўлиб, ўз дорулмулки Марвга жўнамоққа ҳозирланаётган экан.

Йўл нотинчлиги туфайли биз Санглон томон юрдик. У ердан Седара орқали Балхга отландик. Седара работига етиб келганда, укам Хожа Абулфатҳ Абдулжалил Хуросон амирининг Абунаср деган вазири аъёнлари орасида эканлигини эшитдим. Хуросондан кетганимга етти йил бўлган эди. Дастгардга етганимизда Шибурғон тарафга олиб кетилаётган кўч-кўронни кўрдик. Менга ҳамроҳ бўлган укам: «Бу кўч-кўрон кимники?» деб сўради. «Вазирники», деб жавоб беришди унга. «Сизлар Абулфатҳ Абдулжалилни танийсизларми?» деб сўради яна укам. «Унинг хизматкори биз билан», деб жавоб беришди. Шу аснода бир одам бизга яқинлашиб, қаёқдан келаётганимизни сўради. Ҳаждан келаётганимизни эшитгач, у деди: «Менинг хўжайним Абулфатҳ Абдулжалилнинг икки биродари ҳам бундан бир неча йил бурун ҳажга кетишган эди. Хўжайним интизорлик билан улар йўлига кўз тикмоқда. Аммо кимданки сўрамасин, улар ҳақида бирон хабар айтишмади». Укам унга: «Мен Носирдан мактуб келтирдим, хўжайнинг келса, унга бераман», деди.

Бир оздан сўнг карвон йўлда тўхтади. Биз ҳам йўл ўртасида тўхтадик. Хизматкор деди: «Хўжайним етиб келгач, сизларни кўролмаса, жуда хафа бўлади. Агар ўша мактубни менга берсангиз, мен унга бераман ва у

бениҳоят хурсанд бўлади». Укам унга деди: «Сенга Носирнинг мактуби керакми ё ўзими? Мана Носир, олдингда турибди».

Хизматкор шодлигидан нима дейишини билмай қолди ва биз биргаликда қишлоқлар оралаб ўтган йўлдан Балх шаҳри сари равона бўлдик. Укам Хожа Абулфатҳ эса дашт йўлидан Дастгардга келиб, вазир билан бирга Хурросон амири хузурига отланаётган экан. Биз ҳақимизда эшитиши биланоқ Дастгардан қайтиб, Жамугиён кўприги устида бизни кутиб турибди. Шанба куни бўлиб, тўрт юз кирқ тўртинчи йил жумодилохир ойининг йигирма олтинчи куни (1052 йил, октябр) эди. Неча дафъя ҳалокатли ҳодисаларга дуч келиб, ҳатто жонимиздан ва яна қўришишдан умид узиб юрганларимиздан сўнг, мана ниҳоят, бир-бirimizga етищдик ва жигарларимиз дийдорини кўриб шод бўлдик. Худойи субҳонаҳу ва таолога шукрлар килдик. Балх шаҳрига етиб келган кунимиз, мен ўз ахволимизни баён қилувчи ушбу уч байтни битдим:

*Гарчи бу жаҳон ранжию алами бисёр,
Бари ўтар, ҳар нарсанинг ўз поёни бор.*

*Эски шу чарх тиним билмай айланар тун-кун,
Тунлар ўтиб, келган каби кунлар биз учун.*

*Қайтадиган бир ўйл эди биз очган дафтар,
Эвоҳ, охир насибадир қайтилмас сафар.*

Бутун босиб ўтган йўлимиз, Балхдан Мисргача, ундан Маккага ва Басра орқали Форсга етганимиз ва ундан Балхга келгунимизча, атроф жойларга зиёратлар қилганимиз ва ҳоказоларни қўшмаганда ҳам икки минг икки юз йигирма фарсангни ташкил қиласди. Саргузаштим давомида нимаики кўрган бўлсам, ростгўйлик билан тасвирладим. Бирорлардан эшитиб қаламга олган ҳикояларимда ҳақиқатга хилоф жойлари бўлса, ўкувчилар буни мен ҳақирдан кўрмасинлар ва менга таъна-маломатлар қилмасинлар. Агар Оллоҳ субҳонаҳу таоло тавфиқ ва мадад бериб, Машриқ тарафга ҳам сафар этмоқ мұяссар бўлса, барча кузатишларимни оқизмай-томизмай қофозга туширгумдир. Иниш Оллоҳу таоло.

И З О Х Л А Р

1) «Дабир» сўзининг маъноси «мирза», «мунший» бўлиб, ўзини «дабирпеша одам» деганидан Носир Хисравнинг Султон девонхонасида давлат ҳужжатлари ва мактубларни ишо ва таҳрир қилиш ишларига машғул бўлгани англашилади.

2) *Чағрибек Довуд* (1037 – 1059) – салжуқийлар сулоласи асосчиси Салжук ибн Дўқокнинг набирасидир. Салжуқийлар саркардалари ака-ука Тўғрулбек ва Чагрибеклар олдин ғазнавийларга қарашли бўлган бир қатор вилоятларни забт этишгач, 1037 йилда Марвда Чагрибек ва Нишопурда Тўғрулбек ўз номларига хутба ўқиттиришади ва мазкур шахарлар салжуқийларнинг асосий марказларига айланади. Салжуқийлар салтанатининг биринчи хукмдори расман Тўғрулбек (1037 – 1063) ҳисобланган.

3) Қадимги Марв шаҳрининг қолдиклари ҳозирги Туркманистоннинг Байрамали шаҳри яқинидадир.

4) *Марварруд* (*Марвруд*) Мурғоб дарёсининг юқори оқимидағи шаҳар ва вилоятдир. Сўнгти даврларда Боломурғоб деб аталган.

5) «Раъс» – қадимги мунажжимлар томонидан илон шаклидаги юлдузлар туркумiga берилган ном бўлиб, унинг бир тарафи «раъс» – «бош», бошқа тарафи эса «занаб» – «дум» деб аталган. Мазкур юлдузлар туркумининг бошка бир номи «Аждаҳо»дир.

6) *Муштарий* – Юпитер сайёраси.

7) Юлдузларнинг бир бурҷда бир-бирларига якин келиб қолиш ҳодисаси «кирон» деб аталган.

8) Жузжонон ёки *Fuzgonon* (Жузжон ёки Фузғон каби қисқа шакли ҳам кўлланилади) ҳозирги Афғонистоннинг шимолидаги маркази Сарипўл шаҳри бўлган вилоят.

9) Ушбу ҳадис аслиятда араб тилида келтирилган.

10) «Порс» сўзи ислом мамлакатларида зардўштийлик динига эътиқод қилган кишиларга нисбатан кўлланилган.

11) *Яздижардий йил ҳисоби* – эронликларнинг қуёш солномасига асосланган йил ҳисоби бўлиб, Сосонийлар сулоласидан бўлган сўнгти подшоҳ Яздижард III нинг ўлимни кунидан бошланган.

12, 13) *Шибургон ва Толиқон* – Шимолий Афғонистондаги шаҳар ва вилоятлардир.

14) *Nishonpur* – Эрон шарқидаги шаҳар.

15) *Сарахс* – Эрон ва Туркманистон сарҳади яқинида жойлашган шаҳар.

16) *Фарсанг* – масофа ўлчови бўлиб, тақрибан олти км га тенгдир.

17) *Кусуф* – қуёш тутилиши.

18) 2-изоҳга қаранг:

- 19) *Саррожлар* — эгарсозлар.
- 20) *Исфаҳон* — Эроннинг марказий ҳудудларидағи қадимий шаҳар ва вилоят.
- 21) *Хожа Муваффақ Нишопурӣ* Умар Хайёмнинг устози бўлган.
- 22) *Кумис* — Шимолий Эрондаги тоғлиқ вилоят. Афтидан, Носир Хисрав ушбу вилоятдаги Бистом шаҳрини назарда тутмоқда.
- 23) *Боязид Бистомий* — машҳур мутасавиф, вафоти 874 йил.
- 24) *Қаддасаллоҳу руҳаҳу* — Оллоҳ унинг рухини муқаддас қиласин.
- 25, 26) *Домғон ва Симонон* — шимолий Эрондаги шаҳарлардир.
- 27) *Дайлам* — Каспий дengизининг жануби-шарқий соҳилидаги вилоят.
- 28) *Иқлидус* — Эвклид, қадимги юнон олим.
- 29) *Балх* — Шимолий Афғонистондаги қадимий шаҳар.
- 30) *Рай* — хозирги Эрон пойтахти Техрон яқинида жойлашган қадимий шаҳар.
- 31, 32) *Сова, Ҳамадон* — Farбий Эронда жойлашган қадимий шаҳарлар.
- 33) *Омул* — Эрон шимолида, Мозандарон вилоятида жойлашган шаҳар.
- 34) *Қазвин* — Эроннинг шимоли-ғарбида жойлашган шаҳар.
- 35) *Ман* — оғирлик ўлчови бўлиб, унинг миқдори турли даврларда ҳар хил бўлган.
- 36) *Дирҳам* — кумуш танга.
- 37) Алининг авлоди ёки тарафдори.
- 38) *Торум* — Қазвиндан шимол тарафда жойлашган тоғлиқ вилоят.
- 39) *Гилон* — Каспий дengизининг жануби-ғарб соҳилида жойлашган вилоят.
- 40) Каспий дengизининг эски номларидан бири Обисқун бўлган.
- 41) *Сароб* — Табриз ва Ардобил шаҳарлари ўртасида жойлашган шаҳар.
- 42) *Табриз* — хозирги Эроннинг шимоли-ғарбида, Озарбайжон вилоятида жойлашган қадимий шаҳар.
- 43) *Қатрон Табризий* — XI асрда яшаб ижод килган шоир. У форс-тожик шоирлари аасарларида учрайдиган қийин сўзларни шархлаб, адабий луғат тузган.
- 44) *Мунжиқ Термизий* — X асрнинг иккинчи ярмида Чагониёнда, яъни хозирги Сурхондарё вилоятидаги Денов шаҳрида яшаб ижод килган шоирдир. Унинг шеърий девони бизгача етиб келмаган. Мунжиқ ижодидан айрим намуналар Қатрон Табризий лугати ва бошқа адабий манбалар орқали сакланиб қолган.
- 45) *Дақиқий* — X асрда яшаб ижод этган форс-тожик шоири. 977 йилда сунқасд туфайли ўлдирилган. Дақиқий илк бор назмда «Шоҳнома» ёзишга киришган шоирлардан биридир. Аммо бевакт ўлим туфайли аасар тугалланмай қолган. Сўнгроқ Абулқосим Фирдавсий ўз «Шоҳнома»сига Дақиқий тарафидан битилган қисмларни ҳам киритган.

46) *Ван* — ҳозирги Туркияning шарқ тарафидаги Ван кўлининг жанубида жойлашган шаҳар.

47) *Ихлот* сўзининг маъноси «аралашган», «омухта»дир.

48) *Ратл* — оғирлик ўлчови бўлиб, унинг миқдори турли даврларда ўзгариб турган.

49) *Увайс Қараний* — Муҳаммад пайғамбар даврида яшаб ўтган шайх. Алишер Навоий ўзининг «Насойим ул-муҳаббат» асарида шайх Увайс Қараний хақида, жумладан, шундай деб ёзди: «Ва Ҳазрат Рисолат с.а.в.ни кўрмабдур эрди ва ул Ҳазрат ҳам ани зохир кўзи билан кўрмабдур эрдилар. Маъною руҳоният юзидин тарбият қилиб эрдилар. Бу жиҳатдин ҳар кишинингки, бу тоифадин зохир юзидин пири маълум бўлмаса ва машойихдин бирининг руҳи ани тарбият қилғон бўлса, ани «Увайсий» дерлар».

50) *Миёфориқин* — Шарқий Туркиядаги шаҳар.

51) *Газ* — узунлик ўлчови бўлиб, тақрибан 1 м. 25 см. га тенгdir. Аммо бу миқдор турли даврларда ўзгаришларга учраб турган.

52) «*Работ*» сўзи икки хил маънони билдиради: 1) шаҳар чеккалари, яъни марказ (шаҳристон) атрофи; 2) йўловчилар кўниб ўтиши учун катта йўллар устида маҳсус курилган иншоот.

52a) «*Рум*» номи остида Кичик Осиёдаги Византия давлати туши-нилган.

53) «*Тал*» сўзининг маъноси «тепалик»дир.

54) Яъни файриараб; асосан Эронга нисбатан қўлланган.

55) *Калисо* — христианлар ибодатхонаси, яъни черков.

56) *Тарсолар* — христианлар.

57) *Шом* — ўрта асрларда Сурия шу ном билан аталган.

58) *Халаб* — Суриянинг шимоли ғарбида жойлашган шаҳар.

59) *Диёрбакр* — ҳозирги Туркияning жануби-шарқида жойлашган шаҳар ва вилоят.

60, 61) *Хамо ва Хўмс* — Суриянинг ғарбий кисмида жойлаган шаҳарлардир.

62) *Дамашқ* — ҳозирги Суриянинг пойтахти. Мамлакат жанубида жойлашган.

63) *Тароблис* — ҳозирги Ливаннинг шимоли-ғарбида, Ўрта Ер денгизи соҳилида жойлашган Триполи шаҳри.

64) *Кустантания* — Византия (Рум) давлати пойтахти бўлган Константинополь шаҳри. Ҳозирги Туркияning Истанбул шаҳридир.

65) Араб шоири, 973—1057 йилларда яшаган.

66) *Фарангистон* — франклар мамлакати. Бу сўз тор маънода Франция, кенг маънода Ғарбий Европага нисбатан қўлланилган.

67) *Андалус* — ҳозирги Испания жойлашган минтақа.

68) *Суқлия* — Сицилия ороли.

69) Авлиёлар кабри яқинида курилган иморат.

70) *Байрут* — ҳозирги Ливан мамлакатининг пойтахти, Ўрта Ер денгизининг шарқий соҳилида жойлашган шаҳар.

71) *Сайдо* — ҳозирги Ливан худудида жойлашган шаҳар.

72) *Сур* — ҳозирги Ливаннинг жанубида жойлашган қадимий шаҳар. Қадимги номи Тир бўлган.

- 73) Пайғамбар саҳобалари.
- 74) *Савмаа* — монастир.
- 75) *Хайфо* — хозирги Истроил мамлакатининг шимолида жойлашган.
- 76) Сербарг доривор гиёх.
- 77) *Байтулмакъдис* — Куддуси шариф шаҳри. Ҳозирги Истроил худудида жойлашган.
- 78) *Куништ* — яхудийлар ибодатхонаси — синагог.
- 79) *Умар ибн Хаттоб* — Муҳаммад пайғамбар с.а.в.нинг саҳобаси, 634—644 йилларда халифа бўлган.
- 80) Бир хил нордон мева.
- 81) Муқим яшайдиган кишилар.
- 82) Миср Фотимиylари сулоласига асос солган сulton, 909—934 йилларда ҳукмронлик килган.
- 82a) *Ҳижоз* — Арабистон ярим оролининг фарбий қисмидаги вилоят, Макка шаҳри ушбу вилоятнинг марказидир.
- 83) Пайғамбар дарвозаси.
- 84) *Арафот* — ҳажга борганлар зиёрат қилиши лозим бўлган зиёратгоҳ: Арафот тоғи этагидаги сувсиз тошлок водий бўлиб, Маккадан 30 км. шарқда жойлашган.
- 85) *Асқулон* — ҳозирги Истроил худудидаги Ацкелон шаҳри.
- 86) *Нуба вилояти* — ҳозирги Судан мамлакати худудидадир.
- 87) *Ассувон* — Миср жанубида, Нил дарёси соҳилида жойлашган шаҳар.
- 88) *Жабалулқамар* сўзининг маъноси «Ойтoғ»дир.
- 89) Миср шаҳри ўша пайтда Қоҳира шаҳри яқинида жойлашган. Кейинчалик шаҳарлар кенгайиб, бир-бирига қўшилиб кетган.
- 90) *Искандария* — Миср шимолида жойлашган қадимий шаҳар.
- 91) «Рум денгизи» атамаси ҳозирги Ўрта Ер денгизига нисбатан кўлланилган.
- 92) *Ҳоким Биамруллоҳ* — фотимиylар сулоласидан бўлган Миср ҳукмдори (996—1021).
- 93) *Кулзум* — Қизил денгизнинг ўрта асрлардаги номи.
- 94) *Кулзум шаҳри* шу денгизнинг шимолида жойлашган ҳозирги Сувайш шаҳридир.
- 95) *Адан* — Яман мамлакати жанубида, денгиз соҳилида жойлашган шаҳар ва вилоят.
- 96) *Яман мамлакати* Арабистон ярим оролининг жанубий қисмида жойлашган.
- 97) *Ҳабашистон* — ҳозирги Эфиопия мамлакати.
- 98) *Ал-Муizzиддиналлоҳ* — фотимиylар сулоласидан бўлган ҳукмдор (953—975).
- 99) *Фуқов* — бўзага ўхшаш ичимлик.
- 100) Машрикликлар.
- 101) Фотимиylар сулоласидан бўлган Миср ҳукмдори сulton Тамим ал-Мустансирబиллоҳ (1036—1094).
- 102) *Муовия* — умавийлар сулоласига мансуб халифа (661—680).
- 103) Зебра ёки жирафа териси бўлса керак.

- 104) Түяқуш назарда тутилаётган бўлса керак.
- 105) Қовунга ўхшаш кичикроқ мева.
- 106) *Басра* — Ирок жанубидаги шаҳар.
- 107) *Маҳмуд Фазнавий* (997 – 1030) — ғазнавийлар сулоласининг энг машҳур ҳукмдори. Мамлакат пойтахти ҳозирги Афғонистондаги Фазни шаҳри бўлгани учун сулола шу ном билан аталган.
- 108) *Масъуд Фазнавий* (1030 – 1041) — Султон Маҳмуднинг ўғли, отасидан сўнг ҳукмронлик қилган. Носир Хисрав ўз хизмат фаолиятини Фазнавий ҳукмдорлар саройида бошлаган. 1041 йилда Марв якинида Салжуқийлар Султон Масъуд лашкарини тор-мор келтириб, Хурросонни егаллагач, Носир Хисрав чор-ночор Салжуқийлар хизматига ўтган бўлиши мумкин.
- 109) *Балисон* — эфир мойи.
- 110) *Асют* — Нил бўйида ва Миср мамлакати марказида жойлашган шаҳардир.
- 111, 112) *Лоҳур ва Мўлтон* — ҳозирги Покистон ҳудудида жойлашган шаҳарлардир.
- 113) *Жидда* — Қизил денизнинг Арабистон тарафдаги соҳилда, Макка якинида жойлашган шаҳар.
- 114) *Саъда* — Яман мамлакати шимолида жойлашган шаҳар.
- 115) Умра ද e b K a ՚ b a n i ва Макка атрофидаги бошқа зиёратгоҳ жойларни зулхижжа ойидан бошқа маҳалда тавоғ килишга айтилади.
- 116) «Хажарул Асвад» — «қоратош», бу тош Каъба биносининг жануби-шаркий ташки бурчагига ўрнатилган.
- 117) *Рукн* — асос, пойдевор.
- 118) *Суқулатторин* — атторлар бозори демакдир.
- 119) *Ҳимяр* — Арабистон ярим оролининг жануби-ғарбий қисмida, ҳозирги Яман ҳудудида жойлашган Ҳимяр подшоҳлиги (300 – 525 йиллар) назарда тутилган.
- 120) *Зобид* — ҳозир Яманинг ғарбий қисмida жойлашган шаҳар.
- 121) *Санъо* — ҳозирги Яман мамлакатининг пойтахтидир.
- 122) *Бобуннаби* — «Пайғамбар дарвозаси». Бу ўринда Маккадаги масжиднинг эшик ва дарвозалари ҳакида сўз юритилмоқда.
- 123) *Бобуддаққоқин* — «Тегирмончилар дарвозаси».
- 124) *Абу Жаҳл* — асли исми Амр ибн Ҳишом бўлиб, ислом динига қаттиқ карши чикканлиги учун Мухаммад пайғамбар унга «Абу Жаҳл» (жахолатнинг отаси) лақабини кўйган.
- 125) *Бобулвасит* — Ўрта дарвоза.
- 126) *Бобулмушоварат* — Машварат дарвозаси.
- 127) *Сожъ* — ёғочи пишиқ ва қаттиқ дараҳт. Иморат қуриш ва кемасозликда кўп ишлатилган.
- 128) *K у r ՚ o n i K a r i m*, Оли Имрон сураси, 96-оятдан, мазмуни: «Дарҳакиқат, одамлар ибодат қилишлари учун курилган биринчи уйдир».
- 129) *Китоба* — ёзувлли лавҳа.
- 130) *Ал-Азизуддиналлоҳ* — фотимиylар сулоласига мансуб ҳукмдор бўлиб, 975 – 996 йилларда ҳукмронлик қилган.

- 131) *Сиқоятулҳожи* — ҳожилар сув ичадиган жой маъносидадир.
- 132) *Хизонатуззайт* — мой сақланадиган омборхона маъносидадир.
- 133) *Икки Ироқ* (Ироқайн) — Ироқи ажам ва Ироқи араб.
- 134) *Биъруррасул* — Пайғамбар кудуғи.
- 135) *Биъри Али ибни Абутолиб* — Али ибн Абутолиб кудуғи.
- 136) *Билол ибн Рабоҳ* қул бўлиб, Пайғамбар томонидан озод қилинган. Ажойиб овози боис муаззинликка тайинланган.
- 137) Шайтонга тош отиш маросими назарда тутилмоқда.
- 138) *Тоиф* — Арабистондаги қадимий шаҳар.
- 139) *Абдуллоҳ ибн Аббос* — Пайғамбарнинг амакивачаси ва Аббосийлар сулоласи асосчиси. Хижрий 68 (милодий 687) йилда Тоифда вафот этган.
- 140) *Хафир* — йўловчиларни ўз химоясига олган қабила томонидан бериладиган йўлбошловчи ва ҳомий.
- 141) *Асҳоби ар-рақум* — бу ўринда Куръони карим «Кахф» сурасининг 8—26 оятларида зикр қилинган «Асҳобул-Кахф» — «Фор эгалари» назарда тутилаётган бўлса керак.
- 142) *Кориз* — ер ости сувларини маълум йўналишда оқизиш орқали ҳосил қилинган ариқ.
- 143) Бир дирҳам оғирлик ўлчови сифатида 3 граммдир.
- 144) *Банотуннаш* — Етти Оғанин юлдузлар туркуми.
- 145) *Дирҳамхарида* — яъни сотиб олинган.
- 146) *Баҳрайн* — Форс қўлтиғида жойлашган орол.
- 147) *Уммон* — Арабистон ярим оролининг жануби-шарқидаги мамлакат.
- 148) *Қатиғ* — Баҳрайндан шимолрокда, Форс қўлтиғининг Арабистон тарафдаги соҳилида жойлашган шаҳар.
- 149) *Абу Наср ибн Абу Колинжор Дайламий* Ироқ ва Форсда 1048—1055 йилларда хукмронлик қилган.
- 150) *Форс* — Эроннинг жануби-ғарбида маркази Шероз шаҳри бўлган вилоят.
- 151) *Аҳвоз* — Эроннинг ғарбида жойлашган шаҳар ва вилоят.
- 152) *Зуҳал* — Сатурн сайёраси.
- 153) *Явқуб ибни Лайс* — Хуросонда 868—879 йилларда хукмронлик килиб, саффорийлар сулоласига асос солган.
- 154) *Козарун* — ғарбий Эронда жойлашган шаҳар.
- 155) *Харвор* — бир эшак кўтара оладиган, таҳминан 300 килограммга тенг юк.
- 156) Мунший, котиб.
- 157) *Ноин* — Исфаҳондан шарқ тарафда, Эроннинг марказий ҳудудида жойлашган шаҳар.
- 158) Кирмон тоғларида яшаган бир қабила.
- 159) *Табас* — Эроннинг шарқий қисмида жойлашған шаҳар.
- 160, 161) *Завзан ва Тун* — Эроннинг шарқий вилоятларидағи шаҳарлар.

162) *Тоҳаристон* — ҳозирги Афғонистоннинг шимоли-шарқидаги вилоят.

163) Яъни ер ости канали — коризга туташган қудуклар.

164) *Қоин* — Эроннинг шарқий қисмида, сарҳад яқинида жойлашган шаҳар.

I. Ҳижрий-қамарий йил ойлари

1. Муҳаррам
2. Сафар
3. Рабиъулаввал
4. Рабиъуссоний
5. Жумодилаввал
6. Жумодуссоний
7. Ражаб
8. Шаъбон
9. Рамазон
10. Зулқаъда
11. Зулхижжа

II. Яздижардий тақвим ойлари

1. Фарвардин — март-апрель
2. Ўрдивеҳишт — апрель-май
3. Хўрдод — май-июнь
4. Тир — июнь-июль
5. Мўрдод — июль-август
6. Шахривар — август-сентябрь
7. Мехр — сентябрь-октябрь
8. Обон — октябрь-ноябрь
9. Озар — ноябрь-декабрь
10. Дай — декабрь-январь
11. Баҳман — январь-февраль
12. Исфандўрмуз — февраль-март

Яздижардий йилнинг биринчи куни баҳорги кун-тун тенглиги (1 фарвардин — 21 март)га тўғри келади.

ҲУРМАТЛИ КИТОБХОНЛАР!

«Шарқ» нашриёт-матбаа акциядорлик компанияси
томонидан нашр этилган кўйидаги китобларни ўқишни
тавсия этамиз:

Қамар Омон. Маънавият назарияси.

Усмон Қорабоев. Ўзбек халқ байрамлари.

Сайфулла Турсунов. Термизий буюк сиймолар.

Нурёғди Тошев. Шоҳ жаҳон.

Ғулом Карим. Соҳибқирон ва аллома.

Абдуқаҳҳор Иброҳимов. Миллат овози.

Асад Дилмурод. Фано даштидаги қуш.

Тоҳир Малик. Мехмон. Туйғулар.

НОСИР ХИСРАВ

САФАРНОМА

«Шарқ» нашриёт-матбаа
акциядорлик компанияси

Бош таҳририяти
Тошкент — 2003

Муҳаррир: *Барнобек Эшпӯлатов*

Рассом: *Темур Сайдулла*

Бадиий муҳаррир: *Анвар Мусоҳўжаев*

Техник муҳаррир: *Раъно Бобохонова*

Теришга берилди 10.11.2002. Босишга рухсат этилди 3.01.2003.
Бичими 84x108¹/32. «Петербург» гарнитураси. Офсет босма. Шартли
босма табори 5,9. Нашриёт-хисоб табори 6,0. Адади 3000 нусха. Буюрт-
ма № 4245. Баҳоси келишилган асосда.

**«Шарқ» нашриёт-матбаа
акциядорлик компанияси босмахонаси,
700083, Тошкент шаҳри, Буюк Турон, 41.**